



T.S 294

1664



LE PIVOT DE LA FOY ET RELIGION,

O V

Preuve de la Diuinité, contre
les Athées & Prophanes.

*Par la Raïson, & par le tesmoignage
des Sainctes Escritures, desquelles
la Diuinité est demonstrée
par ellès mesmes.*

Par L. CAPPEL, Professeur
en Theologie.

pierre

28




pinget

+ 6.

A SAVMVR,

Par JEAN LESNIER, Imprimeur
& Libraire, Au Livre d'Or.
M. DC. XLIII.



P R E F A C E A V L E C T E V R.



C E petit Traitté
n'est pas a dessein,
ni avec esperance,
de conuertir & ra-
mener de leur es-
garment ceux contre les-
quels ie dispute. Car telles
gens ne se ramencent pas par
disputes, discours, raisonne-
mens & argumens de la rai-
son humaine. Il faut pour

P R E F A C E

leur conuersion & guerison
que Dieu luy mesme parle,
voire les frappe & atterre par
ses vengeances & iugemens.
Le peché de ces gens là , est
comme celuy de Sodome , à
sçauoir, *L'orgueil, abondance de
pain, & l'aise d'oisiueté.* (Ezech.
16.49.) Ce mal attaque par-
ticulierement, & principale-
ment, ceux qui sont icy bas à
leur aise, à qui les biens de ce
present Monde abondent,
qui nagent dans les richesses,
hōneurs, delices, & plaisirs de
ceste vie, car *l'aise des sots les
tue, & la prosperité des fols les
perd,* Prouerb.32. Tandis qu'ils

AV LECTEUR.

font dans cest aise, & jouïssent paisiblement de ceste prospérité, ils destournent leurs pensées de Dieu, duquel la souvenance ne feroit que les attrister, & troubleroit leur contentement, ne pouuans pas se rien promettre de bon, de luy qui aime la vertu, la justice & saincteté, laquelle ne consiste pas avec la sorte de vie qu'ils ont choisie, pour la passer en delices, voluptez & mollesse.

Ils font lors comme l'aspic qui bouche son oreille contre les charmes de l'enchanteur, Pseau. 58. 5. Le meschant cesse, ou refuse, d'entendre, & d'estre instruit, de peur

P R E F A C E

de se sentir obligé de bien faire, Pf. 36. 3. Ils ne sont pas lors capables d'instruction, & seroient bien marris de reconnoître leur erreur, pource qu'il leur faudroit changer de vie, qui est ce qu'ils ne veulent pas, la trouuans douce & agreable à merucilles.

Mais quand ils sont attaqués de la mort, & qu'ils sont aux prises avec elle, qu'elle les tient au collet, ou à la gorge, ou quand par quelque espouuantable & exemplaire iugement de Dieu ils sont decheus de leurs grandeurs, biens, richesses & plaisirs, & reduits à

AV LECTEUR.

l'estat de Iob, ou de l'Enfant Prodigue de l'Euangile, alors font ils quelquefois capables de guerison, alors leur conscience effrayée les réveille de leur profond assoupissement, alors ouurent ils par fois les yeux pour reconnoître & detester leur égarement. Hors de là ils font comme le Lethargique qu'on a beau pousfer, auquel on a beau parler, il ne s'esmeut point, ni ne se veut réveiller, pour ce qu'il prend trop de plaisir en son sommeil, qui le couche en fin dans le tombeau.

Cecy est plustost, 1. Pour

P R E F A C E

retenir de tomber dans ce precipice ceux qui y ont quelque naturelle pente & inclination, selon que la corruption generale & naturelle de l'homme, luy est vn secret Maistre & caché Docteur d'Atheisme, à qui ces pensées viennent par fois en l'esprit, *Mais qui t'a dit qu'il y a vn Dieu, lequel tu n'as jamais veu, & d'ou le scauent ceux qui te l'ont appris, quelle plus grande assurance en ont ils eux mesmes, & d'ou leur est elle venue?*

2. C'est pour appuyer la Foy de ceux en qui elle pourroit auoir receu quelque atteinte & secousse. 3. Pour desabuser

AV LECTEUR.

ceux qui pensent que mis à part la révelation par la parole de Dieu, ces gens là ne sont pas sans raison, & n'ont pas tout le tort du Monde; car il y est démontré qu'ils combattent la raison, & la démentent en diuerfes façons. Finalement c'est pour rabattre en quelque façon, la vaine jactance, & les prophanes risées de ces gens là, qui se moquent de la simplicité (ce leur semble) du Monde qui croit, à leur aduis, si de leger à ces liures qu'on appelle la Bible, sans auoir autre garent de leur creance que le bruiet

P R E F A C E

commun, ou vn oui dire, ou bien le tesmoignage de quelques hommes, qui se donnent ceste authorité, de bailler à ce liure sacré tout le credit qu'il a enuers nous, & cepédant ne sçauroient d'ailleurs monstrier surquoy est appuyé leur tesmoignage. Et par là esbranlent la Foy de ceux qui sont instruits à deferer plus que de raison au tesmoignage de ceux là. Car contre les Athées il est monstté qu'ils se rendent absurdes & ridicules en reuoquant, contre toute apparence de raison, en doute l'authorité de ces liures sacréz.

AV LECTEUR.

Cecy fut, il y a maintenant trois ans, dicté à quelques jeunes Theologiens en ce lieu, sans autre dessein que de leur particuliere satisfaction, & a leur requeste, & pour leur servir de base & fondement à leur Foy & Religion, car c'est par ou il faut commencer, *Qu'il y a un Dieu*, ce que plusieurs ne sçauent sinon parce qu'ils l'ont ainsi ouï dire, sans auoir pensé, ni examiné en eux mesmes, surquoy est appuyée ceste creance commune qu'ils ont imbuë avec le lait. Mais depuis, cela ayant esté veu & approuué par de

P R E F A C E

bons Maistres , au jugement
desquels ie defere comme ie
doibs , ie me suis laissé aller à
leur aduis , que cela mis au-
jour ne sçauroit nuire , &
pourra peut estre profiter
à quelques vns. Ne fust ce que
pour monstrier que nous ser-
uons à Dieu selon nostre pos-
sible , en maintenant la cause
contre ses plus furieux enne-
mis , & que ceux de nostre
robbe & profession ne sont
pas tels que quelques vns vo-
lontiers les voudroient faire
croire au Monde, ennemis de
Dieu, & de sa verité, puis que
nous en establissions le fonde-

AV LECTEUR.

ment le plus fermement qu'il nous est possible ; dissemblables en cela à quelques autres de leur profession , qui feignant de bien poser ce fondement, le renuersent en effect, l'appuyans sur de mauuais pilottiz , & par vne secrette intelligence avec les ennemis qu'ils font semblant de combattre, trahissent & leur abandonnent la verité laquelle ils veulent qu'on croie qu'ils defendent. Si de la lecture de ce petit escrit (qui ne peut pas beaucoup diuertir ses lecteurs de leurs autres occupations) ils s'en trouue qui

P R E F A C E

Je sentent edifiez & fortifiez
en la Foy & creance de cest
important Article, qui est le
piviot de toute Religion, j'au-
ray atteint mon principal
dessein, & croiray que ma me-
ditation sur ce poinct n'aura
point esté inutile; & à Dieu,
qui adresse en sa sagesse les
pensées des hommes, & s'en
sert à sa gloire, & pour son
œuvre, soit honneur, loüan-
ge, & gloire à jamais, A M E N.



T A B L E

DES CHAPITRES

Chap. I. *Estenduë de l' Atheisme, Source d'iceluy, diverses branches de ceste infidelité.* page I.

Chap. II. *Deux façons de combattre l' Atheisme, par Raison, & par Authorité. Première raison, tirée de ce que le Monde a eu commencement.* pag. II.

Chap. III. *Seconde Raison contre l' Atheisme, tirée de l'ordre & agencement de ce Monde.* pag. 33.

Chap. IV. *Troisième Argument, tiré de la naturelle difference qu'il y a entre le vice & la vertu.* pag. 44.

Chap. V. *Quatrième Argument, tiré du desordre qui se void en l'homme, & en toute la nature des choses, lequel desordre a de nécessité un commencement & une fin.* pag. 54.

Chap. VI. *Raison cinquième, tirée d'une Providence qui conduit les choses humaines.* pag. 64.

TABLE DES CHAPITRES.

- Chap VII. *Mesprise & bencuë puerile d'Epicure, qui pose une Diuinité, & nie neantmoins la Providence.* p 99
- Chap. VIII. *Raison sixième, tirée de l'immortalité de l'Ame.* pag 125.
- Chap. IX. *Septième Raison, tirée de la bonne & mauuaise conscience des hommes.* pag. 148.
- Chap. X. *Huictième Raison, tirée des Sorciers, Magiciens, Enchanteurs, & de toute l'idolatrie & superstition Payenne.* pag. 165.
- Chap. XI. *Response aux obiections contre la raison precedente.* pag. 174.
- Chap. XII. *Neufuïème Raison, tirée du consentement de tous les hommes du Monde, qui reconnoissent une Diuinité.* pag. 194.
- Chap. XIII. *Derniere preuue, tirée du tesmoignage des Saintes Escritures, desquelles la Diuinité est demonstrée contre les Athées.* pag. 220.
- Chap. XIV. *Suite des preuues de la Diuinité des saintes Escritures.* p. 253
- Chap. XV. *Refutation des Raisons des Athées.* pag. 282.

Fin de la Table des Chapitres.



L'ATHEISME CONVAINCV

ET LA PROFANE-
té confondue par la lu-
miere de la droite raison,
& par le tefmoignage de
Dieu & des hommes.

CHAP. I.

*Estendue de l'Atheisme ; source
d'iceluy, diuerses branches de
ceste infidelité.*



'EST vne chose étran-
ge & monstrueuse que
la cognoissance des
choses celestes & di-
uines estant aujour-
d'huy beaucoup plus grande &

A

plus claire, en la plus grand part des hommes qui sont sur la face de la terre qu'elle n'a jamais esté, il se voit neantmoins plus d'Athées & Prophanes qu'il ne semble y en auoir iamais eu, mesmes entre les Payens, ce qui paroist par le débordement estrange, & la corruption horrible des mœurs qui se voit aujourd'huy si commune mesme entre les Chrestiens, estant tres-vray ce que l'Apostre dit, que *plusieurs confessent Dieu de bouche, mais le renient par leurs œuvres.*

La source de ce mal est l'amour desreiglé des biens, plaisirs, commoditez, honneurs & dignitez de ce present siecle. Car les hommes emportez de leurs passios vers ces choses, & ayans neantmoins vn naturel ressentiment de quelque diuinité, & quelque cognoissance de la differéce qui est entre

le bien & le mal , le vice & la vertu , & des peines & recompenses qui leur sont deües (ce qui leur est comme vn suc d'aluine & fiel tres-amer qui fouille tout le plaisir & contentement qu'ils prennent à se gorger de ces faux biens) s'efforcent d'esteindre en eux ceste persuasion si forte qu'il y a vn Dieu, ou se forgent du moins des fausses opinions de luy & de sa nature , pour se laisser aller avec plus de desbordemēt, moins de remors, & plus de plaisir, à l'exécution de leur mauuais desirs, cherchent & ramassent toutes les raisons & argumens que la subtilité de leur Esprit leur peut fournir pour se fortifier en ceste opinion.

Or il y a deux sortes d'Athées, les vns formels & ouuerts , & d'autres couuerts & cachez. Et de ces premiers il y en a de deux sortes, les

uns confessent, & font profession de croire, qu'il n'y a point de Dieu, & tâchent mesme de le persuader aux autres aux occasions, les autres croient bien en eux mesmes & se persuadent qu'il n'y en a point, mais n'osent pourtant s'en descouvrir par vne professiõ ouuerte, de peur ou de la justice des hommes qui châtient ceste impieté, ou de la honte du Monde qui à en horreur & detestation tels monstres. Ceux qui ne sont pas si ouuertement profanes confessent bien vne diuinité, mais ont de fausses opinions d'icelle, qui ne peuuent consister avec la verité de sa nature. Le Dieu de telles gens est vne Idole, vn faux Dieu, & vn fantosme seulement de diuinité, or n'auoir qu'un fantosme de diuinité n'est pas fort loin de l'Atheisme.

De ces fausses opinions les vnes

sont plus grossieres & palpables, & moins accordantes avec la nature de la diuinité, les autres sont plus deliées & delicates, & moins recognoissables, mais qui neârmoins combattent sa nature, & ne peuvent en effect consister avec la vraye diuinité. De celles là, pour exemple, est l'opinion d'Epicure qui tenoit bien vne diuinité, mais qui n'auoit rien à demesler avec ce monde; qui ne l'auoit fait ny ne le gouuernoit, & estoit sans aucun soin de tout ce qui s'y fait ou y arriue. Telle à peu pres estoit l'opinion des Peripateticiens qui recognoissoient vn premier mouueur, mais auquel ils n'attribuoyent que le mouuement de la premiere sphere, & vne action generale & indeterminée sans aucune connoissance, ny gouuernement des choses particulieres, & qui

A ;

n'estoit point aussi la cause efficiente de ce monde, lequel ils estimoient auoir esté tousiours de mesme sans aucun commencement. Telle aussi estoit l'opinion des Payens qui croyoyent pluralité de Dieux, soit indépendants les vns des autres, ou produicts & procréés les vns par les autres, lesquels ils assuietissoient aussi aux passions & affections humaines, de courroux, d'enuie, & conuoitise mesme charnelle, de ioye & de tristesse.

De la seconde sorte d'opinions fausses, mais plus deliées, sont pour exemple celle de ceux qui n'estiment pas Dieu n'y infiniment iuste, n'y infiniment misericordieux, qui veulent qu'il pardonne le peché sans le punir, & qu'il ne le punisse que pource qu'il luy plaist ainsi, pouuant ne le pu-

nir pas s'il vouloit, & pouuant vouloir ne le point punir. Ce qui en reuient en effect a cecy , que le bien & le mal ne sont pas tels de leur nature , mais seulement parce qu'il plaist à Dieu commander l'un & defendre l'autre. D'où s'ensuit qu'il pourroit defendre le bien, & commander le mal. Ce qui est transformer Dieu en ce mauuais principe de l'ancien & abominable heretique Manes, voire faire pis encore que luy, qui pour la distinction & cause du bien & du mal , posoit deux principes l'un bon & l'autre mauuais , là ou ceux cy n'en font qu'un, mais qui est capable de l'un & de l'autre.

Ceux aussi qui ne veulent pas recognoistre Dieu tel qu'ils s'est reuelé & donné à cognoistre en sa Parole, à sçauoir, Un en trois Personnes distinctes, & par ceste Pa-

role éternelle, Iesus Christ son fils, qui à esté incarné & mort pour le salut du monde. Comme font tous ces anciens Heretiques qui ont combattu la tres sainte & bienheureuse Trinité, & l'Incarnation du Sauueur, avec les Disciples & Sectateurs de Mahometh, qui luy preferent leur faux Prophete. Car toutes telles gens sous vn faux pre-texte de defendre l'vnité de Dieu, aneantissent, entant qu'en eux est, Dieu mesme, en destruisant sa puissance & sa Sageſſe éternelle, qui sont le Fils & le S. Esprit, qu'ils veulent n'estre que des noms nuds, & des Fantosmes, ou des simples creatures. On y en pourroit adiouſter plusieurs autres tant anciennes que nouuelles, comme notamment celle des anciens Antropomorphites, qui faisoient Dieu corporel, & luy donnoient des bras, des iam-

bes, & des yeux comme a vn homme, desquels ne s'esloignent pas fort ceux qui se dressent des Images de la tres-saincte Trinite, pour l'adorer & servir en icelles. Toutes telles opinions sont entierement indignes & esloignées de l'excellence infinie de Dieu, engendrent en l'esprit des hommes vne fausse image, & vn pur fantosme, de la diuinité, & destournent les hommes de la vraye crainte, respect, obeissance, pieté, & honneur qui luy est deu par les Creatures.

Il y a vne autre fibre & racine de Prophaneté comme plus couuerte & deliée, aussi plus commune & generale, à sçauoir, de ceux qui tiennent bien vne diuinité, & n'ont point autrement de fausses opinions de sa nature, mais seroyent bien aises neantmoins, & voudroyent volontiers, qu'il n'y

eust point de Dieu. Et ce pour la mesme fin & raison que ceux qui taschent de se persuader qu'il n'y en a point. Cest à sçauoir pour suiure plus licentieusement leurs mauuaises conuoitises. Et ce mal est tellement commun qu'il n'y a que les vrayz fideles & regenez par l'Esprit de Dieu qui en soyent bien gueris, encores leur eschappe t'il assez souuent de telles pensées & desirs lors qu'ils sont tentez & allechez par leurs propres conuoitises : & est comme vne racine de fiel bourgeonnante en haut, par laquelle ils sont souuent souilleez, & laquelle ils combattent tant qu'ils peuuent par l'efficace de l'Esprit de Dieu.



CHAP. II.

*Deux sortes de combattre l'A-
theisme, par raison, & par
autorité.*

PREMIERE RAISON

*Tirée de ce que le Monde a eu
commencement.*

IL y a deux façons de traiter vne chose, l'une est de prouver positivement qu'elle est, & quelle elle est, l'autre de répondre & refuter ce qui se peut apporter à l'encontre, nous nous proposons icy seulement de prouver contre les Athées qu'il y a vn Dieu, & non de répondre à tout ce que la perversité & la subtilité de l'Esprit humain, ingenieux à son propre mal, peut apporter pour se persuader le contraire, parce que comme il y a

des veritez communes si claires & euidentés qu'il n'y a aucun sophisme n'y paralogisme qui nous en puisse faire departir, quoy que nous ne voyions pas le moyen de dissoudre & desnouer le nœud du sophisme, ainsi ceste verité qu'il y a vn Dieu estant bien & fermement prouuée & de monstrée, il n'y aura raison n'y artifice de la subtilité de l'homme qui nous en puisse faire departir, quand bien nous ne verrions pas nettement le moyen de nous desmeler & desuelopper de oes antraues: si ce n'est que d'auanture nous fussions de ceux dont nous auons dit cy deuant, qu'ils vouldroyent fort qu'il n'y eust point de Dieu, car nous croyons volontiers, & nous persuadons aisement, ce que nous desirons, nous donnons poids & force aux raisons qui nous le persuadent, & affoiblissons

au contraire, tant qu'il nous est possible, celles qui leur sont opposées, d'où vient que tant de gens aujourd'huy prestent volontiers l'oreille aux Docteurs d'Atheïsme, & se laissent facilement persuader à leurs discours. Ce qui est vn fort preiugé contr' eux mesmes, & vn argument de la foiblesse de leur cause, car ce n'est pas de merueille si on croit aisement ce que l'on desire grandement.

Or y a il deux sortes de prouuer vne chose, l'une par raisons & argumens, l'autre par tesmoignages & autorités. Celle cy est la plus courte & la plus aisée, mais aussi quelques-fois plus douteuse & moins certaine: pour la rendre ferme & certaine, il faut mōstrer que celuy qui rend tesmoignage premierement sçait & entend bien ce qu'il dit, & secondement qu'il est

fidele & veritable, qui ne vouldroit & ne ſçauroit tromper ny mentir, & qu'il n'y a aucun ſuieſt de le ſoupçonner ou d'ignorance, ou de fraude & malice, & en ce cas la preuue eſt euidente & certaine. Et de ceſte ſorte de teſmoignage nous dirons quelque choſe à la fin de ce Diſcours.

La diuinité ſe peut prouuer par pluſieurs raiſons, dont nous choiſirons ſeulement quelques vnes des plus communes, ſur leſquelles nous ne nous eſtendrons pas neantmoins fort au long, ains ſeulement autant qu'il ſuffira pour en monſtrer la force.

Or entre les raiſons qui prouuent la diuinité celle cy peut eſtre miſe au premier rang. Ceſt à ſçauoir que ce monde de neceſſité a eu vn commencement, & par conſequent vn auteur (qui la pro-

duit & luy a donné son estre) qui ne peut estre autre que Dieu.

Il y a deux sortes de prouver & demonstrier vne chose par raisons, l'une que les Philosophes appellent, *A priori*, en descendant de la cause aux effets, & demonstrent les effets par leurs causes, l'autre *A posteriori* en remontant des effets à la cause & prouvant la cause par ses effets. Ceste premiere sorte de demonstration ne peut auoir icy de lieu, car il n'y a rien de plus haut, n'y deuant Dieu, par ou on le puisse demonstrier, il ne peut donc estre prouué que par ses effets. Et icy est à remarquer la mesprise d'Epicure qui posoit bien vne diuinité, mais qui n'estoit point la cause de cest Vniuers, n'y ne s'entremesloit de son gouuernement. Car d'ou pouuoit il sçauoir ou recognoistre vne diuinité sinon par

la considération de ce monde comme vn effect d'icelle : vne telle opinion ne luy pouuoit pas venir par reuelation de ceste diuinité, puis que selon luy elle ne se mesle point des affaires des hommes, & que luy mesme n'admettoit point de telles reuelatiōs. D'où il est euidēt que ç'a esté seulement vn artifice de ce Philosophe pour euitier la haine & detestation des hommes, laquelle il eust encouruë s'il eust ouuertement nié toute diuinité. La diuinité donc ne se peut recognoistre & prouuer que par la considération de ses effects, desquels diuerses raisons peuuent estre tirées. Et quant à ceste premiere voicy comment on en peut inferer la diuinité.

Rien ne peut se produire soy mesme: car autrement il seroit deuant que d'estre, ce qui est absurd & im-

& implique contradiction. Il faut donc de nécessité que le monde ou ait esté de tousiours sans aucun commencement, ou bien qu'il ait eu vn commencement; car il n'y a point de milieu entre ces deux, or est il qu'il n'a point esté, n'y peu estre, de tousiours, & sans commencement. Ce qui se pourroit prouuer par diuers moyens; mais nous nous contenterons de deux outtrois; dont le premier est que si le monde estoit eternal, il y auroit non seulement vn nombre, mais plusieurs, & quasi infinis nombres, reellement & actuellement infinis. Ce qui ne peut estre & repugne manifestement à la raison: car il n'y a, ny ne peut y auoir, & ne se peut concevoir aucun nombre tant grand qu'on le puisse faire, ou qu'on se le puisse imaginer, auquel on ne puisse adiouster non

seulement vne vnité, mais tout autre nombre, quel qu'il soit, & pour grand qu'on le puisse concevoir. Et ce qui est encores plus non seulement inimaginable, mais qui surpasse toute absurdité, & implique manifeste contradiction, c'est qu'il y auroit plusieurs nombres réellement & actuellement infinis qui seroyent moindres, ou plus grands, que d'autres pareillement infinis, ce qui est absurd, car à l'infini ne se peut rien adiouster, & tous infinis doiuent estre par cōsequent egaux. Or si ce monde est eternal, le ciel a roulé de toute eternité, & s'il a roulé de tousiours, sans aucun commencement, il y a eu iusques icy vn nombre actuellement infini de reuolutions d'iceluy, pource qu'en remontât de celles d'aujourd'huy en haut on ne trouuera iamais la fin de ces reuolutions, puis qu'elles n'ont aucun commencement.

Ainsi il y aura eu vn nombre infini d'années en ceste eternité, puis qu'il y a eu vn nombre infini de ces reuolutions dont chacune fait vne année, or est il qu'il y a plus de mois que d'années, & plus de iours que de mois, plus d'heures que de iours, & plus de minutes que d'heures; Par ainsi il se trouuera, comme i'ay dit, qu'il y a en ceste eternité diuers nōbres dōt chacun est actuellemēt infini, & neātmoins les vns sont plus grands que les autres; De mesme il y aura eu aussi vn nombre infini d'arbres & de plantes, les vnes succedentes aux autres par ceste perpetuelle vicissitude qui se voit en la nature. Or est il qu'en vn arbre il y a plusieurs grosses branches mais vn seul tronc, il y a plus de petits rameaux que de grosses branches, & finalement plus de feuilles que de rameaux.

Et ainsi le nombre des arbres, des branches, des rameaux & des feuilles, sera actuellement infini, & neantmoins celuy des feuilles sera plus grand que celuy des rameaux & celuy des branches plus grand que des troncs des arbres. Le mesme se peut dire des hommes & de tous autres corps qui ont plusieurs parties, car en l'homme il y a plus de doigts que de bras, & plus de cheveux que de testes.

De plus, en ceste eternité il y aura vne infinité de jours, & vne infinité de nuits, or ou le jour precede la nuit, ou la nuit le jour au regard de chaque hemisphere: lequel qu'on die n'importe, il s'ensuiura tousiours qu'en ceste Eternité il y aura vn nombre actuellement infini, soit de jours ou de nuits, qui sera moindre, ou plus grand qu'un autre nombre infini,

d'une vnté, car il faut de necessité qu'en chasque hemisphere, il y ait ou vn jour plus que de nuicts, ou vne nuict plus que de jours.

A ceste eternité du monde repugne aussi la generation des hommes, & la façon d'icelle telle que nous la voyons. Et ce premierement parce que si le monde est eternal infinis hommes auront precedé ceux qui vivent aujourd'huy, & infinis auront precedé ceux qui ont vescu il y a mille ans, & infinis ceux qui auront vescu il y a dix mille ans, & ainsi cōsequemment à l'infini. Et par ainsi il se trouuera infinis nombres infinis qui neantmoins seront moindres qu'infinis autres, car au nombre infini de ceux qui auront precedé il y a dix mille ans il faudra adiouster ceux qui sont venus depuis dix mille ans.

Secondement en la generation des hommes on remarque cecy, c'est que les hommes qui vivent aujourd'huy, pris non chacun a part mais tous en bloc , ont plus de peres que de grands peres , & plus de grands peres que d'ayeuls , car chaque homme a son propre pere, mais plusieurs petis fils ont vn mesme grand pere , & sous vn mesme bisayeul il y a beaucoup plus de petis fils que d'enfans sous vn mesme pere , tellement qu'en remontant tousiours le nombre des predecesseurs diminue d'autant: par où il est necessaire d'en venir en fin à vn premier qui n'ait point de pere ni d'ancestres , & qui soit l'origine & la source de tous les autres. Ce qui estant il faut de necessité qu'il ait esté vn temps infini sans engendrer, ou bien le monde aura esté vn tēps infini sans aucuns hommes, aupara-
uant la production de ce premier

là. Or ni l'un ni l'autre ne se peut dire ni soutenir avec aucune apparence de raison. Car pourquoy cet homme se seroit il aduisé d'engendrer apres avoir esté vn temps infini sans engendrer? On ne peut pas faire la mesme question & objection contre nous, de Dieu, Pourquoy & comment s'est il aduisé de créer le Monde, apres avoir esté siecles infinis sans créer? Car l'éternité de Dieu n'est pas vn temps successif, comme est la pretenduë eternité du Monde, là ou il y a de necessité vn temps qui precede l'autre, mais celle de Dieu est toute ensemble & indivisible: où il n'y a ni deuant ni derriere, ni premier ni second.

De plus l'histoire des choses passées repugne à ceste eternité du monde: car s'il a esté de tousiours, & qu'il y ait eu des hommes sur la

terre de toute eternité, d'où vient qu'en remontant & parcourant l'histoire des choses passées on ne peut trouver aucun monument ny memoire des choses aduenües, qui passe cinq ou six mille ans : l'experience nous apprend que comme plus vn homme vit, plus il remarque les euenemens de sa vie, ainsi plus les corps & communau-tez durent long-temps, plus aussi ils se polissent & façonnent, & laissent aussi plus de monumens de leurs euenemens. Si donc le monde, & les hommes en iceluy, estoient seulement depuis cinquante mille ans en çà on auroit auourd'huy des monumens de leurs histoires bien clairs & distincts depuis plus de dix mille ans, veu qu'en vn si petit espace de tēps que le monde est selon nostre hypothese, à sçauoir de cinq mille ans & peu

plus, on a des monumens d'histor-
res bien clairs & distincts de puis
plus de deux mille ans.

Ce qui se peut excepter à l'en-
contre de cecy & de la raison pré-
cedente, est qu'il y ait eu des delu-
ges & inondations vniuerselles qui
ont aboli tous les monumens pré-
cedens, & tous les hommes qui
lors estoient, fors vn ou deux, ou
autre petit nombre pour repeu-
pler la terre. Mais pour enfrain-
dre l'argument precedent il faut
qu'ils posent qu'il y ait eu de telles
inondations à l'infini & sans nom-
bre (autrement on reuiendra tous-
jours à vn premier homme, source
& auteur du genre humain, qui
aura esté infinis temps sans engen-
drer) laquelle presupposition est
suiecte à beaucoup d'inconue-
niens, & pourroit estre combatue
de force raisons: outre qu'elle se

dit *Gratis*, & sans fondement de raison ; car c'est beaucoup se permettre que d'une inondation une fois aduenüe , de laquelle on demeure d'accord , en vouloir inferer un nombre infini de semblables, sans aucune autorité, tesmoignage, n'y raison. Joint qu'en posant telles inondations il faut aussi poser une diuinité qui les gouuerne & adresse , autrement comment se fera il fait, que tousiours de chacune d'icelles se soyent sauuez quelques hommes , pour repeupler la terre, car si elles sont fortuites, sans aucune adresse superieure , on ne scauroit imaginer que quelques vnes d'icelles , voire toutes ou la pluspart , n'ayent entierement aboli & raclé de dessus la face de la terre tous les hommes & les bestes sans aucune excepter , veu qu'il conste par l'histoire que de ceste seule,

dont on demeure d'accord , les hommes & les bestes ont esté conseruez par vne singuliere & admirable prouidence de la diuinité, sans laquelle nul homme ne l'eut peu sans toute peine eschapper, beaucoup moins sauuer avec soy toutes sortes de bestes. Car de dire avec Ouide en ses Metamorphoses, tirées des fables Payennes, que les bestes se soyent formées du limon de la terre apres ceste inondation , ce n'est pas parler en Philosophe, n'y en homme de raison, tels que veulent paroistre ces esprits forts qui combattent la Deité. Ioint que si telles inondations fussent frequemment aduenües , il en seroit resté sans doute quelque memoire , & les premiers qui seroyent eschappez en auroyent transmis la memoire à leur descendants , & ceux la à ceux qui les au-

royent suivis , & ainsi de main en main on auroit maintenant des monumens de plusieurs telles inondations, ce qui n'est pas.

Finalement cet argument, que les Athées tirent pour eux, pris de l'éternité du monde, se peut retorquer contr'eux, car si vne chose corporelle, finie, materielle, si grossiere, & si imparfaite, comme est ce monde, peut neantmoins avoir esté & subsisté de toute éternité comme elle est maintenant, combien plus est il selon la droite raison de poser vne Essence spirituelle, immatérielle, & infinie, qui soit éternelle, & qui subsiste de par' soy mesme, ce qui n'est autre chose que la Divinité. Vne telle présupposition s'accorde beaucoup mieux avec la raison que non pas la précédente. Car plus les choses sont immatérielles & spirituelles,

plus aussi ont elles d'actiuité, & par consequent plus de force pour se soutenir & durer dauantage, comme il se void és Ames, Anges & Esprits.

De plus, il se void que ce monde est corruptible selon presque toutes ses parties, lesquelles sont en vne continuelle vicissitude & changement de naistre & de mourir. Ce qui tesmoigne qu'il tend à sa fin, & que finalement il viendra à se dissoudre, car le tout se resent de la nature de ses parties, & ne peut pas estre d'une toute autre nature qu'elles; or comment scauroit auoir esté de tout temps, & sans aucun commencement, ce qui tend à sa fin, & qui y parviendra à la parfin? Car si iusques icy il a bien peu durer vn temps infini, il le peut bien encore à l'aduenir, Que s'il ne le peut à l'aduenir, c'est vn argu-

ment evident qu'il ne l'a peu estre aussi par cy deuant. Si dōc le monde n'a point esté, ni peu estre, de toute eternité, il a eu de necessité vn commencement : & puis que nulle chose ne se peut produire soy mesme, il faut de necessité qu'il ait esté produit par quelqueun qui n'ait point eu de commencement, ains ait esté de toute eternité, ce qui ne peut estre autre que Dieu. Autrement il faudroit dire que cet architecte du monde auroit esté produit par quelqu'autre, & celuy là encore par vn autre, & ainsi a l'infini : ce qui est entierement absurd.

Ceux là n'aduancent pas dauantage la cause des Athées qui posent de toute eternité vn chaos confus, & vne matiere premiere de ce monde, de laquelle il ait esté extraict, car premierement, c'est vne chose inimaginable que ce qui

n'est qu'une pure puissance, sans aucune forme, telle qu'on veut estre la matiere premiere, ait ou puisse auoir d'elle mesme une si grande force, que de subsister par vn temps infini; où qu'une matiere confuse & broüillée, telle qu'on s'imaginer le chaos, puisse auoir semblablement existé par vn temps infini dans une egale confusion; ioint que ceux, qui sont de ceste opinion, comme Platon, ont esté contrains de recognoistre vn ouurier & architecte souuerainement sage & industrieux, qui est la diuinité, lequel ait tiré cest ordre, que nous voyons maintenant au monde, de la confusion de ce chaos, & ait amené ceste puissance de la premiere matiere à son acte, & qui ait formé cest ouvrage si industrieux d'une matiere si confuse, laquelle

sans vne telle vertu fust eternellement demeurée dans sa confusion & desordre ; car pourquoy en fust elle sortie en vn temps ou moment plustost qu'en vn autre, sinon par le moyen d'une vertu superieure, & d'un agent libre, qui l'ait ainsi agencé selon sa volonté, ainsi que d'une masse d'argille, ne se formera iamais aucun vaisseau sans la main artiste & industrieuse du potier.

Car quand a ce nouveau & admirable Philosophe, plus grand Mathematicien que Naturaliste, qui nous veut ramener les atômes de Democrite (se mouuans non dās vn vague & vuide infini, mais dans ie ne sçay quelle quintessence iusques icy incognüe, qui fluë & passe entr'eux comme des menües fueilles & pailles parmi vne haye espesse) qui demande qu'on luy donne

ne vne certaine matiere, & il mon-
strera qu'il en peut naistre & se for-
mer vn Monde, tout tel que celuy
cy. Quand il aura mis au jour
ses demonstrations là dessus, on
verra, si ceste sienne promesse est
aussi bien fondée que celle de son
maistre Archimede, qui deman-
doit qu'on luy donnast vn poinct
fixe & immobile, & il promettoit
de remuer la terre, & tout le Mon-
de de sa place, & le transporter en
vne autre.



CHAP. III.

*Seconde Raison contre l'Atheisme,
tirée de l'ordre & agence-
ment de ce monde.*

C'EST vne difference qui se
voit & remarque par tous en-

C

tre les choses fortuites & casuelles, & celles qui prouiennent de la prudence & raison, c'est qu'és casuelles & fortuites on ne voit ni ordre, ni ajencement, ains vn mellinge confus; és autres on voit de l'ordre & de la disposition, vn ajencement & symmetrie certaine, & de là vne agreable beauté & grace, & plus l'ouurier est industrieux, habile & expert; plus on voit en ses ouvrages d'adresse, d'ordre & disposition, comme on voit pour exemple qu'autres sont les superbes bastimens des grands Roys, & les petites cases des champs & des villages, ou les esbatemens des petits enfans, qui se messent de faire des chasteaux & maisonnettes de petits morceaux de tuile & de bois ramassé.

En la constitution de ce monde & bastiment de ce grand tout, &

du petit monde, qui est l'homme, il faut estre bien aueugle, pour n'y recognoistre pas vn ordre, vn ajencement, vne disposition, des proportions, & symmetries de toutes ses parties, entieremēt admirables, & qui ont rauy, comme hors d'eux mesmes, ceux d'entre les Payens mesmes, qui se sont mis à les considerer, ce qui les a amenéz à reconnoistre vne Diuinité, de laquelle soit procedé cet ordre.

Vn tel ordre & disposition, & ces proportions si esmerueillables, ne peuuent pas estre vn effet ou production, d'un fort aueugle & fortuit, ains faut reconnoistre en cela vne sagesse & prudence & vne industrie, au dessus de toute comprehension, qui ait ainsi ajencé ces choses, car de dire qu'elles ont tousiours esté ainsi sans aucun commencement, & partant n'ont au-

Un auteur, c'est ce que nous auõs
refuté au precedent chapitre; &
de plus c'est-ce qui ne se peut
comprendre n'y imaginer, qu'un
ajencement si admirable, ne pro-
uienne d'aucune cause; & ne soit
point la production de quelque sa-
gesse superieure; Or que peut estre
vne telle sagesse sinon la Diuinité?
car de rapporter cela a vne vertu
Physique brute, & *sui ne scia*, diffuse
& esparse par tout ce grand corps
du monde, ainsi que se sont autre-
fois forgez & imaginez quelques
Philosophes y auoir vne Ame du
monde, a peu pres comme est es
semences la vertu de produire les
plantes, arbres & animaux, c'est vn
abus & manque de droit raisonne-
ment, & petition de principe, car
cette vertu, qui se voit es semences,
ne pourroit pas produire de si ad-
mirables effects en l'ajencement &

symmetrie de toutes les parties des corps, qui en proviennent, si cela n'estoit adressé par vne cause superieure, tres sage & industrieuse, comme ainsi soit, qu'une chose brute & inanimée, ne peut pas estre vn suiet capable d'une si merueilleuse sagesse, & si admirable industrie.

De plus ceste Ame imaginaire du monde, infuse ainsi par tout ce grand corps, fera vn animal (comme l'homme composé de corps & d'ame) ou non. Si elle ne fait pas vn animal, elle n'informe pas ce grand & vaste corps, elle a sa subsistance à part, si elle subsiste à part, voyla par leur concession, & propre confession, vne chose immatérielle, incorporelle, qui est toute sage & toute puissante, puis qu'elle produit tant & de si admirables effects. Et cela qu'est-ce autre cho-

se presque sinon la diuinité , pour laquelle nous combattons, car ceste Ame toute sage & toute puissante aura esté de necessite de toute eternité , & aura fabriqué & ajencé ce monde , comme cause efficiente & separée d'iceluy , puis qu'elle n'en est pas la forme , qui l'informe & anime , comme l'ame fait le corps de l'homme. Or pourquoy poser vne telle cause efficiente toute sage & puissante , qui ait de toute eternité, & sans commencement , fabriqué & ajencé ce monde, & se ietter ainsi dans les absurdités inextricables qui suivent necessairement l'Eternité du monde, que non pas avec nous & avec la verité , poser vne telle cause qui ait fabriqué ce monde de puis vn certain temps seulement , & par là se desueloper de ces entraues & absurdités insolubles.

S'ils disent que ceste Ame du mode informe la matiere d'iceluy, & fait avec elle vn composé naturel, comme l'ame & le corps de l'homme, ce monde sera vn grand & vaste & monstrueux animal, qui sera composé de parties qui ne s'ōt pas organiques (cōme sont les membres & parties du corps humain) qui ayent de la conuenance & quelque proportion avec leur forme, & l'ame qui les anime, ce qui est vne imagination bigearre & extrauagante, indigne non seulement de Philosophes (tels que ces gens là veulent estre creus) mais d'hommes de sens cōmun. Mais de plus, il y a tousiours cecy qui demeure, c'est que selon ceste concessiō & hypothese, voila vn grād & vaste & comme infini animal, eternal, tout puissāt & tout sage, duquel tout ce qui se void & qui est, sont autant d'effets de sa sages-

se & puissance. Or combien s'approche vne telle imagination de ce que nous disons estre la Diuinité? Sinon qu'il est trop plus conuenable à la raison, & à la dignité & majesté de ceste sagesse & puissance, de la poser (comme nous faisons) à part & separée de la matiere, immense & infinie, subsistante d'elle mesme & par elle mesme, que non pas de dire avec eux, qu'elle informe vne si uile & grossiere matiere, comme est celle de ce monde, & de la renfermer dans l'enclos de ce monde, sans estre ni subsister hors d'iceluy. Car cela est la faire finie & bornée au regard de son estéduë. Or si elle est finie & bornée en cet égard, pourquoyne le sera elle aussi au regard de sa durée. Ainsi selon ces gēs là, il faudra en reuenir à ce-cy, que ce monde s'est produit soy mesme ou plustost est sorti du néant sans aucune cause, & cela en va

certain temps, ce qui est vne imagination bien creuse & absurde. Que si ceste sagesse & puissance est infinie au regard de sa durée, estant éternelle (comme ils la posent,) pourquoy ne le sera elle pas au regard de son estenduë? & si elle l'est au regard de son estenduë, elle est & subsiste hors l'estenduë de ce monde, lequel est necessairement fini, ne pouuant y auoir de corps, non plus que de nombre, actuellement infini. Ainsi ils sont contrains d'auouër vne sagesse & puissance immatérielle & incorporelle, infinie en toutes façons, tant au regard de son estenduë que de sa durée, subsistante de par soy mesme de toute éternité, & séparée de toute matiere. Ce qui n'est autre chose sinon ce que nous entendons par la Diuinité.

Et icy se peut recognoistre l'im-

pertinence & absurdité de l'opinion de Democrite, & d'Epicure après luy, qui ont voulu que ce monde ait esté formé par le concours fortuit d'atômes, se remuans à l'adventure dans vn vague infini, & par vn temps de mesme infini, car outre l'absurdité qu'il y a de s'imaginer des petits corps indivisibles, qui ayent neantmoins comme des hameçons par lesquels ils s'accrochent, & lient les vns aux autres, ainsi que ces gens se sont imaginez, & outre qu'il est unimaginable qu'en de si petis corps, tels que ceux la, il se trouue vne infinité de qualités diuerses, lesquelles se voyent & recognoissent és corps composés d'iceux; ou que s'ils sont sans aucune qualité, de leurs concours puissent naistre tant de si diuerses qualités. Il y a ceste autre absurdité toute visible, c'est que

d'un concours si fortuit, & qui n'est adressé par aucune intelligence supérieure, puisse naître & se former un ouvrage si admirable comme est le monde, duquel toutes les parties sont arangées avec un ordre, & une harmonie & symmetrie, qui engloutit la pensée de ceux qui le considerent attentivement, & une si constante durée de cet ordre, en la succession perpetuelle des corps que l'on voit tous les jours se former en la nature : joint que si par ce concours fortuit ce monde a esté ainsi dressé, par le mesme mouvement, il se pourra pareillement dissoudre, & ainsi il nous faudra imaginer dans l'éternité une infinité de mondes formez & dissous successivement les uns aux autres, par ce mouvement & concours fortuit d'atômes : & par là se trouue destruite l'éternité de

ce monde , à laquelle aspirent & pretendent les Athées.



CHAP. I V.

Troisiesme Argument tiré de la naturelle difference qu'il y a entre le vice & la vertu.

COMME és choses Physiques, & œuvres de la Nature, il y a cet ordre & ajencement si beau & admirable , si réglé, certain & constant, duquel il a esté parlé au chapitre precedent, & qui tesmoigne vne industrieuse sagesse qui en est l'auteur, ainsi és choses humaines, és actions di- ie des hommes, & productions de son esprit & volonté, on peut reconnoistre vn ordre admirable, & vne beauté esmerueillable, qui ne peut estre vn effet du

fort , duquel rien ne part que de confus & mal'agencé.

Cet ordre & beauté paroist ou en l'adrêſſe , industrie , ſageſſe , & ſubtilité de l'eſprit humain , & és œuures qui en prouiennent , ou en la droiture de ſes actions & effets de ſa volonté, que l'on appelle vertu Morale , dont l'une & l'autre marque quelque choſe de diuin en l'homme , qui ne peut prouenir d'une cauſe fortuite & aueugle, qui agiſſe ſans connoiſſance : d'où ſe tire vn autre argument contre l'Atheiſme , dont il ſera parlé en ſon rang.

A ceſte vertu & bien moral eſt oppoſé le mal, ou le peché & vice, la difference duquel d'auec la vertu n'eſt pas arbitraire , & qui depende purement de la volonté & libre mouuement de l'homme, qui l'aie voulu ainſi pluſtoſt qu'autre-

ment, car les choses de ceste nature sont muables & se changent aisement ; mais ceste difference du bien & du mal, du vice & de la vertu, est fixe & immuable, & tellement empreinte au cœur de l'homme, qui la reconnoist naturellement, que tous les hommes ensemble ne sçauroyent la changer, & se fait reconnoistre à eux malgré qu'ils en ayent ; car les plus barbares & desesperes, quoy qu'ennemis de la vertu, ne sçauroyent se tenir qu'ils n'en admirent souuent l'excellence, & ne la prisent & estiment ou elle se rencontre, & bien qu'en eux mesmes ils ne reconnoissent pas souuent le vice qui y est, & le mal qu'ils commettent, aucuglez par leurs passions, si est ce qu'ils le reconnoissent bien és autres, & l'y detestent & condamnent, principalement quand il

tourne à leur preiudice & interest. Et comme tous reconnoissent l'excellence & beauté de la vertu, & l'horreur & laideur du vice, aussi tous auoient ils que l'vn est digne de l'amour, loüange, & recommandation des hommes, & d'une recompence conuenable, le vice au contraire digne de la haine & detestation de tous, & d'une juste & condigne punition qui luy est deuë, d'où se tire encore vn autre argument contre l'Atheïsme.

Ceste difference du bien & du mal n'est point vne opinion & fantaisie seulement, mais est interne, réelle, & essentielle, comme es choses de la nature le blanc & le noir, la lumiere & les tenebres. Elle ne vient pas aussi de quelque coûtume, qui l'ait peu à peu establie, car ce qui vient par coûtume gagne & se fortifie peu à peu, & est

plus foible à son commencement qu'à son progrès , & se peut changer par vne contraire vſance, & peu à peu s'abolit & aneantit : ce qui n'eſt pas de ceſte difference du biẽ & du mal, qui à eſté de tout temps forte & viue en tous lieux , voire plus vigoureuſe à son commencement que depuis , à cauſe de la grande corruption des hommes ſuruenüe , qui s'eſt de plus en plus fortifiée. Et ne ſe peut ceſte difference abolir par aucune contraire vſance & coũtume , ains demeure touſiours en ſoy de meſme. Ce ne ſont point auſſi ni les loix des Magiſtrats & Legiſlateurs, ni les preceptes & institutions Morales des Philoſophes , qui ont donné à la vertu ſon eſtre & ſa nature, ils l'ont ſeulement reconnuë & remarquée és actions & déportemens des hommes, telle qu'elle eſt en elle meſme,

mesme, & selon ce qu'ils en ont reconnu ils en ont dressé leurs regles & leurs preceptes, ou establi des loix pour regler la vie des particuliers, & les empescher de se laisser aller au vice, qui luy est contraire. A peu pres comme Aristote n'a pas forgé, & inuenté comme il luy a pleu, les regles & preceptes de bien argumenter, & syllogiser, mais seulement les a remarquez és discours & ratiocinations que tous hommes font naturellement, & sur ces remarques en a dressé les regles & preceptes, que nous en auons en son Organe & Logique, qui ne sont point arbitraires & muables, mais fixes, certains & immuables, fondez sur le droit & naturel raisonnement commun à tous hommes.

Ceste vertu à sa racine & son fondement en la nature de l'hom-

D

me, entant qu'il est raisonnable & doüé de volonté & d'intelligence, qui doit auoir l'empire sur ses affections pour les tenir en bride, & les contenir dans le deuoir : & consiste en vne droite harmonie, iuste proportion & bon accord entre ses facultez, d'où resulte la beauté & l'excellence d'icelle ; qui rauît les plus farouches en admiration ; ainsi qu'és corps & ouurages, soit naturels ou artificiels, leur beauté resulte de la proportion & droit ajencement de toutes leurs parties, & n'est non plus l'vne que l'autre arbitraire ni imaginaire, ains vraye & réelle ; celle de la vertu estant d'autant plus excellente que l'autre ; que les choses spirituelles surpassent les corporelles.

Ceste vertu estant telle ne peut auoir pour cause de son estre vn fort auetugle, ni vne fortuite ren-

contre, qui ne produit rien de réglé & bien ordonné , mais doit auoir vne cause certaine, constante, & invariable, qui ait en soy toutes sortes de vertus en perfection & en vn souuerain degré, qui soit & le patron tres-parfait , & le modele tres - accompli, de toute la vertu humaine, & qui en soit l'auteur & la cause efficiente en la procreation de l'homme : ne pouuant pas partir d'un autre principe, lequel autrement seroit inferieur, & beaucoup moindre que son effet, car il n'y a rien en tout ce que l'homme peut conceuoir en la nature, de plus excellent & diuin que la vraye vertu , par laquelle l'homme est non seulement infiniment releué au dessus des bestes, mais est mesmes comme deifié, & se surpasse soy mesme en quelque façon. Et ne faut point icy po-

fer deux principes avec les Manicheens, l'un du bien & l'autre du mal, un seul estant suffisant, car comme la ligne droite est la regle de foy mesme & de l'oblique: ainsi ce patron & modele de toute vertu & perfection, qui est la diuinité, est la regle de toute vertu humaine, & par elle mesme se connoist son contraire, qui est le vice, qui n'a non plus besoin d'un principe, ou cause efficiente de foy, que les tenebres qui viennent de la priuation & absence de la lumiere. L'esprit de l'homme estant, comme nous le voyons maintenant, si variable & inconstant, ne peut pas estre la regle de ceste vertu si excellente, & si certaine & invariable, comme elle est en elle mesme.

La connoissance aussi si forte & naturelle, que tous hommes ont de ceste difference, qui est entre le

bien & le mal , ne leur vient pas simplement de quelque institution ou tradition baillée de main en main, y ayant plusieurs nations barbares qui n'ont point de telles institutions, lesquelles ne laissent pas neantmoins de reconnoistre & admirer la vertu & detester le vice : plusieurs particuliers aussi ou destituez de telles institutions, ou mesmes imbus & instituez du contraire par mauuaise nourriture , ne laissent pas souuent malgré eux de reconnoistre ceste difference. Or d'où peut prouenir vne telle, si forte, si viue & si constante impression en l'esprit de l'homme , sinon de quelque cause superieure & plus excellente, qui la luy ait engraüée, en luy donnant son estre , laquelle cause ne peut estre autre que la Diuinité, n'y ayant rien qu'elle au dessus de l'homme pour vn tel effect.



CHAP. V.

*Quatrième Argument tiré du des-
ordre qui se voit en l'homme,
& en toute la Nature des cho-
ses, lequel desordre a de nécessité
un commencement & une fin.*

NOUS auons és chapitres pre-
cedens tiré deux raisons con-
tre l'Atheïsme , prises de l'ordre
qui se voit en la Nature , & en
l'homme particulièrement. Nous
en tirerons maintenant vne autre
du desordre qui se voit en l'vne &
en l'autre de ces choses. La vertu
est bien propre à l'homme entant
qu'il est raisonnable, & par elle dif-
fere principalement de la beste,
qui n'en est pas capable , mais elle
ne luy est pas néanmoins naturelle,

& essentielle (autrement l'homme ne pecheroit iamais) ains accidentelle ; de laquelle il s'est départi, témoin la grande corruption de mœurs, & estrange desbordement de vie, qui est au monde, lequel de nécessité a eu quelque commencement, & ne peut pas auoir esté de tousiours, car le desordre est vne perturbation de l'ordre, & vne confusion suruenüe depuis; l'imperfection & le defect ne pouuans pas estre eternels; puisque estre de tousiours & sans aucun commencement, est vne perfection, voire des plus grandes qui se puisse imaginer, & de faict l'experience monstre, que plus l'on va en avant plus la corruption croist, & s'augmente, car elle est auourd'huy beaucoup plus grande, qu'elle n'estoit pas il y a cent ans, & estoit plus grande il y a cent ans, qu'elle n'es-

roit cent autres années auparavant,
ce qu'un Payen a bien reconnu il y
a plus de seize cens ans en ces vers,

*Ætas parentum, peior duis, tulit
Nos nequiores, mox daturos,*

Progeniem vitiosorem.

Et ainsi en remontant, la corruption se trouuera tousiours aller en diminuant tant qu'on vienne a vn premier commencement. Que si elle à commencé en l'homme, l'homme ne peut pas auoir esté de tousiours, & ce monde a eu de nécessité vn commencement : d'où nous auons cy deuant prouué vne Diuinité qui la procréé. Car on ne scauroit estendre si loin, en remontant, le commencement de ceste corruption, que dans l'éternité pretendüe de ce monde il n'y ait eu vn temps infini, qui ait précédé ce premier commencement de corruption. Or si l'homme a

bien peu demeurer vn temps infini sans se corrompre, pourquoy ne l'aura il peu aussi bien encore depuis ce temps auquel on veut qu'il ait premierement commencé ? Ioint que si la corruption a commencé apres vn temps infini d'integrité, on peut iustement demander, si elle a commencé en vn seul homme, ou bien en tous tout à la fois: lequel qu'on die des deux il y a vne euidente absurdité. Car si on dit qu'elle a commencé en vn seul, on peut iustement demander pourquoy en l'vn plustost qu'en l'autre; Et puis si vn seul a commencé, pourquoy les autres ne l'ont ils mis incontinent hors du monde, afin de n'infecter & gaster les autres, cōme auiourd'huy nous voyons tous les iours les magistrats executer à mort les meschans & scelerats. Et si tous ont commen-

cé à la fois apres vn temps infini de perseuerance en l'integrité , c'est vne chose inimaginable, comment cela c'est peu faire : principalement s'il n'y a eu autre directeur de cest Vniuers , que l'ordre fatal de la Nature , comme pretendent les Athées, qui sans doute seroit tous-jours demeuré de mesmes qu'il auoit esté auparauât par vn temps infini , & ne sçauroit on alleguer ni imaginer aucune raison , ni cause d'un tel & si soudain , & si vniuersel changement. Le mesme ne peut pas nous estre obiecté, qui tenons que le monde , & l'homme, ont eu vn commencement, lequel quoy qu'il ait esté crée de Dieu entier & sans vice , n'estoit pas pourrât immuable (n'y ayant rien d'immuable a proprement parler que ce qui est eternal) & partant, étant de son naturel muable, ce n'est pas

de merueille s'il s'est quelque temps apres changé.

Nous auens dit que la corruption va tousiours croissant, & s'augmentant de plus en plus, mais cet accroissement ne peut pas aller à l'infini, tant parce que le mal estant vn defect & vne imperfection, il ne peut pas estre infini, veu qu'estre infini dénote vne perfection, comme pource que si ce mal alloit à l'infini la société des hommes ne pourroit subsister, ains seroit en fin du tout abolie, & le genre humain aneanti par ce mal, les hommes venans en fin à s'entretuër & perdre tous les vns les autres. Ce qui est derechef contre la pretenduë eternité de ce monde, & opinion des Athées qui veulent que ce monde doie durer sans fin, comm' ils estiment qu'il a esté sans commencement. Et comme ainsi soit que ce

monde soit fait pour l'homme, & que toute choses luy seruent, si le genre humain venoit a perir tout a fait, comme nous venons de monstrier qu'il arriueroit si le mal croissoit à l'infini, le reste du monde viendrait de necessité à perir totalement, estant privé de sa principale fin qui est le service, & l'utilité de l'homme.

Il est aisé à ceux qui considerent les œuvres de la nature d'y remarquer vn ordre admirable & vné constante fermeté, & invariable durée en iceluy, mais il est aussi aisé de recognoistre, outre & contre cet ordre, vn desordre manifeste, & comme vne extrauagance ou exorbitance de la nature; car s'il y a vne vicissitude réglée & constante des diuerses saisons de l'année s'entre-suiuant l'vne l'autre, le Printemps apres l'Hyver, & l'Esté

apres le Printemps, on y voit aussi des deffaisonnemens manifestes, des froidures excessiues en Esté, & des chaleurs extraordinaires en Hyuer, vne saison eniamber sur l'autre, vn Hyuer au Printemps, & vn Esté dedans l'Automne. Si les pluyes & les neiges, la glace & les frimats & les rosées ont leurs saisons réglées, pour la production des fruiçts de la terre, & pour fournir à l'homme, & à tous animaux, a chacun sa pasture, on les voit aussi assez souuent confuses & meslées, & de là les sterilités & secheresses, & les humidités extraordinaires, qui gastent le fruiçt & le germe de la terre, & ameinent les famines, & disette de toutes choses : de là aussi les intemperies de l'air, qui causent les pestilences, & diuerses sortes de maladies epidemiques & ordinaires ; de là les foudres & les

orages, les tremblemens de terre, & les horribles inondations, & mille autres desordres, qui se voient tous les iours en la nature.

Or est il necessaire, que tels dereglemens soyent reglez & retenus dans certaines barrieres, autrement qui empescheroit que le desordre n'allast à l'infini & que tout ne retournast en son ancien chaos. Car de dire que ces choses ont leurs causes naturelles d'où elles partent, cela est bien vray, mais ne satisfait pas à la question, & difficulté, car s'il n'y a au dessus de la Nature quelque puissance & sagesse superieure, qui range & modere, & adresse tous ces dereglemens & exorbitances de la Nature, la confusion & le bouleuersement de toute la Nature sera inevitable. Et de fait il n'est pas malaisé de reconnoistre que ces desordres sont re-

gis & gouuernez par vne grande
sagesse, & adressez par vne euiden-
te iustice & bonté manifeste, en
vengeance contre les pechez des
vns, & en beneficence pour le fa-
laire & recompense des autres : &
de vouloir rapporter cette admini-
stration a vn sort & fortune auen-
gle, ou a vne brute fatalité, c'est se
tromper soy mesme à son escient,
& se creuer volōtairement les yeux
pour ne rien voir. Car quelle rai-
son & apparence de rapporter au
sort le Deluge, par exemple, de
Noé, les foudres de Sodome &
Gomorre, la famine septenaire d'E-
gypte, les diuerses playes d'icelle,
les pestilences du temps du Roy
Dauid, la secheresse du temps d'E-
lie, & mille autres semblables, qui
arriuent, & se peuuent remarquer,
tous les iours au monde? Ce des-
ordre donc ainsi réglé aussi bien.

que l'ordre ferme & constant de la Nature, est vn argument d'une Diuinité tres-sage & puissante au dessus d'icelle, qui y a establi cet ordre, & qui range & contient ces desordres dans vne certaine regle, & les adresse sagement, iustement, & misericordieusement, pour le chastiment des vns & la benediction des autres.



CHAP. V I.

Raison cinquieme, tirée d'une Providence qui conduit les choses humaines.

NOUS auons és chapitres precedens tiré deux Argumens pour la Diuinité, de l'ordre & du desordre qui se remarque en la Nature de ce grand monde, le
mesme.

meſme ſe peut faire de l'ordre & deſordre qui ſe peut voir dans le petit monde qui eſt l'homme, lequel nous ne conſiderõs pas maintenant comme vn corps Phyſique, mais entant qu'il eſt moral & raiſonnable, ſelon lequel égard on peut remarquer en luy de l'ordre & du deſordre, mais réglé pourtant, & de l'vn & de l'autre ſe tire vn argument pour la Diuinité.

Et icy eſt premierement à conſiderer, qu'és hommes, quoy que tous d'vne meſme nature, ſe void neantmoins vne diuerſité admirable, & preſque infinie, non ſeulement de faces & conformations de corps, mais auſſi principalement de mœurs & humeurs, de façons de viure & de langage, & vne diſtinction par familles, corps & communautés, Eſtats & Republiques, Royaumes, Empires & Monar-

E

chies diuerſes , toutes leſquelles diſtinctiōns & varietez ne ſe voyent point és autres animaux d'une meſme eſpece. Ceſte varieté & diſtinction ſi merueilleuſe, ne peut prouenir que d'une infinie ſageſſe qui eſt au deſſus de l'homme , & qui a cauſé toutes ces diuerſités en une ſi grande vniformité de Nature, veu meſmement l'ordre , l'ajencement, & la diſpoſition ſinguliere qui ſe peut voir en toutes ces varietés. Car de recourir icy pour cela au ſort & au hazard , qui ait ainſi fortuitement arrangé toutes ces choſes, c'eſt vn volontaire auenglement , l'ordre & la diſpoſition ne pouuant pas prouenir de ce qui n'en a point, & qui a vray dire n'eſt qu'une chimere, & n'a point en ſoy de vertu ou efficace a agir, ny produire rien.

Et ſurtout eſt à conſiderer entre

ces varietés celle du langage , qui est si grande en des personnes qui tous ont vn mesme vsage de raison, laquelle se demonstre par la parole , & tous mesmes organes de la voix , d'où selon toute raison deuroit en tous aussi naistre vn mesme langage , tesmoin de mesmes conceptions , comme il se void és autres animaux, que tous ceux qui sont d'une mesme espece ont vne mesme voix, par laquelle ils expriment leurs passions & les mouuemens de leurs affections.

Car de rapporter cela au Franc-arbitre & libre mouuement de la volonté des hommes qui l'ayent ainsi voulu, & forgé d'eux mesmes tant de diuers idiomes & si differens, il n'y a point d'apparence: car quelle fin raisonnable se pouroyent ils proposer en vn tel dessein, veu mesmement que ceste

diuersité de langages empesche grandement la mutuelle communication & commerce desvns avec les autres, par ou la société de tout le genre humain, à laquelle la Nature mesme nous a formés & nous encline fortement, est merueilleusement entrerompue & empeschée: si bien qu'il n'y a nulle raison & apparence que les hommes ayent voulu consentir d'eux mesmes, à vne telle diuersité si preiudiciable & contraire à la fin à laquelle de leur Nature ils tendent tous, qui est la société & communication mutuelle par ensemble.

Ioint que ceste diuersité ou à esté de tousiours par vn temps infini, si le monde n'a point de commencement, ou bien elle a eu quelque commencement, de dire quelle n'a point de commencement, il n'y a point de raison, cela repugnant &

estant par trop esloigné de l'uniformité d'une mesme Nature qui est en tous hommes; de dire aussi quelle a eu quelque commencement il n'y a point d'apparence, car pourquoy les hommes apres auoir parlé par vn temps infini tous vn mesme langage seroyent ils venus à coup à le changer & diuersifier si estrangement, sans raison ny necessité, & contre la fin à laquelle ils tendent tous naturellement.

Il est donc necessaire de reconnoistre icy vne vertu & sagesse superieure, qui pour certaines raisons à elle connuës, outre & contre le dessein & intention des hommes, ait introduit en eux ceste admirable varieté d'idiomes, chacun desquels est tel qu'il a sa beauté & sa grace, & son elegance particuliere & singuliere, laquelle les hommes ne sçauroyent auoir pre-

ueüe n'y preconceüe en leurs esprits en forgeant ces idiomes pour l'introduire en iceux, cela surpassant de bien loin toute la sapience ordinaire, qui s'apperçoit és hommes, dont le plus sage & le plus habile d'entr'eux ne sçauroit, avec toute son industrie & adresse, forger vn langage tout entier auquel se rencontre la grace, l'elegance, la beauté qui est en chascun de ceux qui sont en vsage au monde: ce qui est vn argument manifeste d'vne sagesse plus qu'humaine, & vraiment diuine, qui a ainsi sagement dispensé en chascun de ces idiomes tous les mots qui le constituent; avec toute la beauté & elegance qui y reluit.

La distinction des hommes en corps, communautés, Estats, Republiques & Royaumes, Empires & Monarchies, nous amene necessai-

remēt à la reconnoissance de ceste
mesme Prouidence & Diuinité, &
combat de mesme l'eternité du
monde. C'est vne chose que la Na-
ture enseigne, à sçauoir que les Pe-
res commandent, gouernent, &
ayent le soinde leurs enfans, & les
grands Peres de leurs petits fils, &
ainsi consequemment que les an-
cestres ayent & prennent le soin de
tous leurs descendans, & si cet or-
dre se gardoit vniformement & in-
uariablement entre les hommes, ce-
la se pourroit aucunement rappor-
ter au mouuement réglé de la Na-
ture, & n'y auroit rien d'extraordi-
naire & étrange. mais il en va tout
autrement au gouuernement des
hommes, car ceux qui comman-
dent & qui tiennent les resnes du
gouuernement, ne sont pas le plus
souuent, n'y presque iamais, les
grands peres ou predecesseurs &

ancestres de ceux à qui ils commandent , & ne leur sont le plus souvent liés par aucune proche affinité ou consanguinité , c'est pourquoy il faut reconnoître en cela quelque autre chose que ce droit de Nature, qui leur ait donné ce pouuoir & autorité de commandement; & qui soit fort extraordinaire, pour se faire ainsi obeir & craindre de ceux qui naturellement ne leur sont point subiects , comme n'estans pas descendus d'eux.

Et ne faut point recourir icy avec quelques vns à vne seruitude volontaire, & purement arbitraire, sans aucun fondement de raison, qui ait ainsi fortuitement assuietti les vns aux autres , ains faut reconnoître en eccy vne puissance & vertu superieure à tous, & qui a releué les vns au dessus des autres de

dons & facultés propres au gouvernement, qui les ont fait admirer, & respecter des autres, qui pour cela se sont assuiettis à eux. Et de fait il se void par l'experience & les monumens des histoires, que les premiers auteurs des Royaumes, Empires & Monarchies ont esté gens signalés & releués en vertus heroïques & extraordinaires au dessus des autres, par ou ils se sont acquis l'admiration, le respect & obeissance des autres, qui en cela leur estoient inferieurs.

Ainsi est il dit de Nimrod, le premier fondateur de la premiere Monarchie du monde, qu'il estoit *vn grand & puissant veneur deuant l'Eternel*, c'est à dire, qu'il estoit en effect vn homme illustre & glorieux par dessus les autres, par plusieurs diuerses belles qualités & propres au gouvernement, dont il surpas-

soit les autres, ainsi estoit Cyrus auteur de la Monarchie des Perses, illustre & celebre és histoires, ainsi Alexandre le Grand fondateur de celle des Grecs, ainsi Cæsar & Auguste de la Monarchie des Romains. Et c'est ainsi que l'Escriture remarque, de tous les Juges des enfans d'Israël qui en ont entrepris le gouvernement, que Dieu suscita l'esprit d'un tel & d'un tel, & de Saül mesme leur premier Roy, que Dieu *changea son cœur en un autre homme*, pour donner à entendre qu'ils ont esté reuestus de vertus excellentes, heroïques & extraordinaires par dessus les autres hommes, pour leur pouuoir commander, & qu'une Diuinité à presidé sur tout cela pour les adresser & exciter. Et ainsi en est il par Analogie de tous autres qui ont les premiers entrepris en quelque

Nation , peuple ou communauté ,
le gouvernement d'icelle.

De plus y ayant au monde tant
de tels corps diuers , & si diuerse-
ment regis & gouvernés , justement
neantmoins & avec ordre , il reluit
en ceste multitude & diuersité vne
merueilleuse sagesse qui ne peut
prouenir de la prudence & sagesse
de chasque particulier de ceux qui
gouvernent , laquelle ne se peut e-
stendre que sur ses suiets , & par-
tant de nécessité vient de quelque
sagesse superieure qui est au dessus
de tous ces corps & communautés ,
& qui les a ainsi adressés & rangés
si sagement. Ceste mesme vertu
ou Diuinité est nécessaire pour dō-
ner à chascun de ces corps leur
estendue & leur durée reglée &
certaine , en la constitution & defi-
nition desquelles paroist ceste mes-
me sapience. Aussi voyons nous

que Moyse, Deut. 32. 8. rapporte à Dieu les habitations diuerses des peuples & nations sur la face de la terre, *Quand Dieu partageoit les Nations, & separoit les enfans des hommes les vns d'avec les autres, lors il establit les bornes des peuples selon le nombre des enfans d'Israel.*

Au reste vne telle diuersité d'Estats,, Royaumes & Empires, ne peut pas auoir esté de tousiours sans aucun commencement, pour les mesmes raisons par lesquelles nous auons au commencement combattu & renuersé l'éternité du monde, & si elles ont eu quelque commencement aussi ont eu les hommes auxquels ils commandét, & le monde par consequent, qui est tout fait pour l'homme, & si le monde a eu commencement il a vn auteur, qui est la Diuinité.

La distinction des possessions &

heritages , qui est entre les hommes , nous amene semblablement à la reconnoissance d'une diuinité, & combat de mesme l'eternité du monde. Les hommes ne sont pas comme les bestes , qui ne possèdent rien , ains vivent de ce qu'ils rencontrent, & que la terre produit d'elle mesme, car les hommes possèdent chascun quelque chose de propre, qui n'appartient point à vn autre , soyent meubles ou immeubles, terres, champs, ou possessions.

Les corps & communautés de mesmes , ont leurs propres limites distincts de ceux des autres corps & communautés: ainsi les Estats, Republiques, Empires, Royaumes , & Monarchies ont chascun leurs bornes & limites , dans lesquelles s'ont contenuës leurs possessions, ce qui monstre manifestement , que les hommes ont diuisé

& partagé la terre entr'eux, puis qu'ils en ont & possèdent chacun d'eux vne part, que s'ils l'ont partagée, vn temps donc a esté qu'elle ne l'estoit point, que si les hommes ont commencé en vn certain tēps de partager la terre, il s'ensuit qu'ils n'ont pas esté de tout temps sur la terre, car auoyent ils esté vn temps infini sur la terre sans la partager? que s'ils l'auoyent esté, pourquoy depuis se seroyent ils aduisé de la partager? Que s'ils ont commencé à partager la terre, il faut qu'eux aussi ayent eu vn commencement de leur estre, & vne premiere souche d'iceluy; ne se pouuant pas faire que par vn temps infini ils ayent esté sur la face de la terre, en pareil nombre qu'aujourd'huy, comme il a esté monstre cy deuant. Ainsi de ce partage de la terre il est euident que le monde

n'est pas eternal, & partant qu'ayāt vn commencement il a aussi vn auteur qui est Dieu.

Or en ce partage des terres, biens & possessions de ce monde entre les hommes, il est nécessaire qu'il interuienne & preside vne Prouidence, sage, iuste & puissante, pour dispenser à chascun sa part, autrement il n'y pourroit auoir en vn tel partage qu'une merueilleuse & horrible confusion & desordre, qui se destruiroit soy mesme: car la cupidité des hommes estant infinie & sans mesure ni borne, chascun tireroit tant qu'il pourroit à soy tout ce qu'il luy seroit possible, au preiudice de qui que ce soit, sinon qu'il y ait quelqu'un qui mette comme le holà, & pose des bornes, telles qu'il iuge estre conuenables, aux possessions d'un chascun.

Et de fait qui considerera atten-

tiuement, comment la terre est partagée en diuerſes pieces, ſelon les diuerſes nations, peuples, langues, Empires, & Royaumes, & comment en chaſque Eſtat ou Republique, chaſques corps & communautés ont leurs portions affectées, & en chaſque communauté les particuliers, chaſcun ſes poſſeſſions & héritages, on y trouuera ſans doute vne merueilleuſe harmonie, & admirable diſpoſition, qui ne peut prouenir du ſort & aduanture, mais procede indubitablement d'une ſageſſe ſupérieure, qui a ainſi diſpenſé & diſpoſé ces choſes, & donné à chaſcun ce qu'elle a jugé eſtre conuenable, comme vn pere qui allant mourir, pour éuiter les procès & querelles entre ſes enfans les partage ſagement & juſtement.

Ceſte diſtinction d'héritages & poſſeſſions,

possessions , ne vient point de la fantaisie & simple volonté de l'homme (voyez cy dessus le passage cité de Moyse pour cela) ains est fondée en raison & justice , procede, di-ie, de la raison, par laquelle l'homme surpasse les bestes, & est le fondement de l'exercice de toutes les vertus qui rendent l'homme si admirable & excellent par dessus les bestes, car sans vne telle distinction du *tien* & du *mien* , il n'y pourroit auoir entre les hommes aucun exercice de veru. La terre d'elle mesme produit & fournit à tous les animaux, excepté l'homme, ce qui leur est necessaire pour les entretenir en vie, c'est pourquoy ils n'ont rien de propre , mais viuent en commun de ce qu'ils rencontrent, mais quand à l'homme il faut que pour se fournir des choses necessaires il laboure & cultiue la ter-

re, & y cherche en diuerses façons, ce qui luy est vtile & necessaire, & a pour cela la raison qui l'instruit & adresse en ses ouurages. Or est il iuste & raisonnable que chascun jouïsse du fruit de son labeur, & possede ce qui luy en reuient.

Adioustés à cela que l'homme vient nud au monde, & a besoin d'habits pour se couvrir, tant pour l'honnesteté que pour les injures du Ciel, à raison de quoy il a aussi besoin de maison pour se retirer, & de diuers vrensilés pour les necessités de ceste vie, ce qui l'oblige à plusieurs manufactures & ouurages, dont & la possession & la disposition doit estre propre à ceux qui les ont faits.

De plus l'homme en cecy differe des bestes, qu'il ne doit pas suiure sa conuoitise à l'abandon, sans regle ny mesure, mais doit estre lié

à vne seule femme, par vn lien indissoluble, ce que la Nature à enseigné à tous peuples, & nations, mesme les plus farouches & barbares, qui toutes practiquēt le mariage, comme vn enseignement de la nature & raison, en suite duquel l'education & nourriture des enfans, qui en prouiennent, doit estre faite par les Peres & Meres plûtoſt & plus raisonnablement que par aucuns autres.

De tout ce que dessus il est euident que la distinction du *mien* & du *tien*, & de la possession des biens & heritages, est d'un droit naturel & immuable fondé en raison, droit, & justice, & non vne chose arbitraire & qui depēde de la fantaisie des hommes, qui l'ayent ainsi voulu, d'où paroist l'impertinence de Platon, qui vouloit en sa Republique introduire vne communauté

de routes choses, mesmes des femmes & des enfans , car outre qu'en cest estat de peché , auquel est l'homme maintenant, elle est impossible & absurde , & ameneroit vne horrible confusion dans la société des hommes : ie dy que quãd mesme il ny auroit point de peché en l'homme , & qu'il seroit en sa premiere intégrité , elle ne pourroit raisonnablement auoir lieu pour les raisons cy dessus.

Or sur ceste distinction du *mien* & du *rien* , qui est & doit estre entre les hommes , & sans laquelle leur société ne pourroit subsister , est fondée l'exercice de toutes les vertus de justice, tempérance, vérité, fidelité, magnanimité & libéralité, &c. ce qu'estant ainsi il faut de nécessité reconnoistre vne providence, & sagesse infinie, qui a donné à l'homme ceste raison , & fon-

dement de ceste distinction du *mien* & du *tien*, & en suite de toutes les vertus morales, que tous reconnoissent estre ce qu'il y a de plus beau, admirable, & excellent, en tout le monde, & qui par consequent ne peut point auoir pour auteur ou le fort & hazard, ou vne chose brute, comme est de necessité l'ordre fatal de la nature, s'il n'est regi & conduit par vne sapience superieure.

Si l'ordre qui se voit és actions des hommes, & au reglement de leur Police, est vn argument pour nous faire reconnoistre vne prouidence qui preside dessus, & les adresse, comme il a esté monstré cy dessus, le desordre qui y est tout euident, nous en fournit vn autre, non moins clair & fort, pour démonstrer la mesme prouidence, qui s'employe tant a reprimer qu'à ad-

dresser ce desordre. Or comme l'ordre esdites actions consiste és vertus & en l'exercice d'icelles; le desordre a l'opposite, consiste és vices & crimes opposés à la vertu, & comme il à esté remarqué cy deuant, que s'il n'y auoit vne Prouidence pour contemr & reserrer dans certaines bornes les desordres qui se voyent en la Nature, & és effects purement naturels, toute ceste machine iroit en confusio, & retourneroit en son premier chaos, aussi faut il recōnoistre que le desordre en la vie & actions des hommes est si grand & enorme, que s'il n'estoit retenu & reserré par la Prouidence, la societé des hommes ne pourroit subsister & ne seroit qu'un pur brigandage, chacun taschant, tant qu'il pourroit, à assouuir ses conuoitises au preiudice de qui que ce soit, & par tous

les moyens dont il se pourroit ad-
uifer.

Ce desordre est reprimé en deux
sortes; premierement par les Loix
& reiglemens Politiques, l'autho-
rité & puissance des Magistrats,
tant inferieurs que souuerains, &
de plus, outre cela, par vn secret
& imperceptible mouuement de
la prouidence. Et en cest establis-
sment de Loix & Polices humai-
nes, il est necessaire de reconnoi-
stre vne Prouidence qui les ad-
resse, & leur donne force & ver-
tu dans les esprits des hommes, car
autrement qui est-ce qui s'y vou-
droit assuiettir en ceste corruption
d'humeurs & de mœurs, ausquels
ces reiglemens sont contraires.

On exceptera peut estre que la
necessité à amené & obligé les
hōmes a faire de telles Loix, & a s'y
sousmettre, pour ce qu'autremēt la

société des hommes ne pourroit subsister, & qu'on s'entre-mangeroit & s'entre-tueroit-on les vns les autres: Il est bien vray que ceste considération à esté vn puissant motif à cela, mais ce n'est pas cela seul pourtant qui a causé l'establissement des loix & polices au monde. Car entre icelles il y en a qui regardent non seulement la seureté nécessaire pour la société & communication, comme sont les loix contre le meurtre, le larcin, & le parjure ou faux tesmoignages, mais il y en a aussi qui regardent & concernent l'honnesteté, & civilité, & la temperance conuenable à l'homme entant qu'il est raisonnable, & touchant la pieté enuers la Divinité, & la charité & humanité des vns enuers les autres: comme sont celles touchant l'honneur deu aux Peres & Meres par les enfans,

cōtre les adulteres, & autres excès, & infametés de ceste nature, & touchât la Religion deuë à la diuinité, & l'exercice de la charité & humanité enuers ses semblables, ce qui tesmoigne qu'il y a autre chose que ceste necessité cy dessus obiectee, qui a porté les hommes à telles loix, à sçauoir, vne Diuinité, patron & exemplaire de toutes les vertus, & qui à formé l'homme à son image & semblance, en le doüant de raison pour les suiure & imiter.

Ioint que si ceste seule necessité auoit porté les hommes à cela, ils auroient eux mesmes, par vn commun consentement & aduis, dressé ces loix, & les Magistrats pour la garde d'icelles, avec la pleine & souueraine puissance qu'ils se seroient reserüée d'y changer, adiouster, ou retrancher, & de priuilegier

qui bon leur sembleroit à l'encontre, ainsi qu'il se fait es Républiques populaires. Mais bien qu'il y ait eu autres fois, & qu'il y ait encores aujourd'huy quelques semblables Républiques, si est-ce qu'il y a tousiours eu, & y a encores aujourd'huy beaucoup plus de corps & de communautés qui se gouvernent Monarchiquement, & dont les loix n'ont pas esté dressées peu à peu selon les occasions, par les voix & suffrages du peuple, comme à Rome, ou Athenes, mais par quelque sage Legislateur, qui les ayant dressées, ont esté puis apres receuës pour leur manifeste justice & equité.

Et le plus ancien Legislateur de tous, dont il y ait aucuns monumens en l'histoire, est Moÿse, manifestement suscité de Dieu pour donner Loy à son peuple, & depuis

lequel, & à son imitation, ont esté en plusieurs endroits du monde suscitez diuers sages Legislateurs, pour donner loix aux corps & communautés dont ils estoient membres, ce qui montre que ce n'est pas la seule necessité qui a amené les hommes à dresser les Loix, & à establir les Magistrats, mais qu'une sage prouidēce supérieure est interuenue, & a excité ces Legislateurs, & les a conduits & adressés pour cet establissement, & qui s'est serui de la consideration de ceste necessité des Loix pour y faire volontairement sousmettre les peuples. Et qui a aussi suscitē par tout, en chaque estat, quelque vn releué au dessus des autres par quelques singulieres vertus, dont on le reconnoissoit doué, pour entreprendre le gouuernement, & la garde, & conseruation des Loix, & duquel mes-

me la volonté au commencement seruoit de reigle & de loy; & cela afin que les hommes eussent en luy vne image de ceste souueraine sapience & puissance qui conduit & adresse tout ce monde.

Ceste prouidence qui se manifeste ainsi en la repression du mal & desordre, par le moyen des loix & Magistrats tant souuerains que subalternes, qu'il a establis pour la conseruation de la societé des hommes, se descouure aussi es secrets mouuemens d'icelle, qui retiennent les hommes en leur deuoir, & paroist encores plus en ce que plusieurs particuliers transportés de leur mauuaises passions, & passans par dessus la crainte des loix, les violent a main ouuerte, & les peuples mesmes souuent s'ellent contre leur souuerains Magistrats, pour les desposseder & de-

poser de leur autorité.

Car puisque la crainte seule des loix & des magistrats n'est pas bastée pour reprimer la corruption des hommes & leur impetuosité au mal, comme il paroist par tels exemples & euenemens ; il faut bien dire & reconnoistre qu'il y a quelque puissance plus forte que tout cela, & qui est au dessus de toutes ces puissances, laquelle bride secretement & refrene au dedans ces passions, & vehementes inclinations de l'homme au mal ; autrement & sans ce frein, se laissant tous aller a leur impetuosité, ils bouleuerteroient tout, & renuerseroient entierement la societé des hommes. Car pourquoy tous ne viendroient ils a commettre les mesmes excès & enormités que quelques vns cōmettent, sans ce frein secret qui les retient au dedans & pourquoy tou-

tes les communautés ensemble ne se soufleueroient elles contre leur Magistrats & Gouverneurs , ainsi comme il arriue a quelques vns de ce faire , sans ce mesme frein qui les retient ?

Que si tous se laissoient ainsi échapper , il est euident que la société ne pourroit aucunement subsister : il faut donc reconnoistre de là , vne Prouidence qui reprime ceste impetuosité de l'homme au mal , & l'empesche d'exécuter tout ce qu'il voudroit bien , & cela afin de conseruer la société & communication par entr'eux , & estre glorifié en la reconnoissance qu'ils en doiuent faire.

Si la prouidence se demonstre à reprimer le mal , a ce qu'il ne croisse a l'infini , elle ne paroist pas moins a l'adresser & conuertir en bien , & à tirer l'ordre du desordre , & la

lumiere des tenebres. L'ordre des actions humaines paroist en la justice & equité d'icelles, le desordre en l'injustice. Orest il euident combien grand desordre il y a en toutes les actions & comportements des hommes, veu l'injustice & iniquité manifeste qui s'y voit à l'œil, mais en ce desordre neantmoins, & confusion horrible, on peut apercevoir vn ordre merueilleux, qui paroist és euenemens de justice, de bonté, de verité, qui se voyent dans ceste confusion. Car qui ne voit pour exemple, de l'injustice des freres de Ioseph le vendans pour estre mené en Egypte, sortir vn effect de bonté merueilleuse en la conseruation de la famille de Iacob pendant la famine, & en l'expedition de Nabuchodonosor contre les Iuifs & Ierusalem, procedant d'vne ambition

demefurée de cet hōme , vn effect de la justice de Dieu au chastiment des pechés de ce peuple, & finalement de l'injustice & iniquité des Juifs & Sacrificateurs, à l'encontre de nostre Seigneur, sortir vn merueilleux effect de bonté, qui est le salut du genre humain?

Il seroit long de remarquer & coter tous les exemples semblables, esquels la justice & vengeance de Dieu contre les pechés des hommes, ou sa bonté, & sa grace envers les autres, se desploye par le miniftre des hommes meschans, contre leur dessein & intention, qui ne songēt à rien moins qu'à cela; ce qui est vn evident tesmoignage d'une sage & puissante providence, qui est au dessus de tous les conseils des hommes, & qui flechit & encline leur cœurs là ou il luy plaist, & adresse sagement leurs
leurs

leurs pensées & leurs mains, pour exécuter, sans y penser, sa volonté, bonne, sage, juste, & sainte. Car de rapporter au hazard, & a l'auanture, ces euenemens esquels paroist vne telle sagesse, justice, vérité & bonté, ce seroit comme qui attribueroit a vn aueugle vn tableau ou reluiroient les plus beaux & admirables traits de la peinture ou de l'écriture, & faut estre plus aueugle que la fortune mesme pour le croire & en penser ainsi.

Ceste mesme prouidence ne paroist pas moindre és effets, & és euenemens fortuits qui arriuent tous les iours au monde, esquels paroissent aussi mesmes effets de iustice, bonté, & vérité, ce qui ne se pourroit, sans l'adresse d'une Prouidence qui conduit ces euenemens, & les fait reüssir à la fin quelle s'est proposée, & ceux qui pren-

nent occasion de ces confusions & desordres qui se voyentés actions des hommes, de nier la Prouidence, & estimer que tout va à l'auanture, & ne reconnoissent point parmi ces confusions l'ordre qui s'y peut apperceuoir, ressemblent proprement a des petits enfans, qui n'entendans pas le ieu des eschets, & voyans ioïer deux excellés maistres en cest art, iugeroiët à voir les pieces meslées sur le tablier, qu'il n'y auroit que du desordre & de la confusion, pource qu'ils n'entendent pas les rapports des pieces les vnes aux autres, & la raison de la situation de chacune d'icelles : & comme l'ignorance de ces enfans, ne fait pas que les pieces ne soient disposées par vne singuliere prudence, aussi cé que telles gens ne veulent pas reconnoistre les admirables effects de iustice, de bonté,

sagesse, & verité de Dieu, qui paroissent dans la confusion & desordre des actions humaines, ne fait pas que pourtant elles ne soient conduites, & adressées, par vne admirable, & imperceptible sagesse.



CHAP. VII.

Mesprise & beueuë puerile d'Epicure, qui pose vne Divinité, & nie neantmoins la Providence.

LEs disciples d'aujourd'huy d'Epicure ne se soucieront pas beaucoup d'accorder & auouer vn Dieu, pour veu qu'il ne se meslast point des affaires de ce monde, car ce qui les meine en cecy, est la crainte qu'ils ont d'estre mal

traictés de ceste diuinité si elle préd
soin & connoissance de leurs affai-
res. Mais pource qu'ils voyent bien
la coherence & liaison insoluble
de ces deux choses ensemble, que
s'il y a vn Dieu, il prend sans doute
connoissance des affaires du mon-
de, & au reciproque, s'il y a vne
Prouidence qui conduit & gou-
uerne ce monde, ceste Prouiden-
ce là est vn Dieu Tout-puissant,
tout bon, tout iuste, & tout sage: &
ne s'osans rien promettre de bon
de ceste Diuinité, ils quittent icy
leur Maistre, & nient détrouffe-
ment l'vn & l'autre. Et bien qu'à
cette occasion il semble superflu
de s'estendre icy à refuter l'opinion
d'Epicure posant la Diuinité, mais
sans Prouidence, puis que ses Dis-
ciples ne le suyuent pas aujour-
d'huy en cela, neantmoins il ne se-
ra pas hors de propos de monstrier

en cecy la puerile mesprise de leur Maistre , afin qu'on voye qu'ils n'ont pas grande raison de suiure au reste , vn qui choppe en cecy si lourdement.

On peut donc icy demander iustement à Epicure , Pourquoy s'il y a vn Dieu , il ne prend point connoissance des affaires de ce monde ? Est-ce que ce soit vne chose trop basse , abiecte , & indigne de sa grandeur & majesté , ou est-ce que ce soit chose qu'il ne puisse , ou qu'il ne vueille faire , pource que cela luy troubleroit son repos & sa tranquillité ? Il n'y a point de raison n'y à l'vn n'y à l'autre. Et quant au premier , S'il n'y auoit en ce monde aucun ordre , mais seulement vne totale confusion , meslinge & desordre ; certes il ne seroit pas raisonnable d'attribuer à Dieu , & à sa conduite , ce desordre & confusion,

mais ce monde, tant le grand que le petit, estant (comme nous auons monstre cy dessus) arrangé avec vn ordre si beau & vne symmetrie si admirable, qui tesmoigne, & ne peut partir que d'une Sageſſe tout à fait ineffable, est-ce vne chose indigne de la grandeur, sageſſe & toute puissance de Dieu, d'auoir ainsi admirablement adiuſté & compassé toutes ces choses, & de les entretenir & conseruer perpetuellement & constamment en ce mesme ordre? A quoi connoist-on l'excellence d'un ouurier sinon à la beauté & grandeur de ses ouurages? Les œuvres donc de la Création & de la Prouidence estans (comme elles sont) si grandes & si admirables, sont-elles indignes de la grandeur & sageſſe de Dieu? Et que pouuons nous conceuoir de plus grand, de plus admirable, &

par consequent de plus digne de luy?

Certes les œuvres de la Redemption sont encore trop plus admirables, & pleines d'une Sagesse, Bonté & Puissance plus releuée, mais cela ne fait pas pourtant que celles de la Creation & de la Prouidence ne soyent bien dignes de luy, veu mesmement qu'elles sont le fondement de celles de la Redemption, parce qu'elles en sont le suiet, car l'homme ne seroit pas sauué & racheté, s'il n'auoit premierement esté créé, & s'il n'estoit conduit & adressé de Dieu en ce monde.

Et ne faut point icy obiecter que la terre & la boue, les pierres, & mille excremens de la mer & de la terre, sont vne matière trop vile & infecte pour estre maniée de mains si pures que celles de Dieu, & pour

estre vne production de sa Puissance si releuée & glorieuse. Car premierement n'y a il point au monde d'autre matiere plus noble & pure & nette que celle là ? Les Cieux & ces admirables flambeaux qui y reluisent, leurs vertus & leurs influences, sont ce choses trop basses, viles & abiectes pour estre maniées, conduites & regies par luy, ou pour estre produites par luy ? Que ces gens là donc nous trouuēt & monstrent quelque matiere plus releuée, plus noble, plus illustre & lumineuse.

Et quant à ces choses basses qu'ils obiectent, il seroit voirement indigne de la grande majesté & pureté de Dieu, qu'elles fussent tirées & extraites de son Essence, ou qu'elles en fissent partie, aussi n'en sont elles pas extraites (ains du rien & du neant, par la Toute-puissan-

ce) ni n'en font aucune partie. Et si Dieu auoit vn corps, des doigts & des mains cōme nous, on pourroit raisonnablement douter, qu'il luy fust conuenable de manier de ses sacrées & tres-pures mains vne matiere si vile & abiecte, n'estant pas mesme seant à la majesté d'un Roy de manier & remuer de ses mains, la terre & la bouë comme fait vn potier son argille, ou vn valet le fumier d'une estable. Mais estant, comme il est, incorporel & tout esprit, son Essence n'est en rien souillée de ces choses, beaucoup moins que le soleil & ses rayons des fumiers & charognes sur lesquelles ils s'espandēt & agissent, moins encore que l'ame n'est souillée en son Essence de ce corps qu'elle anime, ny de tant de parties & excremens d'iceluy qu'elle meut & agite par son actiō & vertu.

Mais ie demande, la vertu est ce vne chose trop vile & abiecte & indigne que Dieu y regarde, & en prenne soin, pour la salarier & remunerer? Ains, qui a t'il de plus noble & de plus approchant de la diuinité? En quoy l'homme ressemblé t'il mieux à Dieu qu'en viuant saintemēt & vertueusement? Estimerōs nous chose indigne de Dieu, qu'il aime, cherisse, & recompense la vertu, & les hommes vertueux, & par consequent qu'il les connoisse, les voye, & en prenne soin? Qu'aimera t'il donc, & à quoy prendra t'il plaisir, s'il n'aimela vertu, & ceux qui s'y estudient? Et quant au vice & aux vicieux, Dieu ne les hait il pas? Oui certes, si nous ne le voulons transformer en ce mauuais Principe des Manicheens, & faire de Dieu vn diable? Et haïssant le vice, & les vicieux,

estimerons nous qu'il les laisse impunis, & qu'il ne se soucie point de tesmoigner par ses chastimens sa haine, & son desplaisir à l'encontre d'iceux? Ne seroit ce pas pour faire croire aux hommes que le vice & la vertu luy sont choses indifferentes, & qu'autant luy est l'un comme l'autre? Bref la conduite, le gouuernement, & la surintendance de tant de Peuples & Nations, Estats, Royaumes, Républiques, & Monarchies qui sont sur la face de la terre, leur generation, mort & succession des vnes aux autres (aussi bien que des hommes particuliers) & les diuers euenemens, & si merueilleux, qui s'y voyent, & ou on peut apperceuoir vne si admirable sagesse dans leurs desordres mesmes (ainsi que nous auons cy deuant monstre) est ce vne chose trop basse & vile, & in-

digne du soin de Dieu, & qu'il s'en entremesse? Qui est-ce donc qui s'en-entremessera, & à qui conviendra mieux ce soin? Au hazard, & à l'aveugle fortune? Mais nous avons montré qu'un si admirable ordre, qui marque une si merueilleuse sagesse, ne peut pas estre l'œuvre & l'effect d'une chose si brute & aveugle comme est le sort. Ainsi donc il est evident que ce n'est point une chose indigne de la grandeur de Dieu, de prendre le soin & la conduite de ce monde, ains au contraire qu'il n'y a rien de plus convenable à sa sagesse, puissance, justice, & bonté.

Voyons si c'est chose qu'il ne puisse, ou qu'il ne vueille faire? Si Dieu est, il faut qu'il ait subsisté de toute eternité, sans aucun commencement, car qui l'auroit produit, & mis en estre? Il ne peut pas

s'estre produit soy mesme , ny estre sorti du rien sans aucune cause , qui l'en ait tiré , & nulle autre cause premiere ny superieure ne l'en peut auoir tiré , car il n'y peut auoir rien premier ou superieur à Dieu. Que s'il a esté de toute eternité , il est donc infini au regard de sa durée. Et s'il a vne durée infinie , sa puissance est aussi infinie , car pour subsister & demeurer par vn temps infini il faut vne vertu necessairement infinie ; Et s'il a vne puissance infinie , ce monde , qui (quoy que grand) est neantmoins fini , est il trop grand pour ne pouuoir estre ou produit & créé , ou conduit & gouverné par vne puissance infinie telle qu'est la sienne ?

De plus ce Dieu que pose Epicure , ne le faut il pas mettre au dessus de tous ces Dieux que nous voyons ? Car il seroit indigne de

luy & de la grandeur de le mettre & renfermer dans l'enclos de ce monde, & parmy ces choses visibles. Quelque part donc que nous soyons icy bas en ceste terre, soit en l'un ou en l'autre hemisphere, comme nous auons les Cieux au dessus de nous, aussi faut il que nous conceuions Dieu estre par tout au dessus de ces cieux visibles, & non en quelque endroit seulement d'iceux. Dieu donc encloist de toutes parts ces Cieux, au dessus desquels il doit estre. Et par consequent, quand bien il ne s'estendrait pas à l'infini par tout au dessus d'iceux, & qu'il auroit quelque borne là ou il s'arrêteroit, (ce qui est faux & repugne à l'infinité de son Essence & de sa puissance,) tousiours seroit il beaucoup plus grand que ce monde visible, & par consequent auroit tousiours assez

de force & de puissance, pour mou-
voir, conduire & gouverner ce
monde. Il ne manque donc pas de
puissance pour cela.

Manque t'il donc de volōté? non
plus. Car pourquoy le pouuant
gouverner, ne le voudroit il pas?
Nous venons de monstrier que ce
n'est point chose indigne de luy,
ains tres-digne, & tres-seante à sa
grandeur & Majesté. Pourquoi
donc ne le voudroit il pas gouver-
ner? Est-ce qu'il n'a point de droit,
ny de pouvoir, dessus iceluy, &
qu'estât juste il ne veut rien entre-
prendre hors de sa jurisdiction?
Qui aura donc droit & autorité
sur ce monde, si ce n'est Dieu? For-
gerons nous avec les Manicheens
vn autre Principe, qui ait ce droit,
ou qui y ait sa part? Ce seroit faire
deux Dieux, & quand bien vn au-
tre y auroit sa part (ce qui est faux

& impossible) tousiours Dieu y auroit il aussi la sienne, & nous en faudroit revenir à ceste extrauagante & detestable refuerie de ces anciens Heretiques, avec leurs deux principes s'entre-poussans & combattans l'un l'autre à qui aura le dessus, & qui l'emportera par dessus son compagnon. Dieu donc ayant luy seul le droit & le pouuoir sur ce monde, pourquoy ne le voudroit il pas gouuerner?

Est-ce pour ce que cela luy bail-
leroit trop de peine, & luy trou-
bleroit s^{on} repos, & diminueroit sa
felicité? C'est ce que disoit Epi-
cure, mais avec quelle couleur ou
apparence de raison? Dieu ayant
vne puissance & sagesse infinie ne
sçauroit il sans peine ny travail
conduire ce monde puis que pour
grand qu'il soit, il est tousiours in-
finiment au dessous de Dieu? Les
Cieux

Cieux, & ces beaux corps qui y sont
attachez, ne se lassent point de rou-
ler sur nos testes, ny de verser icy
leurs influences & vertus merueil-
leuses, pour la production de tout
ce qui naist & se forme icy bas, &
nous croirons que la Diuinité, tout
Esprit, tout puissant & tout Sage,
se lasse, se trauaille à soustenir, à
entretenir, à conduire & gouuer-
ner ce monde, si petit en compa-
raison de luy, que c'est moins que
rien ?

Les hommes en leurs pensées &
conseils, en leurs desseins, delibe-
rations & resolutions qu'ils ont &
prennent pour la cōduite de leurs
propres affaires, ou de celles du pu-
blic, se lassent & trauaillent, & de
là s'ennuyent & chagrinent (ce qui
trouble leur contentement) pour-
ce qu'ils sont corporels & que les
mouuemens de leur esprit se font

H

par le moyen des organes du corps, lesquels par le mouvement & agitation des esprits animaux se tendent & bandent bien souvent par trop, & comme se cassent & rompent, ou se lassent & blessent par vne trop grande contention, & ces esprits aussi se dissipent, tellement qu'il leur est besoin d'une continuelle vicissitude de repos pour reparer les esprits dissipez.

Mais Dieu estant pur Esprit, sans aucun melange de corps ni matiere, ne se lasse point en ses pensées, conseils & desseins. Aussi ne raisonne & ne discourt il pas à la façon des hommes, tirant l'un de l'autre par consequence, ni pensant vne chose apres l'autre, il n'y a en luy (ie veux dire en sa sagesse & intelligence, non plus qu'en l'eternité de sa durée) ni premier ni second, ni deuant ni apres, ni derrie-

re, ains toutes les pensées, desseins, conseils & volontés ou resolutions, ne sont en luy qu'un seul même & pur acte, par lequel il void, sçait, connoist, entend, veut & ordonne toutes choses. Sa tres pure & parfaite simplicité (qui conuient a vne si excellente & infinie nature) requiert cela, & ne permet pas qu'il y ait aucun traict ni ombre de composition ou apparence de changement. Nous conceuons l'essence de Dieu, ses vertus & propriétés, sa puissance, sa sagesse, sa iustice, son intelligence, sa volonté, c'est à dire, ses conseils & desseins, comme sous autant d'images, formes & conceptions diuerses & distinctes, pource qu'estans corporels & finis, & luy Esprit & infini en toutes façons, nous ne pouuons voir ni comprendre Dieu, tel qu'il est en soy, mais nous iugeons neantmoins

bien que la perfection & simplicité qui conuient à Dieu, ne permet pas qu'il en soit ainsi en effet en luy, ni qu'il y ait en son essence tant de choses diuerſes, *formaliter*, (comme on parle aux Eſcholes) mais ſeulement *eminenter* & *cauſaliter*, comme on tient que le Soleil n'eſt pas en ſoy & en ſa ſubſtance, chaud, comme eſt le feu, mais ſeulement entant qu'il cauſe par tout de la chaleur.

C'eſt donc vne penſée bien baſſe & indigne de Dieu, de ſ'imaginer qu'il peine & ahané en ſes penſées & deſſeins, ou qu'il trauaille & ſe laſſe en agiſſant, que de là il ſ'ennuie & chagrine, & que cela trouble ſon repos & contentement, & ſouille en aucune façon ſa felicité. D'où eſt donc venue à ce Philoſophe vne penſée & imagination ſi baſſe & indigne de ſon grand eſ-

prit. Certes il semble que ç'ait esté à luy plustost vne desfaite & eschapatoire qu'une certaine & arrestée opinion. C'est que n'osant (comme j'ay dit cy dessus) nier tout à plat & détroussement toute Divinité, pour n'estre hué, hay & detesté du monde, moqué, sifflé & refuy des plus hōnestes gens, & hommes d'esprit, il a cédé au cours de l'opinion receuë touchant vne Divinité, mais il luy a osté la cognoissance & le soin des affaires du monde, qui est ce que cherchent & demandent le plus ses Disciples & Sectateurs. Et quand on luy a demandé pourquoy il luy ostoit ce soin & cognoissance, il a eludé & destourné l'effort de ceste questiō, par ceste belle eschapatoire, que ce luy seroit trop de peine, & que cela luy troubleroit son repos & contentement, & diminueroit

quelque chose de sa félicité & tranquillité. Et quand on luy a obiecté, que c'est donc vne chose vaine & inutile que de servir & honorer ceste Diuinité. Pour ne sembler tout a fait prophane, en accordant que ce service est superflu & inutile, il a voulu gauchir & eschapper, en disant que bien que il ne nous reuienne rien de la part de la Diuinité pour tout le service que nous luy rendons, neantmoins qu'estant en elle mesme tres-digne & excellente, elle est venerable & adorable, & comme telle doit estre honorée & venerée de nous, à peu pres comme nous auons en prix & estime, & veneration, les Rois & Princes estrangers, desquels nous ne sommes pas vassaux, & de qui nous n'attendons à ceste occasion, ni ne receuons aucun benefice, & de la part desquels nous n'appre-

hendon point de mal.

Et là dessus pour donner quelque couleur à ceste gaillarde, mais prophane responce, s'est mis à faire de belles speculations de l'excel-
lence de la nature de Dieu, de son immutabilité, de sa perfection, qui n'a besoin de chose aucune hors de foy, ayant en foy mesme toute sorte de perfection, qui le rend de par foy mesme, sans autre chose, parfaitement heureux & content. Et pource que le repos & tranquillité d'esprit fait beaucoup, & quasi toute la felicité de l'homme, il n'a pas voulu esloigner de la nature de Dieu ceste tranquillité, ains l'a esleuée au plus haut point, tant en Dieu qu'és hōmes, & la posée en la vertu & exercice de la vertu, & s'est estendu en ces belles speculations & considerations plus avant beaucoup que n'auoit iamais fait aupar-

rauant luy aucun de tous les Philosophes Payens qui l'auoyent precedé; par ou ils s'est fait admirer, & rendu recommandable aux hommes, pour faire passer & receuoir son opinion aux plus beaux esprits.

Mais tout cela à esté a dessein d'oster à Dieu la connoissance & soin des choses humaines, comme n'ayant besoin, quand à luy, & pour son bon-heur, perfection, contentement & tranquillité, de rien de toutes ces choses visibles, desquels il se peut passer, & dont le soin & gouuernement luy seroit plustost à charge, & ennui, que non pas à plaisir & contentement. Or il est bien vray que Dieu est tout parfait, & trop plus parfait, que iamais cet homme là ne l'a ou creu ou décrit, & que pour son bon-heur & perfection en soy, il n'a pas besoin de riē de toutes ces choses terrestres,

mondaines & visibles, & qu'il s'en est bien passé par siècles infinis, auparavant la creation de ce monde. Aussi ne les a il pas créés pour besoin qu'il en eust, & pour en bastir sa félicité & son bon-heur, mais meü de sa seule bonté, pour communiquer au dehors de soy son bien, ses vertus, ses perfections autant que cela se pouuoit. Ce qui est vn traitt de sa perfection, de n'estre pas seulement bon & heureux en soy, mais aussi de vouloir estre bien faisant aux autres, par la communication de son bien & de ses perfections. Dequoy nous voyons vne ombre & image és gens vertueux, & liberaux, qui ne se contentent pas d'estre riches & abondans & bons quand a eux, mais aussi communiquent aux autres de leurs biens, richesses & vertus, autant qu'ils peuuent. Ce que tous

naturellement jugent & reconnoissent estre vne tres-grande vertu & perfection.

Ce grand, mais prophane, esprit n'a pas considéré, ou voulu considérer, que cela estant vne vertu & perfection tres-recommandable en l'homme, il ne la deuoit pas esloigner de Dieu, ains la luy attribuer, comme vne qualité & propriété tres-conuenable à l'excellence de sa Nature; Et de là deuoit conclurre, que ce monde estoit vne œuvre & production de Dieu, (en suivant ceste sienne propriété) & qu'il tenoit en sa main les resnes de la conduite & gouvernement d'iceluy, n'estant en aucune façon raisonnable, que l'origine ou production, la subsistance & conseruation, la conduite & administration, d'une si admirable piece d'ouvrage appartienne à autre qu'à la Diuinité.

Et quoy qu'on vueille dire en sa faueur, que tant s'en faut qu'il ait esté ennemi de la vertu, & amateur, ou Aduocat du vice, qu'au contraire c'est luy qui l'a esleuée à son plus haut lustre, & rehaussée de ses plus viues couleurs. Ce qu'il en a fait pourtant n'a en effect esté que pour faire par là couler plus aisement son poison dans les beaux esprits, lesquels il a surpris par ses discours. Car on ne le lauera jamais de ceste noire tache, d'auoir enseigné qu'il n'y a rien à esperer ny craindre pour nous de la part de la Diuinité, qui ne se mesle point de nos affaires ny de rien de ce qui nous touche. Par ou il a osté la priere & inuocation, & l'action de graces à la Diuinité (qui est le cœur & la mouelle de la vraye religion & pieté) voire la crainte & le respect, & l'amour vers icelle même.

Car quelle crainte , respect & amour peut estre excitée en nous vers vne Diuinité laquelle, selon leurs maximes, nous ne sçaurions connoistre puis qu'elle n'a fait ny ne conduit ce monde, & n'a aucun commerce avec les hommes, ne pouuant y auoir autre voye pour paruenir à la connoissance d'une Diuinité, que ou la consideration du monde, & des œuures de Dieu en iceluy, ou la reuelation qu'il nous peut faire de soy en sa Parole. Et partant tout ce qu'Epicure, ou ses disciples, sçauroient dire de l'honneur deu à la Diuinité, n'est en effect qu'un eschappatoire, pour decliner l'enuie & la haine des hommes contre leur impieté, duquel honneur au reste, comme nullement accordant à leurs maximes, ils se rioient & mocquoient au dedans, & en eux mesmes, de mes-

mes comme Cicéron tesmoigne
que les Augures anciens se moc-
quoient par entr'eux de toute leur
doctrine touchant les Auspices,
quoy qu'ils la recommandassent au
simple peuple comme diuine. Ce
que les disciples d'Épicure ont bien
verifié par leur pratique, en la-
quelle il n'y auoit que peu, ou point
de seruice & honneur rendu par
eux à la diuinité, tesmoin ce Poëte
Latin, en ces Vers,

*Parcus Deorum cultor & infrequens
Insanientis dum Sapientia
Consultus erro.*



CHAP. V I I I.

*Raison sixiesme, tirée de l'im-
mortalité de l'Ame.*

Ceux qui nient la Diuinité,
nient aussi en consequence

vne autre vie apres celle-cy, & que l'Ame de l'homme soit immortelle, & ne veulent reconnoistre ni Paradis, ni Enfer, ni Anges, ni Diables : Et ces choses à la verité sont si necessairement iointes, que qui 'auouë ou nie l'vne d'icelles doit aussi auouër ou nier les autres. Tellement que les Saduceens, qui entre les Iuifs nioient qu'il y eust Ange ni Éspirit, & la Resurrection, estoient en effet vrais Epicuriens & Athées, semblables à ceux de ce temps qui pour la crainte des Loix, & pour la honte du monde, n'osans pas ouuertement dire leur sentiment, font profession extérieure de la Religion receüe publiquement au Pays & Estat dont ils sont membres, bien qu'au dedans ils n'en croient rien, ains s'en moquent & la tiennent pour vne chanson. La raison de ceste impie-

ré & prophaneté est celle que nous auons remarquée au commencement, à sçauoir, que ces gens sont entierement charnels & sensuels, enforcelez des plaisirs & contentemens de ce monde, esquels ils constituent leur souuerain bien & felicité. Ce qui fait qu'ils tiennent pour fables, tout ce qui se dit d'une autre vie apres celle-cy, & du bon heur & mal-heur qui y attend les hommes.

Tiennent en suite que l'Ame meurt & perit avec le corps, ne veulent reconnoistre ni Anges, ni Diables, pour n'estre obligez à aduouer l'immortalité de l'Ame, & le supplice eternal des meschans apres ceste vie; d'où ils viennent aussi à nier la Diuinité & sa Prouidence. Car ils voyent bien que s'il y a vn Dieu, il est juste juge & vengeur des pechez & iniquités des

hommes, & que le Dieu d'Epicure n'est en effect qu'une idole, & une vaine imagination. De ceste Diuinité ils voyent bien qu'ils ne peuvent se promettre ny attendre aucun bien ny faueur, puis qu'ils ne se portent, ny addonnent, à la vertu, ains à l'accomplissement & satisfaction de leurs mauuaises conuoiſiſes, en quoy ils cerchent leur ſouuerain bien. Ce qui leur fait nier & la Diuinité, & l'immortalité de l'ame, & une autre vie ou il y ait un Paradis & un Enfer, leur conſcience leur diſant qu'ils ne peuvent auoir part au Paradis, & que l'Enfer, s'il y en a un, eſt pour eux & leurs ſemblables.

Au reciproque ſi l'Ame eſt immortelle il y a une autre vie, & en icelle vu lieu de ioye & de ſupplice pour l'homme, il y a des Anges coadiuteurs de ceste ioye, & des
Diables

Diabls ministres de ce supplice; & par dessus tout vn Dieu, qui dispense & administre en iustice la recompense des vns & le supplice des autres. Car si l'Ame est immortelle, estant actiue, comme elle est de sa nature, elle ne peut estre sans sentiment, & demeurer ainsi perpetuellement, car combien seroit cela peu eslongné de la mort? Il faut donc qu'ou elle iouysse de ioye & contentement, ou qu'elle soit trauaillée de tristesse & tourment, & ce en suite du bien ou du mal, du vice ou de la vertu, à quoy elle se sera adonnée pendant ceste vie. Car nous auons cy deuant monstre que la vertu est digne de loüange & recompense, & le vice de blasme & de peine. Ce qui ne luy estant pas conuenablement & condignement rendu en ceste vie, il faut qu'il luy soit rendu en

l'autre, autrement l'un & l'autre seroit privé de ce qui luy est deu ; ce qui est contre la nature, & contre le droit & la raison. Or cela est aduoüer vn Paradis & vn Enfer.

Et si l'Ame est immortelle, il n'y a nulle raison de nier les Anges ni les Diables, puis que les vns & les autres sont substances immatérielles, spirituelles & immortelles. Et de fait rien ne porte ces gens à nier les Anges & les Diables, que la peur d'estre obligez à aduoüer l'immortalité de l'Ame, & en suite le Paradis & l'Enfer, qui est ce qu'ils apprehendent & craignent.

Or que l'Ame soit immortelle il se peut prouver ou par tesmoignage, ou par raison : Par le tesmoignage, di-je, de tous les hommes qui sont & ont iamais esté sur la face de la terre. Car si on recherche tous les monumens de l'histoire

tant anciens que modernes, il se trouuera qu'il n'y a iamais eu, & n'y a encor aujourd'huy, Peuple, Langue, ni Nation, soit policée ou barbare, qui ne reconnoisse que l'Ame de l'homme subsiste & vit apres la mort du corps, mais de la force de ceste preuue il sera dit cy apres en son lieu.

Quant aux raisons pour prouuer l'immortalité de l'Ame, elles ne peuvent pas estre *à priori*. Car il n'y a que Dieu qui soit la cause d'icelle, duquel nous sommes maintenant apres à demonstrier l'existence. Il les faut donc prendre *à posteriori*, & prouuer ceste immortalité par les effets de l'Ame. Et de fait ils sont tels, si grands & si merueilleux, qu'ils ne peuvent pas proceder d'une cause perissable, mortelle & materielle. Or les effets & operations d'icelle sont ou inter-

nes, en l'Ame mesme (& ce ou en l'entendement, comme la connoissance, ou en la volonté, comme les vertus) ou elles sont externes, comme la parole, & les mouvemens du corps & parties d'iceluy, d'où partent les ouvrages merueilleux & prodigieux des arts tant liberaux que mechaniques.

En tout ce qui se void dans ce grand monde, il y a plusieurs & divers degrez d'excellence des choses les vnes par dessus les autres, par lesquels, comme par autant de divers eschelons, l'homme est amené à la reconnoissance des choses immaterielles & eternelles. Le plus bas & dernier degre est des choses mortes qui n'ont ni vie ni mouvement, comme sont les pierres & metaux, &c. Le second de celles qui ont quelque vie, par le moyen de laquelle elles croissent & s'esten-

dent, comme les plantes: le troi-
siesme est de celles qui outre ceste
vie là ont le sentiment & mouue-
ment local, par lequel elles se
transportent d'un lieu à autre, com-
me sont les animaux: entre lesquels
il y a diuers degrez de perfection.

Car d'iceux il y en a quelques
vns qui n'ont que le seul sens du
toucher, comme les huïstres, quel-
ques autres avec celuy là ont celuy
du goust, comme les mousches &
diuers insectes; autres ont aussi le
flair & l'ouye comme les taupes;
& finalement les animaux plus par-
faits sont doüez des cinq sens de
nature: & de ceux là les vns excel-
lent en vn sens, les autres en vn au-
tre, comme les Aigles ont la veüe
merueilleusement aigüe & pene-
trante, & les Vautours, les Loups
& les Chiens le flair exquis & sub-
til. Ces sens reçoient les idées

& images des qualitez materielles qui sont és choses, d'où elles sont puis apres portées à l'imagination, ou sens commun, qui les reçoit; d'où vient & naist entreux la connoissance des choses mesmes. Par ceste connoissance ils sont portez à haïr ou fuir, aimer ou poursuiure, ces choses là mesmes, & à se mouvoir vers ou arriere d'elles. Mais toute ceste connoissance là qui consiste & s'arreste en l'imagination, est des choses singulieres & indiuiduës seulement, & avec cela materielles, comme ainsi soit que les qualitez, lesquelles les sens perçoivent, sont toutes materielles, & qui ont la quantité pour suiet & fondement.

Au dessus de tout cela est l'homme doüé de raison, de laquelle sont destituez les autres animaux, & par laquelle il fait choses trop

plus merueilleuses qu'eux tous ensemble. Car par icelle il connoist non seulement les choses singulieres, indiuidues & materielles, mais aussi les vniuerselles. Et par elle mesme il discourt, raisonne, argumente, tire & deduit vne chose de l'autre, penetre dans la nature des choses, & recherche les causes d'icelles, d'où naissent les sciences, & la connoissance de la Philosophie, & de toutes les parties d'icelle, à laquelle connoissance il n'y a rien de semblable, ne qui en approche, entre les autres animaux. Par ceste mesme raison il abstrait de la matiere la quantité (par vne abstraction mentale) soit concrete ou discrete qu'on appelle, à sçauoir les nombres, lignes, superficies, & corps Geometriques, en considere les diuerses figures & especes, les qualitez, proprietiez, proportions.

raportez, &c. d'où naissent les sciences Mathematiques tant admirables selon toutes leurs especes, soit simples, comme l'Arithmetique & Geometrie, ou composées comme l'Astronomie, Optique, Musique, &c. de la connoissance desquelles partent de si admirables effects, qui estonnent les hommes mesmes, & les ravissent comme hors d'eux mesmes.

Par ceste mesme raison l'homme considere le temps & le lieu, & les choses qui s'y font, non seulement les presentes, & qui se font, ou arriuent, deuant ses yeux, mais aussi les passées, dont il garde la memoire, & en tient registre, & mesmes celles qui sont à venir, lesquelles il preuoit & deuine souuent par vne coniecture morale: connoist aussi le lieu non seulement de sa naissance & demeure, à sçauoir sa

maison & les enuironz d'icelle, mais tout le pays d'alentour, voire tout le monde entier pour grand qu'il soit, lequel il cōçoit en son esprit, & s'en forme vne idée certaine & veritable, & de tout cela s'acquiert ceste sapience & prudence si exquise, qui le rend admirable en la conduite non seulement de ses affaires domestiques, mais de celles des Corps, Communautez, Villes, Estats, Republiques, Royaumes & Monarchies entieres, à laquelle prudence il n'y a rié de semblable en tous les autres animaux.

Par ceste mesme raison l'homme connoist & comprend l'infini, conceuant en son esprit ce qui n'a aucunes bornes au regard soit de la quantité, soit du temps ou du lieu. Car il conçoit qu'il n'y a nombre si grand qu'il ne puisse estre fait encor plus grand, & ce iusques à l'in-

fini , & qu'il n'y a ligne , ni superficie , ni corps, & lieu ou espace , si grand qu'il ne puisse estre estendu encor dauantage iusques à l'infini : Et qu'il ny a temps ni durée si longue qui ne puisse semblablement estre estenduë à l'infini , soit en auant ou en arriere. Et ainsi conçoit & comprend, en quelque sorte , en son esprit l'Eternité mesme, & l'immensité. Ce qui ne se pourroit pas si elle n'estoit elle mesme en quelque façon infinie, au regard pour le moins, de sa durée : c'est à dire en effect, si elle n'estoit immortelle & immatérielle.

Finalément par ceste mesme raison l'homme conçoit & comprend les choses immatérielles , comme sont les esprits & intelligences, voire la Diuinité mesme , & en considere & recherche les proprietez , qualitez, vertus , affections , & ac-

tions, se reflexiffât meſme ſur ſoy, elle reconnoiſt & juge, par ſes propres actions & operations, qu'elle eſt, & doit eſtre, immatérielle, immortelle, & ſpirituelle. Ce qui véritablement ne ſe pourroit pas faire par elle ſi en eſſect elle n'eſtoit telle.

Par ceſte meſme raiſon l'homme eſt rendu capable de la vertu, qui eſt vn eſſect d'icelle en ſa volonté, par laquelle vertu principalement l'homme ſurpaſſe & excelle les beſtes, & approche le plus de la Divinité, de laquelle elle eſt vne viue image. Vertu qui eſt louée & approuvée des hommes, & de la Divinité meſmes, à laquelle eſt juſtement deu ſalaire & recompence, qui pour l'ordinaire ne luy eſt pas renduë en ceſte vie. Car qui ne ſçait, & ne reconnoiſt, que les plus gens de bien & vertueux ſont

le plus souuent les plus mesprifez & mesestimez , & ordinairement travaillez, persecutez, hays, & tourmentez par les autres hommes. Ce qui a fait qu'autres-fois plusieurs payens reconnoissans l'iniustice, ce leur sembloit, de ce traitement, & ne pouuans comprendre commēt vne Prouidence iuste & sage le pourroit souffrir , ont mieux aimé nier la Prouidence, & permettre au gouuernement de la fortune, la conduite des affaires humaines, que de charger la Diuinité de ce blasme , qu'à leur aduis elle ne pourroit fuyr si elle se mesloit de l'administration de ce monde : au lieu qu'ils deuoyent plûtoſt reconnoistre l'immortalité de l'ame, & vne autre vie que celle cy, en laquelle l'homme doit receuoir le iuste salaire qui est deu à ses œures. Ce qui est trop plus naturel,

& conforme à la raison, que de nier la Prouidence, & mesmes la Diuinité. Ceste vertu doncques si excellente, & qui deïfie en quelque façon les hommes, & est de tous reconnüe telle, ne peut pas estre vn effect, & production d'vne matiere grossiere & perissable, mais d'vne Essence spirituelle & immortelle.

Quant aux effects de la raison qui sont hors de l'ame, il y a premiere-ment la parole, par laquelle l'homme exprime ses conceptions, ses mouuemens & affections, & les fait entendre à autrui hors de soy, laquelle parole est vn effect propre & incommunicable, de la raison. Et ceste faculté ne se trouue en nul autre qu'en l'homme, iusques là que les Philosophes Iuifs, n'expriment point autrement vn animal raisonnable que par *vn animal parlant*. Car ce qu'on apprend

à parler à quelques oiseaux, ce n'est qu'une imitation brute & destituée de raison, & non un vray parler procedant & conduit de la raison. Et quant à ce que les animaux ont quelque voix par laquelle ils expriment leur desirs & mouvemens intérieurs, cela est bien esloigné, & n'approche en rien, du parler de l'homme, par lequel il exprime si distinctement, & si particulièrement, toutes ses conceptions; & est un effect d'une cause sans comparaison inferieure, & d'une toute autre nature, que n'est pas celle d'où procede la parole de l'homme.

Les mouvemens du corps, & de toutes les parties d'iceluy, procedans de la volonté, & conduits & adressez par la raison, sont tels, si diuers, & merueilleux, au prix de ceux des bestes, qu'ils tesmoignent

bien que le corps de l'homme si industrieusement basti, & accommodé a tant de diuers mouuemens, est la maison ou loge vn hôte tout autre, & trop plus merueilleux que celuy qui agit & meut le corps des bestes. Car de là sont les ouurages & artifices si merueilleux de tous les arts tant liberaux que mechaniques, lesquels bien & attentivement considerez arguent, & témoignent, vne cause toute diuine & spirituelle, ne pouuans pas estre les effects d'une matiere perissable. Car quelle merueille, ie vous prie, pour exemple est-ce de l'Ecriture, qui avec si peu de caracteres exprime vn nombre infini de mots si differens, qui sont non seulement en chascque langue, mais entant de langues si differentes au monde? Et quelle merueille que la main & les doigts de l'homme soyent si artif-

tent formez, & accommodez à vne infinité de diuers mouuemens nécessaires pour l'exercice de tous les arts, & la manufacture de tous les ouurages qui sont comme infinis? En quoy il faut bien reconnoistre vne sagesse toute Diuine qui ait ainsi sagement conformé le corps humain, & vne vertu immortelle & spirituelle pour adresser & conduire tous ces mouuemens si diuers & infinis. Le temps defauidroit qui voudroit poursuiure les merueilles de la Peinture, Sculpture, Musique, & de tous les autres arts liberaux & mechaniques mesmes; dont les effets sont si admirables que l'homme s'estonne soy mesme, & est comme englouti d'admiration de ses propres ouurages.

De tout ce que dessus il est bien aisé de voir l'infinité de distance qu'il y a entre

entre l'Ame de l'homme, & celle des bestes, puis que les effects en sont si merueilleusement differens, & qu'il n'y a nulle raison de dire que l'une aussi bien que l'autre, soit materielle, perissable ou mortelle.

Ceux qui ont recueilli & ramassé ensemble, les diuers effects de la force de la faculté imaginative des bestes, de leur industrie & adresse, de leur preuoyance & de quelque ombre de vertu morale imaginaire, pour les mettre en parallele avec ceux de la raison de l'homme, & monstrent par là que l'Ame de l'une n'est pas d'autre nature que celle des autres : & qui amènent, par exemple, pour cela, la viuacité de l'esprit des Singes & Elephans, & leur docilité à faire tout ce que l'homme desire d'eux. Item l'industrie des Abeilles à former leurs logettes & à faire la cire & le miel :

K

L'œconomie & la preuoyance des Fourmis, la chasteté des Colombes & Tourterelles, la vigilance ordre & obeïssance des Gruës; Ainsi qu'a fait l'Autheur d'un Dialogue intitulé, *Frere Anselme*, où il introduit un Asne disputant contre ce Moine, & luy prouuant que tous les auantages, priuileges, prerogatiues & excellences qu'il pretenoit que l'homme auoit par dessus les bestes, sont égales ou mesmes surpassées, par ce qui se voit & se peut cognoistre, en la nature d'icelles. Ceux là, di-je, n'ont pas dit ou escrit ces choses là serieusement, ains par jeu & gallantise, & pour monstrier la gentillesse de leur esprit, & la cognoissance qu'ils auoyent de plusieurs observations par eux faites en la nature des bestes: où s'ils l'ont fait serieusement & de propos deliberé, à dessein de

plaider la cause des Athées touchant la mortalité de l'Ame, (comme il semble que cet Auteur la fait, parce qu'après auoir plaidé au long la cause des bestes contre l'homme, & refuté ingenieusement, ce luy semble, tous les argumens qu'on peut apporter pour prouuer son excellence par dessus celle des bestes, il se rend & donne les mains à la fin, à vn seul qu'il propose, & coupe en trois mots, à sçauoir celuy qui est pris de la mort du Fils de Dieu pour le salut des hommes, auquel n'ont point de part les bestes. Argument à la verité tres fort & inexpugnable, mais qui enuers des Prophanes & Athées proposé ainsi court & nuëment, n'est de nulle consideration, & duquel au dedans d'eux mesmes ils serient & mocquent comme inepte & ridicule,) ils se montrent en cela plus

ânes & ignorans, que cet Âne le-
quel ils font disputer si subtile-
ment, ni ayant point en effet de
comparaïson de toutes ces preten-
duës merueilles & excellence des
bestes avec celle de l'homme, qui
les surpasse infiniment; & de l'ex-
cellence duquel toutes ces autres
ne sont point à peine comme l'om-
bre d'un songe, ou le songe d'une
ombre.



CHAP. IX.

*Raison septiesme, tirée de la bonne
& mauuaise conscience des
hommes.*

C'EST vne chose certaine, &
toute euidente par l'experien-
ce journaliere, & de tous siecles,
que tout homme, quel qu'il soit,

{s'il n'est du tout barbare & abbruti) a vne conscience du bien & du mal qu'il fait; car il sçait fort bien, quand il a bien ou mal fait, & s'il a mal fait sa conscience l'accuse, & le remord: & si ce sont des crimes atroces qu'il ait commis elle l'effraye, & ne luy donne ni paix ni repos, le trouble & tourmente continuellement, saisit son ame d'angoisse, & quelque fois, voire assez souvent, le jette dans le desespoir, dont on voit les histoires pleines d'exemples. Ce sont ces furies des Poëtes Payens, qui avec leurs fouets & escourgées, & leurs torches poursuivent & tourmentent les meschans, & ce vautour de Prométhée, qui luy ronge continuellement les entrailles, ce ver de l'Escriture qui ne meurt point.

Ces frayeurs & terreurs ne produiennent point de l'apprehension

du supplice des hommes, car ceux là mesmes en sont trauaillez qui ne craignent rien de la part des hommes, comme sont les tyrans & autres meschans, & ceux qui sont puissans en autorité entre les hōmes; comme Denis Tyran de Syracuse, le fit reconnoistre à son flatteur, par l'espée qu'il luy fit pendre sur la teste, & Caligula qui se cachoit des linceuls de son liēt contre le tonnere; & ce qui est à remarquer en ceci, c'est que bien souvent ils sont alors les plus effrayez des alarmes de leur cōscience, lors qu'il sont prests de leur fin, & ont comme vn pied dans le tombeau, & sont en estat de n'rien craindre de la part des hommes; ce qui est vn euident tesmoignage qu'ils craignent vn autre Iuge, & vn autre supplice, & qu'ils reconnoissent vne autre vie que celle cy, ou il y a

quelque chose à craindre ou à espérer.

C'est vne chetive & miserable defaite de s'imaginer que ces frayeurs & espouuantemens viennent d'une fausse opinion que l'on dōne aux hommes d'une autre vie, & d'un jugement à venir; car si ceste persuasion estoit fausse & sans aucun fondement, comment pourroit elle estre si forte, que de saisir ainsi les esprits des hommes malgré qu'ils en ayent, & en telle sorte, qu'ils ne s'en peuvent defendre, nonobstant tout l'effort qu'ils y font, & le desir qu'ils ont qu'elle soit fausse?

Il est bien aisé de nous persuader ce que nous desirons, mais il n'est pas aisé de persuader vne chose, qui est totalement contraire à nos desirs & souhaits, & sur tout de le persuader ainsi vniuersellement a

tous sans exception, car de qui est ce que l'autorité auroit esté si grande, que de le nous persuader sans raison? ou la subtilité si grande, que de l'appuyer de raisons qui trompent tout le monde, & ceux là mesmes qui desireroient le plus d'en descouvrir la fausseté? & comment est-ce, que si l'opinion des Athées est vraie en ce point, & leurs raisons bonnes & solides, ils ne persuadent cela à tout le monde, & ne font voir clair comme le iour, la futilité de l'opinion & des raisons contraires? Car ce qu'ils le persuadent a quelques vns, c'est a ceux qui ont plongé & noyé leur raison dedans les plaisirs & voluptez charnelles, & qui sont lors semblables à vn criminel qui s'en-yure dans la prison, pendant qu'on luy fait son procez. Mais toute leur raison & subtilité ne le persua-

dera iamais à ceux qui sont travaillez & bourrelez au dedans par la conscience de leurs crimes, & eux mêmes bien souuent ne peuuent pas s'exempter de l'atteinte de ces furies, qui malgré eux leur dōnent quelquefois de rudes faccades, qui est vn inuincible argument de la force de ceste verité, naturellement grauée & imprimée au cœur de l'homme, qu'il y a vn iuste iuge & seuer vangeur des pechez des hommes, & quine les laisse point impunis.

C'est vn aussi pauvre subterfuge de dire, que c'est qu'ils ne sont pas nourris dans l'Eschole d'Epicure, duquel les Sectateurs & Disciples se moquent de ces chimeres & phantosmes: Car premierement l'experience monstre, qu'eux mêmes ne sont pas exempts de ces affres de la conscience, & ie pense

qu'ils aduoüeront bien Caligule & autres semblables monstres, pour estre de leur Eschole, qui neantmoins ont ressenti ces pointures & frayeurs. Secondement, vn chacun, par la corruption de sa nature, & ses fortes inclinations au mal, est à soy mesme vn maistre d'Eschole d'Epicurisme, & Professeur d'Atheïsme, qui se le persuaderoit volontiers s'il pouuoit, pour se laisser aller plus licentieusement à l'execution de ses passions. Et quoy que peut estre ceux qui ressentent ces alarmes & terreurs, ne soyent pas de profession tout ouuerts Athées, ils le sont bien pour le moins de volonté & d'affection, & neantmoins ils ne peuuent faire tant, que de se deliurer de ces frayeurs, & de perdre l'opinion d'vne Diuinité & Prouidence vangereffe de leurs crimes; ce que sans doute ils fe-

royent aisement, puis qu'ils le des-
sirent, si ceste opinion estoit fausse
& vaine, & ne venoit que d'une
simple institution & fantaisie de
quelques vns, qui l'auroyent mis
en avant. Et y a de quoy s'estonner
comment si l'opinion des Athées
est vraie, ceux qui ont deliuré les
Republiques des Tyrans qui les
opprimoyent, ont esté louez de
tous, des statües leur ont esté dres-
sées, & des Panegyriques compo-
sez & recitez à leur louange, pour
les esleuer iusqu'au ciel avec l'ap-
plaudissement des peuples, & que
neantmoins, si Epicure dans Athe-
nes, & Lucrece dans Rome, fust
môté sur la Tribune ou le Theatre,
pour persuader au peuple leur opi-
nion, & les deliurer de ces tyran-
niques & prétendües paniques ter-
reurs de la consciencie, qui bourre-
lent & gehennent les esprits des

hommes , au lieu d'estre escoutez avec applaudissement, ils eussent esté lapidez , & repoussez avec injures & detestation d'un chacun.

Ce que tous ceux qui sont chargez de crimes ne sont pas agitez de ces furies , n'est pas vn argument, que ces terreurs soient vaines (non plus que ce qu'ils ne reçoivent pas tous ici bas, & des ceste vie, le iuste chastiment qu'ils meritent, n'est pas vn argument, qu'il ny ait point de Prouidence, qui y prenne garde) mais est plustost vn argument de l'assoupissement & abbrutissement des hommes, qui noient leur raison dans leurs vices; & ces remords & esclans de conscience & autres sont des tesmoignages & effets de la Diuinité, qui ne se laisse point sans tesmoignage dans l'homme mesme, duquel la conscience luy sert d'accusateur, de tesmoin,

de juge & de bourreau tout ensemble.

Si l'homme sçait & connoist bien le mal qu'il fait , & si sa conscience l'en accuse & l'en espouuante , il sçait & reconnoist aussi le bien qu'il fait , & la connoissance qu'il a de son innocence & bonne vie , luy cause vn grand repos , & merueilleuse tranquillité d'esprit, qu'il prise & estime dauantage , & le rend plus content & heureux, que ne sont les meschans avec la iouissance de tous leurs biens, honneurs, plaisirs & richesses. Et de ceste felicité & contentement des gens de bien par dessus les meschans sont pleins les escrits des Philosophes mesmes Payens , sans en excepter Epicure mesme, qui a esté contraint de reconnoistre ceste verité. Ce qui est vn argument, que la vertu a bien vn autre salaire,

que ceste pretenduë felicité , qui consiste és honneurs , biens ou plaisirs de ceste vie, & qu'elle porte avec soy son propre salaire, & en attend vn autre ailleurs qu'en ceste vie (qui ne peut estre simplement la gloire & l'estime des hommes, & la souuenance de leurs bien faits en la memoire de la posterité, dont la vertu est bien souuent, & en la plus part des gens vertueux, priuée & destituée) ce qui nous monstre l'excellence d'icelle par dessus le vice, & vne naturelle difference, & comme infinie distance, entre elle & le mal.

De plus, quand les hommes sont à tort & iniustement blasmez, leur bonne vie & louables actions calomniées, & leurs personnes diffamées & dénigrées , ils se iustifient & defendent tant qu'ils peuvent, & s'efforcent avec passion & vehe-

mence de prouuer leur innocence, & cela mesme font aussi ces Athées, que nous combattons, s'il leur arriue quelquefois d'estre en quelque chose calomniez & blasmez à tort. Pourquoi cela, ie vous prie, s'il n'y a point de naturelle difference entre le bien & le mal, le vice & la vertu ? Si l'une n'est point digne de loüange & l'autre de blasme, l'un de peine & l'autre de recompense, que leur importe dis-je d'estre blasmez & vituperez, ou loüez & prisez, si ce blasme & cette loüange ne sont en effect qu'imaginaires, sans aucun reel fondement d'iceux, & si le tout ne consiste qu'en fantaisie & opinion ?

Ces esprits pretendus forts, deuroient se mocquer de toute la mauuaise opinion que les hommes scauroient auoir d'eux, pour raison de leurs crimes, & ne deuroient

point se mettre en peine de se justifier, quand ils sont accusez a tort, car pourquoy se mettre en peine, ou apprehender vne fausse imagination des hommes, qui n'a point de fondement reel & solide. Ce qui est vn argument, que ces gens là, malgré qu'ils en ayent, & contre leurs maximes, sont contrains de reconnoistre la grande difference, qu'il y a entre le bien & le mal, le vice & la vertu, la recompense deüe à l'un & le supplice à l'autre.

Dauantage, l'experience nous apprend, que quand les hommes sont violemment & iniustement opprimez sans moyen ou esperance de s'en reuancher, ils ont recours à la Diuinité, de la justice de laquelle, ils attendent & se promettent la vengeance du tort qui leur est fait. Cest ce que nous remarque tres-bien Tertullien en son

son Apologétique contre les Payens, disant, que si quelqu'un d'eux estoit ainsi opprimé, il s'escrioit *Deus videt, & Deus reddet, Dieu le void, & Dieu le rendra*, & qu'en disant cela il ne regardoit point vers le capitolé ou estoit le Temple de Jupiter, mais vers le Ciel, qui est le throne de Dieu, & adiousté, que *cela est le tesmoignage d'une Ame naturellement Chrestienne*. Car ce mouuement ne vient point de l'opinion preconçue d'une Diuinité, qui luy ait esté imprimée en l'esprit par la simple institution & en-doctrinement de quelqu'un, mais qui part du sentiment de sa conscience, & du plus profond de son cœur, & du jugement de sa plus pure raison, qui luy dicte, & suggere, & fait recognoistre en effect, qu'il y a une Diuinité & une Prouidence, qui voit de là haut les torts, qui se font

L

iei bas , & en prend connoissance , pour les vanger & chastier , & defendre l'innocence à l'encontre. Car ce seroit vn bien foible refuge & vne consolation bien froide , d'auoir recours alors , & en vn tel cas , à vne fausse persuasion , qui n'auroit autre fondement que l'institution & autorité d'vn homme menteur , qui auroit controuué & baillé pour bonne , vne si grossiere bourde , telle que veulent les Athées estre l'opinion de la diuinité.

En choses , à la verité , ou nous n'auons aucun interest , nous nous laissons quelque-fois persuader par l'autorité de personnes eminentes ou en sçauoir , ou en dignité , à croire des choses dōt nous ne pouuons pas descouurir aisement la fausseté , mais en choses qui nous touchent de si près , qui nous sont si sensibles & importantes , & exci-

rent en nous de si violens mouuemens, & de si fortes passions, nous ne nous arreſtons pas à des perſuaſions qui ont ſi peu de fondement.

De tout cecy paroist euidentement, que l'homme a vne connoiſſance naturelle, & non ſimplement acquiſe par institution, d'une Diuinité & Prouidence, & de la difference réelle & eſſentielle, qui eſt entre le bien & le mal, le vice & la vertu, ſa propre conſcience, & le jugement de ſa raiſon, luy dictant & perſuadant fermement l'un & l'autre.

L'experience nous donne encor vn autre teſmoignage, que l'homme a vne naturelle connoiſſance & ſentiment de la Diuinité, & de ſa Prouidence, ceſt que quand il eſt ſurpris à l'improuiſte d'un manifeſte, & tout euident, & ineuitable peril de mort, comme ſi vne.

maison fond tout à coup. sur luy ;
ou qu'il tombe dans vn precipice,
&c. aussi tost il esleue & son cœur
& son esprit vers le Ciel, & en ceste
extremité & destresse à recours à
la Diuinité, pour estre aidé & se-
cours d'elle, & se ietter entre ses
bras, comme vn enfant en ceux de
son Pere. De mesme, la fermeté,
constance & tranquillité d'esprit
des vrais fideles & Chrestiens, lors
de leur depart de ce monde, & des
saincts Martyrs du Seigneur Iesus,
& la ferme esperance qu'ils tes-
moignent auoir d'une meilleure
vie, qu'ils attendent, & de l'attente
de laquelle ils se consolent, est vn
tesmoignage euident, de ceste ve-
rité. Car ce n'est pas là le temps ni
l'heure de se repaistre de fables : &
comment l'imagination d'une chi-
mere pourroit elle causer en eux
vne si merueilleuse resolution, &

vne si grande tranquillité d'esprit :
Si l'opinion d'une Diuinité ne ve-
noit que de la seule institution &
autorité, qui la persuadast sans
fondement de raison, elle ne feroit
pas vne si forte impression dans nos
esprits, & s'esuanouiroit aisement
d'elle mesme en vne telle rencon-
tre.



CHAP. X.

*Huictiesme Raison, tirée des Sor-
ciers, Magiciens, Enchanteurs,
& de toute l'idolatrie & su-
perstition Payenne.*

C'EST vne chose certaine, que
l'experience d'aujourd'huy,
& de tous siecles, atteste, que les
monumens de l'histoire tant an-
cienne que moderne confirment,

& que toutes sortes d'escripts tant de Chrestiens que de Payens asseurent, qu'il y a, & y a tousiours eu, de tout temps au monde, des Sorciers, Magiciens, Deuins, Enchanteurs, & autres telles sortes de gens mal-faisans, qui ont vne communication familiere, & vn commerce intime & ordinaire avec les demons; par l'entremise & puissance desquels ils font plusieurs choses estranges & prodigieuses, hors & au dessus de toute la puissance & sagesse humaine, & qui par consequent arguent vne cause surnaturelle, & immaterielle, tels que sont les demons.

Les Loix faites & dressees en tous Estats & Republiques bien ordonnées, tant des Iuifs par Moysse, & des Chrestiens de toute sorte & secte, que des Payens mesmes, nous apprenent cela, les executiōs ordi-

naires, & les supplices dont la justice punit ces gens là, leurs procez, & les relations des informations qu'on en a faites, nous le confirment, & ne nous en laissent aucunement douter. La curiosité damnable d'une infinité de gens, qui ont tous les jours recours à telles sortes de personnes, pour voir, sçavoir & faire choses, qui ne se peuvent ne voir, ne sçavoir, ni executer par autres moyens, nous confirment la mesme chose. Les escrits des Payens tant Grecs que Romains sont pleins d'exemples de telle sorte de gens, & de leurs effets surnaturels & monstrueux. Bref il faut renoncer à toute raison, & ne s'asseurer de chose aucune qui soit de fait, pour ne pas croire, qu'il y ait de telles gens, qui sont manifestes par toutes sortes de témoignages, & de monumens, qui

nous peuvent faire certaine foy de quelque chose.

O est il que s'il y a des Sorciers, Enchanteurs, &c. Il faut de nécessité qu'il y ait des demons, par l'aide & puissance desquels ils font ces prodigieux effects, que les hommes admirent tant en eux, & regardent avec horreur & espouvantement : ces choses ne pouans estre faites par aucune puissance humaine. Aussi les histoires & escrits de toutes sortes de peuples & nations, mesmes Payennes, sont pleines d'exemples d'apparitions de demons, & de leurs estranges effects.

Les Sybilles tant renommées entre les Payens, sont vn evident tesmoignage de cela mesmes, leurs predictions ne pouans pas venir d'ailleurs, que ou d'une Divinité, ou de quelque demon qui les agitoit. Que s'il y a des demons (com-

me cela ne se peut nier) il y a de necessité vne Diuinité au dessus, pour les pouuoir renger & tenir en bride, à ce qu'ils ne renuersent par leur pouuoir toutes choses, comme ayans assez de puissance & de malice pour cela.

L'histoire Sacrée & Ecclesiastique, conforme à l'experience d'aujourd'huy, nous apprend que depuis plusieurs siecles il y a eu, & y a encore, des gens possédez & obsédez par les demons, ce qui est euident par les estranges & surnaturels effects d'iceux. Ceste mesme histoire sacrée nous apprend qu'il y a eu des Magiciens & Enchanteurs, comme il paroist par l'histoire de Moysé, & des Enchanteurs d'Egypte, & par celle de Saül, qui consulta la femme qui auoit vn esprit de Python, & par celle de ceste chambrière, dont il est fait

mention au liure des Actes : mais de la verité de ces escrits saerez , il en pourra estre dit cy apres quelque chose.

Les liures , qui depuis plusieurs siecles ont esté escrits , de ces arts diaboliques & magiques , & dont il n'y en a encore que trop au monde , mesme parmi les Chrestiens , entre les mains d'esprits damnablement curieux : la profession publique de tels arts magiques , qui à esté autre-fois assez long-temps soufferte en quelques vnes des plus fameuses Vniuersitez de la Chrestienté , au grand deshonneur du nom Chrestien. La distinction communement receuë de magie blanche & noire , de l'inuention de quelques anciens Philosophes , Platoniciens & Pythagoriciens , qui ont voulu chercher le moyen de se concilier les bons demons , & se

les assuiettir à leur service , & qui d'eux à passé aux Cabbalistes des Juifs, & de ceux là aux Chrestiens, ne nous laissent point douter qu'il y ait des Magiciens & Demons.

Les relations non suspectes & auerces des pais & regions Septentrionales, & des vnes & autres Indes, nous apprennent qu'en ces lieux là tout y fourmille de telles gens, & qu'à peine s'en trouue il vn seul qui n'ait son demon & esprit familier. l'Aignan des Toupinambous, & autres peuples Barbares, qui les trauaille & tourmente & les bat furieusement, n'est en effect autre chose que le diable & mauvais demon. Et est à noter que là ou la connoissance du vray Dieu est moindre & quasi nulle, c'est là ou les demons ont le plus de vogue, & le plus de puissance sur les hommes; & se voyent & sentent

plus ordinairement, comme ayans en ces lieux là la bride plus longue & laschée de Dieu, pour tyranniser & tourmenter les hommes qui ne connoissent point leur Createur & bien faiteur.

La Religion des Chinois, & de la plus part des Indiens, est vne profession expresse du cult & adoration toute manifeste, qu'ils font du diable, & des demons, qu'ils seruent & honorent, disent-ils, pour se les rendre propices, afin qu'ils ne leur facent point de mal, estimans quant à la Diuinité qu'il n'est point besoin de luy rendre aucun honneur, tant pour ce qu'elle n'en a point besoin, que pour ce qu'estant bonne elle ne laissera, sans cela, de leur bien faire.

Ceste multitude infinie de Dieux qu'adoroient autre fois les anciens Payens Grecs & Romains, & leur

distinction en diuers rangs & ordres , de grands, moyens, & petites (*maiorum & minorum gentium*, comme ils parloient) de Dieux, de demi Dieux , & de Heros de diuerses sortes , de Satyres, de Faunes, de Pans, d'Egyfans, de Nymphes de toutes sortes, de Ioues de Veionues ; tout cela en effect n'estoit que demons , qui se cachotent sous ces noms , & ainsi masquez se faisoient adorer des hommes : & leurs liures sont pleins de diuerses apparitions de tels Dieux ou demons ; & toutes , ou la pluspart , de leurs superstitions estoient par l'ordonnance & commandement de ces faux Dieux ou demons , qui parloient & communiquoient avec ces gens superstitieux , & se faisoient seruir d'eux , comme s'ils eussent esté Dieux : leurs Oracles aussi si celebres parmi eux , & en tant de di-

uers lieux, sont autant de tesmoignages de ceste verité, qu'il y a des demons & esprits immateriels, ces oracles, n'estans autre chose, que les responses de ces malins esprits, par lesquelles ils entretenoient les Payens en leurs superstitions & idolatries. Toutes ces choses montrent assez euidentement qu'il y a des demons, & par consequent vne Diuinité au dessus d'iceux, comme il a esté dit.



CHAP. XI.

*Response aux obiections contre la
raison precedente.*

L'HOMME ingenieux à son propre mal, fait icy son effort pour se tromper soy mesme, & se desuelopper de la force de cette

raison. Il y en a qui estiment que tout ce qui se dit des Sorciers, & Magiciens, & de tous leurs effets merueilleux & prodigieux, sont tous contes faits à plaisir & controuués de gayeté de cœur, & se fondent en cette opinion sur ce que (disent ils) ayans souuentes fois desiré & recherché de voir quelque vne de ces choses, & s'estans pour cela adressés à ceux qui estoient estimés, & tenus de leur temps, pour Magiciens, & Sorciers auerés & fameux, & les ayans requis voire sollicités (auec promesse d'argent) de leur faire voir quelque chose d'extraordinaire & étrange, ils ne l'ont peu obtenir d'eux, nonobstant toutes les instances qu'ils en ont fait. Mais ces gens ne considerent pas que si ce qu'ils disent est veritable, c'est vn artifice de Satan, lequel pour les confirmer

en leur opinion erronée, & par ce moyen se les afferuir davantage à foy, s'est retenu expressement de leur faire voir ce qu'ils desiroient, les aimant mieux Athées-formés, que de les rebuter & destourner de leur erreur, par la frayeur, & horreur des choses qu'ils eussent veües.

D'autres de ce qui se dit & conte force choses fabuleuses de telles gens, & de leurs effects, & des apparitions d'esprits, prennent occasion de reuoquer en doute & de mescroire tout ce qui s'en dit, comme si c'estoient toutes choses controuuées. Mais bien qu'il se face force contes fabuleux de ces choses, & que plusieurs prennent plaisir à en controuuer, ce n'est pas pourtant vn argument que tout ce qui s'en dit soit faux, & qu'il n'y ait point de telles gens, ni de malins esprits. Au contraire, il ne se feroit point

point de tels contes, s'il n'y auoit aucun fondement d'iceux., car enuers qui pourroyent ils trouuer aucune creance, si iamais il n'y auoit eu aucune apparition d'esprits, ni aucuns effects estranges de telles gens? Car le mensonge est postérieur à la verité, & ne peut trouuer creance en l'esprit des hommes, que sous quelque fausse apparence de verité. S'il n'y auoit és plantes, és herbes, és pierres, metaux, & autres corps naturels, aucune vertu Physique pour produire diuers effects merueilleux, il ne se feroit pas tant de contes fabuleux de vertus estrangès & prodigieuses de ces choses, comme il s'en void dedans Pline, Solin, & autres tels escriuains. On doit bien apporter du jugement & de la discretion en telles choses, pour discerner ce qui est fabuleux & controuué d'auec ce

M

qui est aueré & attesté par l'expérience , & tesmoignages irreprochables, comme il y en a infinis en telles choses , mais non reietter & condamner vniuersellement de faux, & sans distinction, tout ce qui se dit, & s'est escrit par gens dignes de foy , & qui n'ont aucun interest à controuuer ce qu'ils en ont dit & escrit : autrement il faudra de mesmes nier qu'il y ait iamais eu ni Regnaut, ni Roland , à cause des Romans , & contes d'Amadis qui en ont esté faits.

Les Aduocats des Sorciers pensent bien les pouuoir excuser, premierement en disant , que tout ce qu'ils racontent de leurs Sabbats , & de tout ce qui s'y fait n'est que pure imagination d'un cerueau troublé , & non vne reelle verité ; ce qu'ils maintiennent auoir esté verifié , en ce que quelques vns

d'eux croyans & soustenans auoir esté ainsi transportés, & racontans ce qu'ils y auoyent fait & veu, se sont neantmoins trouuez par effect, auoir esté, durant tout ledit temps couchés en leur lit, ou gisans par la place comme morts, & du tout insensibles, en exstase: d'où ils concluent que tous ces transports ne sont qu'imaginaires.

Secondement, quant aux maux qu'ils pensent faire; d'exciter, pour exemple, les tempestes, & orages, d'enuoyer la vermine dans les champs & maisons, & la mortalité sur le bestail, & des maladies grandes & extraordinaires sur les personnes qu'ils enforcent. Ils les prétendent excuser en disant que le Diable preuoyant ces choses à venir, persuade à ces misérables gens qu'ils les causent, & les font par leurs sortilèges & charmes;

quoy qu'en effect ces sorts n'ayent aucune telle vertu. Mais premierement en cela ils accordent ce que nous demandons, à sçauoir, qu'il y a des demons (d'où nous tirons, par consequence, qu'il y a vn Dieu pour les tenir en bride) & faut de necessité qu'ils l'accordent. Car comment ces gens là sans l'aide du Demon preuoiroyent ils les orages & tempestes, ces vermines & mortalitez à venir, & s'ils preuoiroyent que ces choses deussent aduenir par causes naturelles, comment se mettroient ils en deuoir de les causer, & produire par leurs sortileges? comment se persuaderoyent ils que ce sont eux qui les produisent par leurs charmes? Ioint que ces orages & tempestes sont le plus souuent si horribles, & furieuses, & les effects de la foudre qu'ils excitent sont si

estranges & merueilleux, qu'il est assez euident, que cette foudre n'a pas les mouuemens si bizarres & extrauagans, de causes simplement naturelles, mais qu'il y a quelque cause extraordinaire, & furnaturelle qui la manie&se melle parmy, pour luy donner ces diuerfes agitations, & vire-voutes si estranges.

Et quant aux maux que ces gens confessét de faire, quãd bien leurs forts n'auroyent pas la force, & vertu de les produire, ils ne laissent pas d'estre coupables du mal, pour ce que leur intention & volonté est de le faire, & pour cela ils pactisent avec le Diable pour estre aidés de luy en cela: cette meschante volonté ioincte a ce pact les rend criminels du mal qu'ils font, de mesmes que celuy qui ne se sentant pas assez fort pour tuer son ennemi, implore l'aide d'un autre pour

cela Ces sorts donc estés du moins des symboles du pacté exprés qu'ils ont avec le Diable, & destesmoignages de leur meschante volonté, & de l'effort qu'ils font pour l'exécuter, les criminalisent assez; & moins ces sorts ont de force en eux mesmes, & de vertu Physique pour produire les effets que desseignent les Sorciers, plus est il euidét que de nécessité il y interuient vne cause surnaturelle pour les produire, qui ne peut estre autre que le Diable, avec lequel ils pactisent pour cela. Que si en quelques vnes des choses qu'ils employent pour causer les maladies estranges, & pestilences, dont ils affligent les personnes, & infectent l'air, il y a quelque vertu Physique pour les causer, il faut derechef qu'ils ayent esté instruits, & appris du Diable pour cela, ne pouuans pas eux mes-

mes par aucune estude, ou experience certaine, apprendre ou reconnoistre la vertu que peuuent auoir ces choses qu'ils employent en leurs sorts, estans tous, ou la pluspart, gens grossiers, ignorans, & stupides.

Mais de plus il faut bien de necessité reconnoistre l'efficace de Satan és Deuins & Magiciens, qui deuinent & reuelent les choses cachées, & à venir, qui ne scauroyent par aucun autre art, que par l'aide du diable, leur estre cognuës. Le mesme paroist és choses étranges, & monstrueuses, que les Magiciens font voir, sentir & ouir à ceux qui s'adressent à eux, ces choses ne pouuans estre produites par aucun art naturel, ains par la seule efficace des Demons.

Quant aux extases des Sorciers pendant lesquels ils pensent estre

transportés réellement au Sabbat, & y voir, dire, faire, & patir choses estranges & monstrueuses, quand bien leur transport ne seroit pas reel, & corporel, ains seulement en imagination (ce que plusieurs relations de transports reels, & verifiés tels, dementent,) ils ne laisseroyent d'estre coupables, d'autant que telles extases, & ce qu'ils pensent voir & faire durant icelles, se faisant à l'ayde du Diable avec lequel ils pactisent pour cela, ne peuvent provenir de quelque cause physique & ordinaire, comme ainsi soit que telles causes Physiques n'agissent à la volonté & discretion des hommes, ainsi que ces extases de Sorciers leur arriuent quand bon leur semble, & ne leur arriuent point s'ils ne veulent.

• Finalement, il y en a qui pretendent que tout ce qui se dit de mer-

merueilleux des Sorciers, Deuins, Magiciens, & demoniaques, se fait, & peut faire, par causes Physiques, & y'a des gens subtils, & grands Philosophes, qui ont desployé la force & viuacité de leurs esprits pour demonstrier cela, & amènent pour cela diuers effect's merueilleux, & du tout estranges, prouénans de causes purement Physiques.

Or est il bien vray qu'es corps Physiques il y a de merueilleuses qualités, & propriétés, tant manifestes & connues, que mesmes occultes, pour produire des effect's tres-admirables à ceux qui en ignorent les causes, & ceux qui ont cherché les secrets de la nature le plus auant, ont dressé quelques escrits de la Magie naturelle, ou ils ramassent plusieurs exemples de tels estranges effect's & propriétés, mais tout ce qu'ils en ont escrit pour-

tant n'approche que de bien loin de ce qui conſte eſtre fait par les Sorciers, Deuins, & Magiciens : en quoy il faut reconnoiſtre que ces gens cy ont bien vn autre maïſtre & Docteur que ces autres là , c'eſt à ſçauoir le Diable : car eſtans tous, ou la pluſpart, gens groſſiers & ignorans, ſans lettres, ſans eſtude, & ſans experience, ils ne peuuent pas d'eux meſmes auoir appris à faire ces merueilles , par quelque profonde connoiſſance qu'ils ayēt acquiſe des vertus & proprietés admirables des cauſes naturelles, deſquelles ils ne ſçauroyent diſcourir, ni rendre aucune raiſon pertinente. Ce qui monſtre euidentement que ce qu'ils en font n'eſt point par aucun ſçauoir ſublime des vertus occultes des choſes naturelles, mais que le tout eſt par l'aide & miniſtere du Demon , qui meſme ne leur

enseigne pas ces vertus, mais se sert seulement d'eux comme de gens avec lesquels il pactise pour la production de telles choses, desquelles ils ignorent entierement les causes.

Tous les corps naturels sont tellement composés qu'ils ont des qualités & propriétés, par lesquelles ils agissent les vns sur les autres, ou patissent mutuellement les vns des autres, d'où viennent les sympathies, & antipathies naturelles, occultes ou manifestes, qui se rencontrent entr'eux. De ces vertus & propriétés viennent toutes les alterations & changemens, transmutations, & effets qui se voyent en la nature : & qui cognoistroit toutes ces qualités, & vertus exactement, & pourroit appliquer selon cette connoissance, *agenti a patientibus*, il produiroit sans doute des effets du tout estranges & mer-

ueilleux à ceux qui en ignoreroient les causes : ce que sçachans & pouuans faire les Demons par la connoissance tres-exacte, & comme parfaite, qu'ils ont de la nature, qualités, vertus & propriétés de toutes choses naturelles, & par leur actiuité & promptitude de mouuement, tout à fait à nous imperceptible, ce n'est point de merueilles s'ils font par les mains, des Sorciers, Deuins, & Magiciens, leurs ministres, tant de choses si estranges qui rauissent les hommes en admiration.

On tient communement, & peut estre non sans raison, que toute l'operation des Demons consiste en leur mouuement local, par lequel premierement ils se transportent d'un lieu à autre quoy qu'esloigné, comme en vn moment, ou temps imperceptible, Secondement, ils

meuvent, & transportent les corps
Phyiques pour grands, estendus,
& pesans qu'ils puissent estre, avec
vne force incroyable. En troisiéme
ils meslent, & comme pestriissent &
confondent ensemble diuers corps
par cette mesme force & vertu qui
est en eux. En quatriéme ils se mes-
lét & incorporent en quelque fa-
çõ eux mesmes en eux, & leur don-
nent par là tels mouuemens qu'il
leur plaist. En cinquiéme ils hebe-
tent, stupefient, diminuent, ou ren-
forcent, aiguifent & animent,
les qualités, vertus, & propriétés de
chaque chose. Car par ce moyen
cognoissans parfaictement toutes
les vertus, & propriétés de chaque
corps, & pouuans par leur actiuité,
& mouuement local, appliquer
comme en vn moment, *quod libet*
agens cuilibet patienti, ils font aise-
ment tout ce qui se dit d'estrange

& merueilleux des Deuins, Sorciers, & Magiciens, & se peut dire, selon cela, que le tout se fait par causes naturelles, pour ce qu'il se fait, comme à esté dit, par l'application de causes naturelles, mais application qui ne se peut faire par les seuls Magiciens & Sorciers, sans l'aide des Demons, tant parce que lesdits Sorciers & Magiciens estans d'ordinaire gens rudes, grossiers & ignorans, n'ont pas vne telle connoissance des vertus & propriétés de chaque chose, & quand ils seroyent cent fois plus sçauans, & experimētés qu'ils ne sont, ils ne sçauroyent en auoir vne si grande qu'il est de besoin pour faire les choses qu'ils font: & quant ils l'auroyent ils ne sçauroyent pas appliquer, *agentia patientibus*, avec la promptitude, adresse, & habileté nécessaire, pour la production de

tels effects : si bien que pour ces effects, quoy que produits par causes naturelles, il est de besoin de la connoissance, actiuité, & promptitude totalement incroyable des Demons.

Car par exemple, par quelle cause naturelle scauroit vn deuin connoistre les choses cachees qu'il reuele, & qui se sont faites en temps & lieux bien esloignés de luy, & le plus souuent hors de la connoissance de toute autre personne, que de celuy qui les a faites; comme est la reuelation des meurtres, assassins, empoisonnemens, violemens, adulteres, largins, &c. Et par quelles causes naturelles s'est il peu faire qu'à Rome en plein marché, deux Caualliers, en guise de Castor & Pollux, ayent autre fois annoncé au peuple Romain la victoire obtenue par leur Consul en Macedone,

au mesme temps , ou peu d'heures apres , que la bataille fut gaignee ? Et par quels moyens naturels peut vn lacquais à pied faire en peu d'heures cent ou deux cent lieues de chemin , que les plus habiles postillons ne scauroyent auoir fait qu'en plusieurs jours : & mille autres sēblables effects merueilleux. Ainsi donc il paroist (de ce dont il conste que les Sorciers, Magiciens & Deuins ont accoustumé de faire) qu'il y a des Demons qui font proprement ces choses là, & dont lesdits Sorciers sont simplement instrumens.

Or s'il y a des mauuais Demons il n'y a nulle raison de nier qu'il y en ait de bons. Car le bien precede le mal, le mal n'estant qu'une corruption du bien : d'où il faut de necessité que ces mauuais Demons ayent esté premierement bōs, mais qu'ils

qu'ils se sont puis apres corrompus. Que s'il y a de bons & mauuais Anges, il faut reconnoistre au dessus d'eux vne Diuinité, de laquelle ils ayent leur estre, & qui les tiennent en bride & les conduise. Autrement de la contraste perpetuelle qu'il y auroit entre les vns & les autres, arriueroit necessairement la ruine de cette machine du monde, sur chacun des corps de laquelle ils ont tant de pouuoir. Et puis, quel suiet, ou raison y a il de nier vne Diuinité, apres auoir accordé des bons & mauuais Anges, qui sont substances spirituelles, immaterielles, inuisibles & immortelles, actiues & puissantes, & intelligentes. Car au dessus de cela il n'y a plus que la Diuinité, de laquelle ils approchent fort, & qui les surpasse en ce qu'elle est infinie, immense, & eternelle.

N

Derechef s'il y a des mauuais demons, ou diables, il y a vn Enfer pour les loger, & seruir de chartre à eux & aux meschans & scelerats, qui les suiuent & imitent en leur meschanceté: & s'il y a des bons Anges, il y a vn Paradis pour leur demeure, & pour celle des gens de bien, & vertueux qui leur ressemblent, & par dessus tous il faut que il y ait vn Dieu, iuste iuge, remunerateur des vns & vangeur des autres.



CHAP. XII.

Raison neuſiême, tirée du consentement de tous les hommes du monde, qui recognoissent vne Diuinité.

LA seconde sorte de preuve contre les Athées est l'autho-

rité ou tesmoignage , lequel est double, Diuin ou humain, i'appelle le tesmoignage Diuin celuy, qui est tiré des sainctes lettres , i'appelle tesmoignage humain, mais irrefragable pourtant , le consentement de tous les hommes du monde, qui reconnoissent tous naturellement vne Diuinité & Prouidence. Et icy faut considerer, premierement, que tous les premiers & plus anciens Philosophes, & les plus grâds & illustres hommes en sçauoir, doctrine & vertu , desquels il y a memoire és histoires, ont reconnu vne Diuine Prouidence qui void, connoist, & conduit toutes choses, remunerer les vns & chastier les autres. Secondement, tous les peuples & nations de la terre , qui sont & qui ont jamais esté, ont reconnu ceste mesme verité. Ce qui paroist parce qu'il n'y en a jamais eu au-

eune qui n'ait eu quelque religion, ou bien au lieu d'icelle vne ouuerte & manifeste communion, & comme conuersation familiere & ordinaire avec les mauuais Demons, comme sont ces nations sauvages & abruties de Toupinambous & Margajas, de Carybes & Canibales, de Patagons & autres semblables, & ces nations Septentrionales qui approchent le plus de nostre Pole Arctique en l'Europe, Asie & nouveau monde, comme il conste par les relations qui en sont aujourd'huy assez conuës & vulgaires.

Or auons nous cy deuant, prouué que s'il y a des Demons il y a vne Diuinité, & par consequent ces nations là reconnoissans les Demons, par la Communication qu'ils ont avec eux, tacitement aussi reconnoissent, ou sont contrains

d'aduoüer, qu'il y a vne Diuinité. Toute religion aussi presuppose necessairement vne Diuinité, car elle est toute employée au seruice & cult d'icelle, & à se la rendre propice & fauorable, & obtenir d'elle ou la jouissance des biens qu'on desire, ou l'immunité & deliurance des maux qu'on craint, ou qu'on souffre, soit en ceste vie, ou mesme en l'autre : & ce par prieres & inuocations, reconnoissances & actions de graces, ou par sacrifices & autres ceremonies, qui est le but de toutes les religions.

N'y ayant donc iamais eu peuple ou nation, soit ciuilisée & policée, comme autres fois les Grecs & Romains payens, les Caldeens, Babylo niens, Assyriens & Perses, les Syriens, Pheniciens, Egyptiens, ou mesmes Barbares, (comme les Schytes, Africains & infinis au-

ries,) qui n'ait eu & exercé quelque Religion, il est evident de là, que tous vniuersellement ont reconnu vne Divine Prouidence.

Quand à la force & validité de ceste preuue, elle est, comme nous auons dit, irrefragable, si on peut monstrier qu'il n'y a aucune juste ny legitime raison, ou cause de soupçonner, ou renouer en doute, ce tesmoignage. Voyons donc s'il y a subject d'en douter. On peut estre induit à croire vne opinion faulxe par trois voyes. 1. Par affection & desir que nous portons à la chose. 2. Par authorité. 3. Par raisons colorées & trompeuses: mais pas vne de ces voyes & raisons ne quadre à ce dont il est question. Quand est de la premiere, il y a vne telle liaison entre l'entendement & la volonté, que comme la volonté suit le iugement de l'entende-

ment, tellement qu'elle desire & affectionne ce que l'entendement juge estre bon, ainsi de mesme nous persuadons nous aisement ce que nous desirons passionnément ; l'homme estant par ce desir porté à chercher toutes les raisons par lesquelles il se peut persuader la vérité ou bonté de ce qu'il desire, & par ce sien vehement desir donnant poids & force aux plus futiles.

Mais on ne peut pas dire icy que les hommes se persuadent qu'il y ait vn Dieu parce qu'ils le desirent, car tout au rebours, la plus part des hommes voudroient bien qu'il n'y en eust point, pource qu'ils l'aprehendent pour juge. Il y a bien plustost tout subject de soupçonner l'opinion des Athées de fausseté par ceste raison là, & de justement excepter contr'eux qu'ils ne se la persuadent sinon parce qu'ils

la desirer estre vraye, & que ce vehement desir qu'ils ont leur fait prendre les plus foibles & futiles raisons pour bonnes & solides demonstrations.

Quant à l'autorité, on croit quelques fois vne chose pour le seul respect que l'on a aux personnes qui la disent, & ce à cause ou de leur suffisance & habileté, laquelle nous croyons estre en eux, ou de l'eminente autorité & puissance en laquelle ils sont constitués & établis; ce qui à lieu es choses qui ne nous importent gueres qu'elles soient, ou ne soyent pas, & ou nous ne voyons pas de raisons qui nous prouvent ou dissuadent le contraire.

On ne peut pas dire que les hommes ayent esté induits à croire vne Diuinité & Prouidence, par la seule autorité & respect de quelques

personnes qui ayent premierement mis cela en auant , quoy que sans raison ny fondement. Car qui est ce qui a jamais esté au monde reconnu de tous hommes vniuersellement de si grande suffisance, sçauoir & habileté, que par son seul respect tous ayent esté induits à croire vne telle chose si grande & si importante aux hommes. Car outre qu'Aristote (ou Platon) qui est estimé le plus grand & sçauant Philosophe, qui ait iamais esté, n'est pas connu de nom seulement, de la milliême partie des hommes, il est certain que pas vn de ceux qui croyent vne Diuinité n'aduoüera la croire par sa seule autorité, ains seulement parce qu'il est persuadé au dedans de ceste verité par des raisons qu'il sçait & connoist en luy mesme, ores que bien souuent il ne s'en puisse pas bien exprimer.

Et quand à l'eminence ou dignité, il n'y a jamais eu aucun qui ait commandé à tout le monde, & qui ait peu par son autorité enioindre ni persuader aux hommes de croire vne Diuinité. Ioint que ce qui se croit ainsi, & est reçu par simple autorité, doit estre de chose qui ne nous importe pas beaucoup qu'elle soit ou qu'elle ne soit pas vraye : ce qui ne se peut dire de la Diuinité & Prouidence, n'y ayant rien de plus important ny qui touche de plus près l'homme.

Mais on dira peut estre que ceste opinion s'est ainsi espāduë comme par vne tradition receüe de main en main, & s'est de mesme propagée jusques icy. Or est il bien vray que le premier homme Adam à enseigné à ses enfans ceste verité, & ceux là aux leurs, & ainsi consequemment, & que par ce moyen

ceste creance s'est peu espandre au long & au large parmi tous peuples & nations. Mais, premierement, bien qu'il ait ainsi enseigné sa posterité, ce n'est pas à dire que tous l'ayent creu & receu cela pour assuré, car il y en a tousiours eu de mauuais, qui n'ont pas fait cas des enseignemens de leurs peres, & ceux là mesme ne se seront pas souciez de faire passer cet enseignement à leur posterité, & par ainsi ceste pretendüe tradition de main en main aura esté en plusieurs lieux interrompuë & accrochée : si bien qu'il faut que ceste vniuerselle creance d'une Diuinité vienne d'ailleurs que d'une telle tradition & simple institutiõ; joint que ceste chose est par trop importante pour estre creüe sur le seul dire & simple institution de nos Peres, qui peut bien donner quelque occasion à la

recerche de ceste verité, & peut estre quelque pente & inclination à nos esprits vers icelle, mais ne peut pas estre le seul & vray fondement d'une creance si ferme & enracinée.

Secondement, quand à ceux contre lesquels nous disputons, qui tiennent l'éternité du monde, comment gardas ceste hypothese peuvent ils excepter que ceste opinion est venue de main en main par tradition. Car ie leur demande s'ils estiment qu'elle ait esté de tousiours, de mesme que le monde, ou bien si elle à eu quelque commencement : derechef si elle à esté de tousiours, ie demande si elle à esté vniuerselle en tous hommes, ou si ç'a esté en quelques vns seulement. S'ils disent qu'elle à tousiours esté vniuerselle, il s'ensuit qu'elle est donc naturelle, &

partant vraye, & la leur par consequent fausse; si elle n'a pas esté vniuerselle, mais neantmoins eternelle, elle doit estre estimée du moins aussi naturelle & vraye comme la leur, puis qu'elle à de tout temps eu ses fauteurs & sectateurs aussi bien que la leur.

Mais ces deux opinions estans contradictoires, elles ne peuuent pas estre toutes deux esgalement vrayes, ni par consequent esgalement eternelles; & partant faut de necessité que l'une soit vraye & l'autre fausse, & ainsi l'une premiere & l'autre posterieure, la verité estant tousiours premiere que le mensonge, qui n'en est qu'un desguisement, & esgarement d'icelle.

Icy donc, diront ils, que la leur est la premiere & eternelle, & l'autre posterieure venuë long-temps depuis? Si cela est tous les hom-

mes donc vniuersellement auront, par siècles infinis, tenu constamment leur opinion qu'il n'y a point de Dieu, d'où sera donc venu en l'esprit d'un homme le contraire de ce qui auoit esté ainsi de tous-jours constamment creu & tenu, & comment aura il peu s'imaginer de le pouuoir persuader à aucun? voire comment se fera il peu faire que tous les hommes soyent passés ainsi en l'opinion contraire, sinon qu'on ait reconnu par raisons fortes & inuincibles la fausseté de l'autre?

Ainsi doncques ne s'est il peu faire, ny selon leur hypothese, ny selon la nostre, que ceste creance se soit ainsi vniuersellement estendue, & generallyment receüe de tous par simple tradition & pure institution de qui que se soit, ains faut de necessité qu'elle vienne de

ce qu'on à reconnu la force des raisons inexpugnables sur lesquelles elle est fondée, & l'euidence d'icelles.

Mais les Athées volontiers diront qu'elles ne sont que fardées & colorées, captieuses & non solides: mais il n'y a nulle apparence de les soupçonner telles. Car comment est ce que ce qui n'a que l'apparence, sans la solidité, auroit peu abuser tous les hommes du monde vniuersellement, & si constamment, depuis tant de siècles, sans que personne se soit trouué, en vne si grande multitude, qui en ait démontré & conuaincu la vanité & futilité? Est il possible qu'entre tant de grands esprits & si admirables, remarqués par les histoires, il ne s'en soit point trouué qui ait mis en euidence la pretendüe fausseté de ceste opinion, & la foiblesse & va;

nité des raisons sur lesquelles on l'appuye, & deliurer par ce moyen le monde des terreurs que la conscience de leurs crimes leur donne par la consideration & creance d'une Diuine Prouidence : ce qui auroit sans doute trouué vne facile creance enuers tant d'hommes ainsi affectés.

Mais on dira peut estre qu'Epicure & ses disciples ou sectateurs, & quelques autres auparauant luy, ont fait cela, enseignans l'Atheisme, & les raisons qui le persuadent. Or ces gens là ont eu à la verité assez d'esprit, & de bonnes raisons, pour se moquer des vaines superstitions, & folles & extrauagantes opinions de la religion Payenne, de la multitude de leurs Dieux, des impertinens & fabuleux contes, qui auoyent cours parmy le peuple, & des fausses imaginations qu'ils

qu'ils auoyent de l'estat des morts soit és Enfers , ou és champs Elisées ; Mais il ne se trouuera point qu'ils ayent de fortes raisons & solides , pour demonstrier qu'il n'y a point de Prouidence. Et les profanes d'aujourd'huy , qui pensent auoir raffiné l'Atheïsme au dernier point, se trouueront aussi courts en leurs preuues si elles sont examinées serieusement par les reigles de la droite raison : & se trouuera que ce qu'ils sont estimés & passent pour esprits forts, n'est pas tât pour la force & solidité de leurs raisonnemens , que pource que rien ne leur est trop chaud ne trop froid, & qu'il n'y a absurdité si grande qu'ils ne digerent facilement , & qu'ils n'admettent aisement; semblables aux estomacs forts d'Austruches qui digerent quoy que ce soit qu'on leur donne.



Et icy faudroit entrer en discussion & comparaison de leurs prétendues raisons avec celles qui iusques icy ont esté produites & alleguées contr'eux, pour iuger quelles sont les plus fortes, mais cela nous emporteroit dans vn autre traitté, ou nostre dessein n'est pas maintenant d'entrer, nous en examinerons à la fin de ce traitté quelques vnes. Ce qui à esté dit iusques icy contr'eux, estant bien pesé, se trouuera si conforme à la droite raison que si leur opinion est vraye il faut de necessité qu'ils disputent autrement que par la raison, & qu'ils soyent bien esleués au dessus d'icelle, & eux par consequent beaucoup plus qu'hommes.

Mais quand bien leurs raisons seroient également fortes, (ce que non) tousiours l'aduantage seroit de nostre costé, premierement, pource qu'outre les raisons nous

auons ce consentement vniuersel qu'ils n'ont pas: secondement, pour ce que quand il n'y auroit point de Dieu, il n'y a point de danger, & peu ou point de perte, à en croire & seruir vn, mais s'il y a vn Dieu, les Athées, pour ne le pas croire & seruir, sont en hazard d'auoir l'Enfer pour leur partage.

Vne chose peut estre obiectée contre ce consentement vniuersel de toutes nations. C'est qu'il y a des erreurs & opinions fausses qui neantmoins ont aussi esté vniuersellement creuës & receuës de toutes, ou de la plus grande part des nations de la terre, comme est pour exemple, l'idolatrie, & multiplicité de Dieux des Payens, & entre les nations & peuples plus policez, tels qu'ont esté les Grecs & les Romains, la paillardise & le peché contre nature n'ont pas quasi esté

estimez vices, & y a eu des nations & peuples entiers ou le vol & larcin, notammét sur ceux d'un autre peuple, n'estoit pas estimé crime ni peché.

Mais la réponse à cela n'est pas malaisée. Car premierement ces erreurs & abus, quoy que fort generaux n'ont point esté pourtant ni si constans & perpetuels, ni si vniuersels comme la creance d'une Diuinité. Car le Christianisme à en fin aboli le Paganisme, en vne bonne partie du monde, & à esté encore bien plus espandu autrefois qu'il n'est maintenant. Et le Mahumetisme, Iudaïsme, avec le Christianisme, qui tous trois tiennent constamment vn seul Dieu, comparez avec le reste du monde qui demeure encore plongé dans l'idolatrie Payenne, font peut estre bien prés de la moitié des hommes

qui sont sur la face de la terre. Or l'opinion d'un seul Dieu, telle que la tiennent les Chrestiens, Juifs Mahometans est plus esloignée & contraire, ou opposée à l'Atheisme, que nō pas l'idolatrie Payenne. Comment donc si l'Atheisme est vray, s'est il peu faire que l'opinion des Chrestiens, Juifs, & Mahometans, qui tiennent un seul Dieu, ait peu ainsi preualoir par dessus celle des Payens plus approchante beaucoup de l'Atheisme? veu mesmes que le Christianisme, qui à precedé le Mahometisme, & sur lequel Mahomet à basti sa Religion, ne s'est propagé que par la patience & souffrance des professeurs d'iceluy, qui par tout ont esté exposez & abandonnez à la furie & persecution des Payens?

2. L'Idolatrie & superstition Payenne est vne opinion trop plus

accommodée au sens de nostre chair, & que l'homme corrompu desire & aime naturellement trop plus que non pas celle d'un seul Dieu, tel que le reconnoissent les Chrestiens & Mahometans. C'est pourquoy (comme nous avons remarqué cy dessus) ce n'est pas de merueille si cet erreur s'est merueilleusement estendu & prouigné, puis que nous nous persuadons volontiers, & aisément, les choses que nous desirons & voulons grandement. Mais ceste mesme chair repugne au contraire, & resiste tant qu'elle peut, à la creance d'un seul Dieu qui iuge & gouverne le monde, & rend à chacun selon ce qu'il a fait. Comment donc l'opinion d'un seul Dieu a elle preualu contre l'idolatrie & superstition Payenne, & se maintient elle encore si puissamment contre

tant d'Athées d'aujourd'huy, veu
que nous nous armons & deffen-
dons tant que nous pouuons, con-
tre ce que nous refuyons & crai-
gnons ?

3. L'Idolatrie & superstition
Payenne est vne alteration & cor-
ruption de l'opinion d'une Di-
uinité, & qui la presuppõe ne-
cessairement comme son fonde-
ment, & alteration, encore (comme
ie vien de dire) merueilleusement
accommodée au sens corrompu de
nostre chair, en comparaison de la
creance d'un seul Dieu; c'est pour-
quoy ce n'est pas de merueille si
l'opinion d'une Diuinité estant si
vniuersellement receüe, & si fer-
mement enracinée au cœur de
l'homme, celle de l'idolatrie &
superstition Payenne, (qui flatte la
chair) s'est aussi presque ainsi vni-
uersellement espandue. Mais l'o-

pinion d'une Diuinité n'est pas une corruption & alteration en pis de l'Atheïsme, c'est tout le rebours, & ceste creance d'une Diuinité ne flatte pas la chair, comme fait l'Atheïsme. C'est pourquoy la creance d'une Diuinité n'a peu ainsi vniuersellement gagner sur l'esprit de tous hommes, sinon par sa propre force & vertu, qui consiste en la verité, qui est plus forte que tout. Et y a dequoy s'estonner (& dont les Athées ne rendront iamais aucune pertinente raison) comment si l'Atheïsme est vray, il n'a point esté si vniuersellement receu, comme son contraire, ains au rebours presque tousiours par tout, entre les Payens mesmes, à esté abhorré & refuy de tous.

Quant a ces autres abus, de la Paillardise, Larcin & peché contre nature, & autres choses sembla-

bles, outre que toutes les plus honnestes gens en chaque nation ont reconnu en ces pechez là de l'ordure & iniustice , lors qu'ils en ont parlé de sens rassis (bien que le plaisir corrompu de la chair , & le sens depraué de la convoitise , leur ait aucuglé l'entendement pour se laisser aller à l'abandon de ces vices sans grād remors) c'est qu'il n'en est pas de ces erreurs là , comme de la creance d'une Diuinité, car ces vices là flattent & plaisent à la chair, & pour ce les hommes se les persuadent volontiers , mais la creance d'une Diuinité combat le sens de la chair (qui se persuaderoit volontiers, si elle pouuoit, le contraire) & neantmoins elle l'a forcé & contraint d'y assentir , ce qui ne se peut que par la force de la verité.

De ce que dessus il est euident que le consentement , si constant

& vniuersel, de tous hommes à croire & tenir, mesme contre leur gré, qu'il y a vn Dieu & vne Providence, est vn argument indubitable de ceste verité là, & de la deprauation de l'homme, par laquelle il est decheu de sa premiere nature & origine, selon laquelle il estoit joint & vni à Dieu, auquel il estoit conforme en verité, justice & sainteté, comme crée à son image, & duquel il est maintenant séparé & esloigné par son iniustice, souillure & peruersité, qui l'encline & porte à denier ceste Providence, laquelle il apprehende comme son juge.

Contre ceste mescreance & infidelité de l'homme, Dieu n'a point voulu se laisser sans tesmoignage, ains s'est si viuement empreint & graué en ses ouurages que l'homme, malgré qu'il en ait, est con-

traint de l'y reconnoistre : & ce pour conuaincre & retirer l'homme de son erreur, & justifier la Iustice de ses procédures, & la droiture de ses iugemens, à l'encontre de son impieté. Et de ceey paroist la validité de ce tesmoignage, contre lequel rien de solide ne peut estre iustement excepté, comme estant vn tesmoignage non simplement humain, & procedant de la seule fantaisie ouyolonté de l'homme, mais en effect Diuin, comme estant vn mouuement de la nature, & vn enseignement de la raison, & ou se trouue veritable, si en aucune autre chose, ce dire commun, *Vox populi vox Dei*. Mais de ce tesmoignage humain venons à celuy qui est directement Diuin.



CHAP. XIII.

*Derniere preuve, tirée du tesmoi-
gnage des saintes Escritures,
desquelles la Divinité est prou-
vée contre les Athées.*

PAR dessus donc toutes ces preuves & raisons est celle qui est tirée du tesmoignage des saintes Escritures, contenuës és liures sacrez du Vieil & Nouveau Testament, lesquelles n'enseignent & n'inculquent par tout autre chose qu'un seul vray Dieu, Createur du Ciel & de la Terre, quel il est, ses vertus, ses perfections, ses propriétés & qualitez, ses œuvres, tant de la creation & conduite du monde, que de la redemption des hommes, ses conseils & desseins, & Ar-

rests de sa volonté touchant le genre humain, le salut des vns & condamnation des autres; Item l'honneur, le respect, le service & cult que nous luy deuons, & qu'il demande de nous, ce que nous deuons craindre, ou esperer & attendre de luy, bref le vray & vnique moyen d'estre parfaictement & eternellement bien-heureux, qui est ce que tous hommes appetent & desirent naturellement, & à quoy tendent & abboutissent toutes leurs actions.

Tellement que si ces liures sa-
erez sont vrais, & ne sont point for-
gez ni controuuez à plaisir, par au-
cune ruse, ou artifice, ni malice
d'hommes fourbes & trompeurs, il
est euident & indubitable qu'il y a
vn Dieu, & qu'il est tel qu'il nous
est là descrit. A quoy les Athées n'ont
autre chose à repartir sinon ceey,

Qui nous cautionnera le dire de ces Escriuains là ; & que leur dessein n'ait esté de nous en faire à croire , & d'en donner à garder ? *Moyse*, disent ils , *le premier de ces Escriuains*, dit beaucoup, mais ne prouue rien, voulans dire que c'est vn conteur de fables , qui en veut estre creu à son mot. Et vn autre d'entr'eux à dit de nostre Seigneur Iesus Christ, que pour donner poids à sa doctrine, & porter les hommes à la mieux receuoir , il s'est (mais à faux tiltre) dit estre fils de dieu, voire Dieu mesme. Ces gens là s'imaginent , & veulent faire croire au monde, qu'il en est de ces diuins escriuains, comme de Numa Pompilius qui rapportoit ses Loix, & ses liures, à la Diuinité d'une Nymphe *Ægeria*, avec laquelle il feignoit communiquer familièrement, & comme Mahometh dit auoir receu

son Alcoran de l'Ange Gabriel.

Mon dessein n'est pas d'enfoncer ceste matiere, & prouver au long, contre telles gens, la Divinité des saintes Escriptures, c'est vn subiect trop ample pour l'estroicte enceinte de ce petit Traicté. Ioint que ce seroit, *actum agere*, veu que tous ceux qui, soit entre les saints Peres de l'Eglise primitiue, soit entre les doctes Theologiens, & grâds esprits depuis deux cens ans, ont demonstté la verité de la Religion Chrestienne cõtre la payenne, & cõtre toutes sortes de sectes excitées depuis, commencẽt par là, comme estant la base, le pivot, & le fondement de la vraye Religion; lequel, soit à dessein, ou sans y penser, est abandonné, & comme trahi laschement à ces gens là, par ceux qui pretendent que l'Escripture n'a aucune autorité ni creance en-

uers nous , sinon à cause du témoignage que luy rendēt ceux qui se disent l'Eglise. Car mise à part l'Ecriture, ces gens là qui s'appellent l'Eglise ne scauroient démonstrer leur prétenduë infailibilité, ni prouuer & persuader au monde, qu'ils soyent tels qu'on les doiue croire à leur mot, & simple parole, de tout ce qu'ils disent, comme on peut verifïer & démonstrer aux Prophanes la verité & diuinité des saintes Escritures par elles mesmes.

Je me contenteray seulement pour closture de ce petit Escrit, de quelques considerations generales, par ou on pourra reconnoistre la futilité & vanité de ceste friuole exception, & fausse accusation des Athées, que l'Ecriture sainte n'est qu'un songe & inuention des hommes, sans fondement certain de verité.

Il y a donc quatre choses principalement qui demonstrent l'impertinence de ceste exception, c'est à sçauoir. 1. La qualité & condition. 2. Le nombre & diuersité. 3. Le but & la fin des sacrez Eseritains, & finalement, la nature & qualité des choses qu'ils escriuent. Car de tout cela, bien considéré, il est euident que les choses que ces gens ont escrites ne sont point bout des & suppositions qu'ils ayent forgées pour les faire à croire au monde. Je ne toucheray que sommairement ces quatre chefs, laissant à qui voudra de les dilater & amplifier selon le besoin.

Et quant au premier, ceux qui se meslent du mestier de fourbes & forgeurs de contes à plaisir, ce sont ordinairement gens cauts, subtils, rusez & malins, & avec cela de condition basse ou medioere, mais

les esprits grands, hauts & releuez, les courages Heroïques & magnanimes, les Roys, grands Princes & Monarques, les personnes de rare & exquis sçauoir, & d'vne haute & sublime sagesse, ne se rauallent pas à vn si vil & indigne mestier qu'est celuy des fourbes & hableurs. Et les gens rudes, grossiers & ignorans, & de condition par trop basse & abiecte, ne sont pas propres ni assez habiles pour forger & controuuer, & pour donner couleur à leurs inuentions, pour les persuader & faire receuoir. Or entre les Escriuains sacrez il y en a de ces deux sortes. Il y a des Roys & Princes, des grands Capitaines, & conquerrans, & des personnages eminens en dignité & autorité, en sçauoir & sagesse incomparable.

Vous y auez vn Iosué, l'vn des grands Capitaines, & magnanimes

conquerans , qui ait jamais esté.
Vous y auez vn Dauid , l'vn des
plus braues, genereux, & glorieux
Roys en prouesses, batailles, faicts
d'armes & victoires, qui se soit ja-
mais veu. Vous y auez vn Salomon
le plus riche, magnifique, splendi-
de, & le plus sage Roy qui fut on-
ques au monde. Vous y auez vn
Daniel, premier & principal Offi-
cier au Palais de la plus grande
Monarchie du monde, en qui s'est
trouué plus de vraye, haute & su-
blime sagesse qu'en tous les sages
de la nation & Monarchie dont
il estoit Officier. Vous y auez vn
Mardochée & vn Nehemie grands
& puissans & des premiers dans la
Cour des Roys de Perse, qui nous
representent leur propre histoire.
Vous y auez vn Iob, grand, riche,
& puissant homme en son temps,
plus grand encore en probité, en

patience & grandeur de courage incomparable , qui nous raconte son histoire , & les admirables discours tenus entre luy & ses amis à l'occasion de son infortune. Bref, vous y auez vn Moyse, le plus ancien de tous ces Eseriuains, nourry en la Cour du Roy d'Egypte , instruit en toute la sapience des Egyptiens, estimez de tousiours pour leur sagesse par dessus tous les autres peuples de la terre , mais depuis , & de plus doüé & rempli d'une autre bien plus haute & sublimé sagesse , qui paroist & reluit par tout en ses escripts , au pres duquel tous les plus grands & sages Legislatéurs renommez entre les Payens, sont moins que des enfans, quoy qu'ils ayent appris en son Eschole ce qu'ils ont de plus beau & de meilleur.

Des gens de ceste nature & trem-

pe, de ceste qualité & condition, d'un si grand & releué courage, si nobles & si glorieux, si sages & si prudens, sont ils pour se ravalier si bas que de s'amuser à escrire & forger eux mesmes les premiers, ou à suiure, cōfirmer & entretenir les impostures & fourbes d'autres, qui les auroient deuancés. Cesar & Alexandre, Scipion & Caton, Aristote & Platon, & autres semblables gens, eminens en sçauoir, sagesse, vertu, grandeur, richesse, & puissance mondaine entre le Payens, se sont ils amusez à ce beau mestier de fourberie & matoiserie?

D'autre costé vous auez entre les auteurs & escriuains du Nouveau Testament nostre Seigneur Iesus Christ le premier, de qui tous les autres ont appris & puisé, qui (s'il n'est en effect ce qu'il s'est dit estre, à sçauoir le fils de Dieu)

n'a esté que fils d'un pauvre Charpentier & d'une bien simple fille du plus bas populaire. Ses Disciples & Apostres, pour la plus part, pources pescheurs, gens simples, rudes, grossiers & ignorans, comme ont accoustumé d'estre telle sorte de gens, & comme il paroist par leur propre histoire és Euangiles, avant qu'ils fussent imbus de ceste sapience d'en haut, qui leur est venuë du Ciel. Des gens tels que cela, & de ceste maille là, estoient ils propres à seduire & tromper tout le monde par leurs pretenduës impostures, & cela contre toute la plus forte & aspre resistance que toutes les puissances de la terre y ont faite par persecutions les plus sanglantes & horribles, & par le sçauoir, doctrine & subtilité des plus grands Philosophes, qui ont combattu tât qu'ils ont peu le Christianisme ?

Quelle grande ruse, & finesse, quelles puissantes raisons & fortes persuasions ont peu partir d'esprits si bas, de personnes si abiectes, d'hommes si mesprizez, qui ayent esté capables de surprendre & abuser tout le monde, d'amener captive à l'obeissance de Christ toute pensée d'homme, de tout aage, sexe, condition & qualité, abbatre & ruiner de fonds en comble le Paganisme si enraciné par tant de siècles és esprits des hommes, & maintenu par l'autorité de toutes les puissances superieures de la terre? Et encore de porter les hommes, & les faire resoudre avec joye, à la perte de leurs biens, honneurs, estats, estime & reputation, de leur vie mesme, & de tout ce qu'ils ont de plus cher icy bas, voire à soustenir les plus horribles & exquis tourmens du corps (dont les exem-

ples se voyent és Martyrs, de tout aage, sexe & condition, de tous peuples & nations, en tous lieux, partout le monde, & par longs siècles) pour le maintien d'une fourbe (si on en croit les Athées) ridicule & absurde, sur l'esperance d'une pretenduë imaginaire felicité apres ceste vie, de laquelle ils ne donnent autre caution que la promesse de ce pretendu fils de charpentier. Comment, est-ce que des gens ainsi faits ont peu se persuader de pouvoir gagner & attirer le monde à eux, l'enjoller de leurs songes & refueries? Certes il faut bien reconnoistre en cecy la force invincible de la verité, & le doigt & vertu de Dieu, qui à agi & s'est desployé en cest œuvre si admirable. La qualité donc & condition de ces sacrez Escriuains, ne comporte pas que ce soient fourbes, & for-

geurs de contes & fables. Et voila pour le premier chef, qui se pourroit bien dilater plus au long.

Quant au second, qui est le nombre & la diuersité de ces Escriuains, il arriue rarement, ou point du tout, que plusieurs & diuers esprits sans concert ni communication, cōspirent & s'accordent bien ensemble à forger, ou maintenir & entretenir, vne mesme fourbe, car l'esprit de l'homme, par l'amour demesuré qu'il se porte naturellement à soy mesme, est merueilleusement diuers & mal accordant aux pensées, inuentions, & imaginations d'autrui, chacun voulant s'en faire à croire, & paroistre aussi bõ & industrieux inuenteur qu'un autre. D'où vient que tous ces faiseurs de Romans d'aujourd'huy, ont tous leurs inuentions separées, & nul presque ne poursuit l'inuen-

tion & dessein d'un autre. Mais les Escriuains sacrez sont plusieurs en nombre, de temps & de lieux tres-differens, depuis Moyse jusques aux Apostres, il y a pres de deux mille ans, durât lequel temps, tantost en un siecle, tantost en un autre, & en diuers lieux, personnes de differentes sortes, conditions & qualitez, Roys, Princes, Seigneurs, Capitaines, Courtisans, Docteurs, simples & menus gens, pescheurs, artisans, & peagers, tous s'accordent à proposer, maintenir & defendre vne mesme pretenduë fourbe, d'un seul Dieu createur du Ciel & de la terre, &c. & à nous représenter l'histoire d'une petite, mais admirable & tres-illustre nation (qui se void & subsiste encore aujourd'huy espanduë par tout le monde) avec vne liaison & texture si iuste, depuis son premier

commencement par l'espace de plus de deux mille ans. Et cela si constamment, si vniformement, & si concordamment que rien ne se choque, ni ne se dement.

Vn si admirable & constant accord en tant de personnes & testes si differentes, separées de temps, de siecles & de lieux, en tant de choses & si estranges, & au dessus de la raison & comprehension humaine, ne peut pas estre vn effet & production d'un esprit faux & menteur, qui se coupe d'ordinaire & se dement soy mesme en ses propres inuentions & mensonges, combien est il plus impossible que tant de gens s'accordent si bien en ces choses, si elles sont forgées & inuentées à plaisir ?

La fin aussi & le but de ces Ecrivains dement euidemment la fausseté de ceste imputation, qu'ils

ayent controuué ce qu'ils disent. Ceux qui se messent de tromper le monde, & coucher sur le papier leurs sôges & resueries, le font d'ordinaire & presque tousiours pour quelqueune de ces fins, c'est à sçauoir, pour en attrapper honneur, plaisir, profit ou richesse, pour eux ou les leurs, comme sont vniuersellement tous fourbes & matois. Ou pour donner du plaisir, & auoir le bruit & la reputation de gens diserts, & beaux esprits, comme les railleurs, gausseurs, & faiseurs de Romans, & semblables pieces. Quelques vns par vanité, pour se faire admirer, estimer & priser des hommes, en soustenant quelques paradoxes, & opinions nouuelles, estranges & monstrueuses, comme plusieurs entre les Philosophes Payens, & les Heretiques entre les Chrestiens, peu, ou point du tout, se sont pro-

posez en leurs fables & bourdes, & controuuées inuentions, vn bon but, de profiter au public, & à tout le genre humain, de porter les hommes à la vraye vertu, & les amener à la droite felicité.

Or ie croy que nul homme sensé ne dira que les histoires sacrées du Vieil & Nouveau Testament soient des Romans controuuez pour donner du plaisir, & pour acquérir à leurs Eseriuains la louange d'eloquence mondaine, & de politesse d'esprit, comme les hommes la iugent & estiment, l'air, le style, la façon de ces liures là sont par trop esloignés des Romans, & toutes les circonstances des temps, des lieux, des personnes y sont si ponctuellement marquées, & par tout si accordantes, qu'il faut estre Barbare & Cyclope, ou du tout stupide & hebeté, pour ne pas re-

connoistre la merueilleuse & infinie difference qu'il y a entre ces saintes histoires, & des fabuleux Romans. Ioint que les faiseurs de Romans, bien qu'ils suivent (s'ils sont habiles) le plus qu'ils peuvent, la verisimilitude, & s'esloignent des prodigieuses fictions des Amadis, neantmoins ils montrent assez qu'ils ne veulent pas estre creuz de ce qu'ils content, ains ont dessein de charmer en quelque façon (par la beauté du style, la gentillesse de l'invention & l'adresse à garder la verisimilitude) les yeux de l'esprit pour luy faire voir ce quin'est pas, & delecter par ceste plaisante tromperie leur Lecteur. Mais les Escriptuains des histoires sacrées, les proposent comme certaines, veritables, & indubitables, & veulent que l'on les tiennent fermement pour telles. Ce qui seroit vne grande

bestise à eux, & indigne de gens d'esprit, si c'estoient Romains controuuez & forgez à plaisir, joint que le style en est merueilleusement simple & populaire, & bien esloigné de la façon d'escrire de ceux qui ont dessein de tromper & cajoller le monde.

Aussi peu, & moins encore, se trouuera il; que les auteurs des liures sacrez ayent cherché d'attraper des hommes, par leurs fictions & inuentiōs, des honneurs, plaisirs, estats ou richesses. Moyse ni Iosué, n'ont point cherché de laisser à leur posterité le gouuernement & empire de la nation des Iuifs, lequel ils ont conduit. Moyse n'auoit que faire de quitter la Cour de Pharaο, pour auoir de l'honneur & des richesses, puis qu'en y demeurant il estoit pour estre reputé fils de la fille de Pharaο. Dauid n'a pas par

ses Escrits & Pseaumes acquis le Royaume, la gloire & la puissance qu'il a eüe, mais par sa valeur, & par les guerres qu'il a menées, & par la faueur & benediction de dieu qui l'a conduit & adressé. qu'auoit il a faire estant grand & puissant ROY de s'amuser a dresser ses pseaumes, si ce sont des intuentions creuses? Que cerchoit il, que se proposoit il en cela d'humain?

Salomon son fils n'a point acquis, ni cherché par la composition de ses Prouerbes, Ecclesiaste & Cantique, l'honneur, la gloire, & les richesses qu'il a possédées par dessus tous les autres Roys de la terre. Il a eu tout cela auparauant que d'escrire, & en son Ecclesiaste il montre assez le mespris qu'il en fait. Esaie, Ieremie, Ezechiel, & les douze petis Prophetes, ont ils cherché par leurs escrits, les biens, honneurs & plaisirs

plaisirs de ce monde ? Eux qui ont esté haïs, mocquez, persecutez, lapidez & mis à mort pour cela ? & ce non contre leur dessein & attente, & malgré eux, ains volontairement se sont soubsmis & offerts à toutes ces choses, pour obeïr à ce Dieu qui les enuoyoit. Nostre Seigneur Iesus Christ de mesme ; & ses Apostres, ont ils couru & poursuivi après ces choses par leur doctrine & predication, ou par leurs escrits ? Ains tout le rebours ils exhortent, & admonestent leurs Disciples & Sectateurs, a ne point aimer ni rechercher ces choses, à s'attendre plustost à la croix, aux tribulations & persecutions du monde, pour la profession de la doctrine qu'ils leur enseignent.

Disons nous que la vanité & le desir de gloire ait mené ces gens là, pour auoir la reputation d'estre

Q

gens d'esprit, & subtils. Rien moins. Les Apostres, pources pecheurs, gens rudes, grossiers & ignorans, pouuoient ils aspirer a vne telle gloire, & se la pouuoient ils promettre de la part des hommes, ou de la posterité? Ioint que leurs escriits sont pleins du mespris qu'ils faisoient, & qu'ils veulent que leurs Disciples fassent, d'vne telle gloire. Salomon n'a point recherché par ses escriits ceste gloire: auparauant que d'escrire il auoit ceste grande sapience qui luy a acquis la gloire du plus sage & scauant de tous les mortels qui l'auoyent precedé. Et a eu ceste gloire & reputation non en soustenant & mettant en auant des Paradoxes & opinions extrauagantes, forgées & controuuées par luy, contre l'opinion commune des autres hommes, mais par vne vraye &

droite Sapience, & admirable con-
noissance qu'en effet il auoit de la
nature de toutes choses. Daud &
Iosué auoyent assez de gloire d'ail-
leurs par leurs faits d'armes, sans
affecter celle cy par leurs escrits,
& proposition d'opinions fantasti-
ques. Si Moysé eust voulu chercher
de la gloire mondaine, il l'eust plu-
stost trouuée & acquise par la pro-
position de la sagesse des Egyptiens,
en laquelle il auoit esté instruit, qui
estoit lors renommée au Monde,
que non pas en forgeant de nou-
uelles opinions & doctrines con-
trouuées. Daniel, de mesme auoit
assez de quoy se preualoir, & faire
valoir vers les hommes, par la sa-
pience des Chaldeens, laquelle il
sçauoit, que par vne nouuelle, in-
ouïe & estrange doctrine. Ainsi
donc il est euident que le desir de
vaine gloire n'a point porté ces sa-

erez Eſcriuains , à mettre la main à la plume pour nous compter les ſonges & reſueries de leur cerueau.

Quoy donc , eſt-ce le deſir du bien public , & de profiter aux hommes par leurs nouuelles inuentions, & grôſeſques de leur cerueau ? Certes on employe quelquefois les fictions és enſeignemens moraux & politiques. Les Fables d'Eſope ſont toutes de ceſte nature. Et les Orateurs employent bien quelque fois les Apologues en leurs harangues, comme celui de Menenius Agrippa , de la diſſenſion entre le ventre & les autres membres du corps : & l'Eſcriture meſme s'en ſert quelque fois, comme eſt celui du fils de Gedeon , des arbres qui ſe choiſirent vn Roy. Les Paraboles auſſi ſont vne eſpece de fiction morale & in-

structiue, comme celle de Gad à David, du pource homme & de sa brebis. Et de telles Paraboles sont leins les Euangiles, & les discours de nostre Seigneur Iesus Christ en estoyent tous parsemez. Mais ces choses n'ont rien de commun avec ce dont il s'agit maintenant. La question est, si les Histoires du Vieil & Nouveau Testament sont fables & contes faits à plaisir, ou si ce sont recits de choses veritablement auenuës.

Ceux qui apportent en leurs discours & eserits, des Apologues & des Paraboles, ne les donnent pas pour vraies histoires, ils font assez voir qu'ils ne les proposent que pour instruction, & non pour chose reellement auenuë. Mais les Eseriuains saerez, proposent leurs histoires comme veritables recits de choses reellement aduenues, &

cela est euident par la remarque qu'ils font de toutes les circonstances & particularitez qui s'observent és vrayes histoires , & par ou on a accoustumé de reconnoistre & discerner les Romans , & fictions Poëtiques , d'auec les vrayes narrations. Ils veulent que nous tenions & croyiõs ces choses qu'ils nous recitent , pour tres-veritables , & certainement auenuës. A quelle bonne fin cela , si ce ne sont en effet que des chansons ? Les bons escriuains qui veulent instruire & profiter , en vsent ils ainsi ? Nullement. Et puis quand bien quelcun voudroit escrire vn Roman moralisé , pour seruir d'instruction , tousiours ne le debiteroit il pas pour vraye histoire. Et nous auons cy dessus veu que ces histoires sacrées n'ont aucunement l'air , ni la mine de Romans.

Et quant aux dogmes, doctrines & enseignemens dont les liures sacrez sont pleins, les Athées veulent ils que ce soyent paradoxes, & & opinions sauvages & extrauagantes? Si cela est, ie leur demande a quelle bonne fin elles peuuent auoir esté par les sacrez Escriuains forgées & inuentées. Car nous auons cy deuant monstre qu'elles ne peuuent auoir esté controuuées par eux à mauuaise fin, ni pernicieux dessein. Si ce sont inuentions & non realitez, à quelle bonne fin sçauroyent elles auoir esté forgées? Certes ils n'en sçauroyent dire aucune. Et de plus ces autheurs sacrez proposent ces dogmes pour estre creus fermement, & tenus pour chose tres indubitable; peut il y auoir en cela aucune bonne fin & raisonnable, si ce sont en effect des extrauagances?

Q 4

Diront-ils que ces gens là voulans porter les hommes à la vertu, à la iustice, temperance, vaillance, verité, fidelité, amitié, charité, patience, honneur, respect, obeïssance, obseruation des loix de la société humaine, &c. ont creu que l'opinion (quoy que fausse) d'un Dieu Createur, & gouverneur de tout cet Vniuers, Iuge, vengeur & remunerateur des bons & mauuais, & que les exemples (quoy que supposez & forgez) des vices & vertus, des vns chastiez, & des autres salariez & guerdonnez par vne Prouidence, seroyent vn puissant motif & inductif pour ceste fin là. Et que c'est cela qui les a induit à forger ceste opinion d'une Prouidence, avec toutes ses dependances, & ces belles histoires pour seruir de patron des vices & vertus. A peu pres comme Horace pretend (en

ceste Epistre qui commence, *Tro-
jani belli scriptorem, Maxime Lolli*)
qu'Homere a forgé son Iliade &
Odyssée, & nous y fait tous ces
beaux contes pour servir d'instru-
ctions & enseignemens moraux.

Il est bien vray que la creance
d'un Dieu tel qu'il nous est propo-
sé és escrits sacrez, est le vray &
vnique moyen, & le plus vif & effi-
cacieux motif pour porter les hom-
mes à la vraye vertu, comme il pa-
roist és exemples de la vie des vrays
fideles de l'un & de l'autre Testa-
ment, en comparaison de laquelle,
toute la plus lustreuse vertu des
Payens n'est que fumier & ordure.
Ce qui seroit aisé de verifier par
vne exacte collation. Et ceux des
premiers Peres Chrestiens qui ont
escriit contre la vanité des Payens,
l'ont bien montré, comme Ter-
tullian, Minutius Felix & autres.

Mais il est aussi bien vray, que si ceste opinion d'une Diuinité & Prouidence, telle que l'enseigne la Religion Chrestienne, estoit fausse, imaginaire & controuuée, elle ne produiroit pas vn tel effect, que de porter ainsi les hommes à la vraye vertu.

Et ne sert de rien d'objecter, qu'une opinion (quoy que fausse, mais cruë pour vraye & certaine) fait pareil effect que si elle estoit reellement vraye, comme cela se verifie par beaucoup d'exemples, Car les impressions fausses, qu'on donne à l'esprit, de quelque chose, ne durent gueres. Elles trompent pour peu de temps. C'est comme du fard sur vn visage, & vn coloris qui donne pour quelque temps du lustre, mais n'est pas durable. Mais ceste creance d'une Diuinité & Prouidence est ferme & aussi constante

& inefbranlable que les Cieux. Et ce n'est point vne fiction des Eſcriuains ſacrez, car ceux qui n'ont iamais ouy parler d'eux, ni veu leurs eſcrits, l'ont eue & l'ont encore maintenant, car nous auons monſtré cy deuant que tous hommes generalemēt ont eu en tout temps ceſte creance d'une Prouidence & Diuinité.

Auſſi y a il vne trop manifeſte & infinie difference entre les fables & fictions Poëtiques d'Homere, & les narrations de l'Histoire Sacrée. Homere (ſ'il a eu le deſſein que luy attribué Horace, d'inſtruire & delecter par ſes fables) n'a pas eu intention que nous priſſions ſes fables pour veritez, & n'a pas debité ces belles bourdes pour de vrayes hſtoires, mais a dreſſé vn beau Roman moralisé. Mais (comme nous auons dit) les Eſcriuains ſacrez

nous dōnent leurs narrations pour choses tres-certaines & indubitables. Et quant aux fausses Diuinites d'Homere, & a tout ce qu'il en raconte , ie pense que nul de ces forts esprits d'aujourd'huy , que nous combattons, n'oseroit soustenir sans rougir, ou pallir, que ce que la doctrine Chrestienne enseigne d'un seul Dieu Createur, conserveur, iuge & gouverneur de tout cet Vniuers, de son culte & service, & du moyen de paruenir à la vraye felicité par un seul Iesus Christ, ne soit incomparablement plus conuenable & seant à la Diuinité (s'il y en a vne) & conforme mesme à la droite raison, que non pas tous les contes fabuleux des faux Dieux d'Homere, voire que tout ce qui luy eschappe par fois de plus beau, & de plus graue touchant la Diuinité.

Ainsi il n'y a aucune apparence de raison d'objecter aux Eferiuains sacrez du Vieil & Nouveau Testament, qu'ils ayent forgé & controuvé du leur, ou pris de la forge de quelqu'autre, qui les ait precedez, les choses qu'ils nous enseignent & proposent en leurs escrits, ains toutes raisons combattent au contraire. A quoy i'adiousteray ce peu de remarques qui pourront servir de commencement d'un plan à qui voudroit traicter ceste matiere plus au large, comme cela se peut.



CHAP. XIV.

*Suite des preuves de la Diuinité
des Saintes Escritures.*

LES choses qui sont contenuës en l'Ecriture, sont de deux

fortes, c'est à sçavoir, les *Doctrines*, & les *Histoires*. Ni les vnes ni les autres ne peuvent auoir esté forgées par l'esprit humain, ni par les Demons. Les *Doctrines* sont de rechef de deux sortes. 1. Les *Dogmes* ainsi proprement dits, qui regardent la foy & cognoissance, comme qu'il y a vn Dieu Createur, &c. vn Iesus Christ Fils de Dieu Sauueur & Redempteur du Monde, &c. 2. Les *Enseignemens* moraux, qui regardent la prattique & conduite de la vie en l'exercice des vertus. Ces *Dogmes*, qui regardent la foy & connoissance, sont si hauts, si sublimes, si excellens, si admirables, si pleins d'une exquisite sapience, si profonds, cachez & abstrus, notamment les mysteres de la Trinité, Incarnation & Redemption, qu'ils sont impenetrables à tout esprit humain, pour les pou-

uoir auoir forgez ni controuuez, ou deuinez, & sont si esloignez de l'humeur, & contraires au naturel & genie du Diable, qu'il ne sçauroit, ni ne voudroit auoir pensé à forger & enseigner telles choses aux hommes. Et les bons Anges ne les voudroyent pas auoir forgez, s'ils sont faux; vne telle fiction repugneroit à leur integrité.

Et quant aux Enseignemens moraux, ils contiennent vne forme si exacte de sainteté tout a fait accomplie & incomparable (à laquelle n'approche en rien toute la vertu des plus celebres Philosophes Payens) que l'homme pecheur & corrompu, comme il est naturellement, & enclin au mal, ne sçauroit auoir controuué vne si parfaite regle de bien viure, comme est celle qui nous est là enseignée. Beaucoup moins le Diable,

si ennemi qu'il est de toute vertu & sainteté, la voudroit, ou pourroit, il auoir enseignée & recommandée aux hommes. Ioint que si on accorde des Demons, il faut accorder en suite vn Dieu, comme il a esté monstre cy dessus. D'où il est euident que de toute necessité ces choses sont de Diuine reuelation.

Quant aux Histoires & narrations, elles sont tellement liées & attachées aux Dogmes, que ces choses ne se peuuent separer, tellement que si les Histoires sont vrayes, & non controuuées, il faut de necessité que les Dogmes qui y sont ioints soyent aussi vrais. Car par tout vous y voyez vn Dieu Createur & gouverneur du Ciel & de la Terre, qui void, conduit & adresse toutes choses, Iuge des hommes, qui punit & chastie les vns, guerdonne & recompense les autres,

tres, qui fait des merucilles au dessus de toute la nature, qui se dit, & se montre par effect, estre tel qu'il y est descrit & depeint, à sçauoir, Eternel, infini, immortel, inuisible, incomprehensible, tout Puissant, tout Sage, tout Bon, Iuste & Misericordieux, &c. On void au Nouveau Testament vn homme (Iesus Christ nostre Seigneur) se disant estre le Fils de Dieu, le Sauueur du Monde, se demonstrant estre tel par ses Miracles, mourant pour le salut des hommes, resuscitant, montant au Ciel, & là s'asseoir à la dextre de Dieu son Pere, enuoyant de là le S. Esprit sur ses Disciples. On le void serui des Anges, presché aux Gentils, creu au Monde, & par la predication seule de son Euan-gile, & la vertu de son Esprit, abbatre toute l'idolatrie & superstition Payenne, ruiner l'Empire du Dia-

R

ble , & triompher glorieusement de Satan & de toute sa puissance.

Ces Narrations ne sont point fa-
bles artificiellement controuuées,
comme celles d'Homere , & les
Romans vieux & nouveaux de
toutes sortes , mais sont vrayes
histoires , & naïfs recits de choses
reellement & certainement au-
nuës ainsi qu'elles sont là racon-
tées. Ce qui est euident , premie-
rement , par la suite & enchainure
admirable de ces narrations , qui
se suyuent, s'entretiennent, s'entre-
soustiennent , & affermissent tou-
tes les vnes les autres , avec vne si
merueilleuse iustesse & accord que
rien n'y baaille , ni ne se dement.
Ce qui en vne si grande multitude
& varieté de narrations , si bien
continuées , avec toutes leurs cir-
constances du temps, des lieux, &
des personnes (dont on void mes-

mes plusieurs traces és plus authentiques & certains monumens de l'Antiquité) & si bien continuées par tant de siècles , depuis le commencement du monde , iusqu'à nostre Seigneur , durant quatre mille ans , (ioint la liaison & coherence de celles du Nouveau Testament avec celles du Vieil ,) ne scauroit auoir esté dressé & adiuaté si admirablement par aucune industrie humaine , pour subtil & artificieux que scauroit auoir esté l'Escriuain , quand bien (ce qui n'est pas) ce seroit vn seul homme qui auoit pris à tasche d'escrire & continuer d'vn dessein pour pensé vne telle inuention de la forge de son esprit.

Beaucoup moins s'est il peu faire que tant , & de si diuers Escriptuains en temps , & païs si differens , les vns au desert , les autres en Iudée , les

autres en Babylone, les vns en Ierusalem, & les autres en Samarie, (deux Royaumes si ennemis & contraires) les vns Iuifs, les autres Chrestiens, (deux peuples si opposez) en vne si merueilleuse varieté de matieres, & argumens si differens de leurs escrits, comme sont Histoires, Loix & ordonnances Politiques & Ecclesiastiques, enseignemens moraux, propheties de plusieurs sortes, Epistres, discours, disputes, de styles si differens, l'un bas simple & naïf, l'autre figuré, sublime & releué (ou toute l'eloquence humaine ne scauroit arriuer) l'autre doux, uni & poli, l'autre dur, rude, & comme raboteux : Il est, di-je, impossible que tant de si differētes testes, qui ne se sont veus, ni cognus, ni communiqué ensemble, se soient ainsi bien accordez & rencontrez à mettre en auant, &

donner credit à vne mesme fourbe si bien continuée , & à adiufter si admirablement & les narrations , & les dogmes , & les enseignemens qu'ils proposent.

Secondement, que ces narrations ne soient point fabuleuses , & contes faits à plaisir , il paroist parco que la nation des Iuifs de laquelle l'origine & l'histoire nous est deduite au Vieil Testament durant plus de deux mille ans , & qui fait presque toute la matiere & subiect des liures du Vieil Testament & vne bonne partie de ceux du Nouveau, est & subsiste encore aujourd'huy esparse par tout le monde , & de la mesme façon que cela auoit esté predict par leurs propres Prophetes. Leurs vs, coustumes, ceremonies , Religion , & façon de viure toute telle qu'elle leur à esté prescrite par leur Legislatteur Moyse & les

Prophetes. Quel Christ, & ses Apostres, ayent esté, & ayēt presché par le monde, il ne se peut nier, puis que leur doctrine, & leurs escrits, sōt receus & espandus par le monde vniuersel, és mains, & au cœur de tant de millions de Chrestiens, qui depuis seize siecles ont esté, & sont encore sur la terre, cognus & celebres entre les hommes.

Mais peut estre dira on, que le fondement de ces hystoires est bien vray & reel, & qu'il y a eu vn Abraham, vn Moysé, vn Iosué, des Iuges, & Rois d'Israël, vn Daud, vn Salomon, &c. vn Iesus Christ & des Apostres, mais que l'on a enrichy & estoffé ces hystoires de beaux contes jaunes, comme l'Iliade & Odyssée d'Homère, dont le fondement est historique, y aiant eu autre fois vne Troye, vn Paris, vn Priam, vn Hector, & vn Achille &c.

Mais qui n'ont pas fait & dit tout ce qu'Homere chante & raconte d'eux. Et comme les Romans de Roland & de Renaud, qui ont esté autre-fois, mais qui n'ont pas fait ce que les Romans qu'on à escrit d'eux nous debitent. Qu'ainsi ces miracles & merueilles d'Egypte, & du desert, de Iosué, & des Iuges, & des Rois, & de Iesus Christ, & de ses Apostres, sont des enrichissemens de l'inuention de ces Escriptuains pour faire valoir leur marchandise.

Voyons s'il y a quelque apparence à ceste defaite. Premièrement, Moyse décrit luy mesme son histoire, & celle du peuple des Iuifs, qu'il a tiré d'Egypte, & conduit par 40. ans par le desert, avec vne naïueté & ingenuité incomparable, si esloignée de soupçon de fourberie, qu'il y marque mesmes ses propres

defaux, & ne dōne point les plus honorables charges de ce peuple, la Sacrificature & la Royauté, à aucun de sa posterité. Et peu auparavant sa mort il leur fait vn long Sermon, (qui est tout le liure du Deuteronomie,) là ou il leur represente tout ce qui leur est aduenu sous sa conduite dans le desert, & quelque temps auparavant leur sortie d'Egypte, tout ainsi qu'il le recite és liures d'Exode, du Leuitique, & des Nombres. Y auoit il là lieu, & apparence de leur faire des contes controuuez & les prendre à tesmoins de ce qu'ils n'eussent point veu & connu, & de leur en vouloir faire ainsi à croire ?

Dira on, qu'il ne leur à point fait ce Sermon, que c'est vne supposition, qu'il n'a point escrit ces liures, ou que ces escrits ainsi farcis de contes fabuleux ont esté lōg-temps

cachez, & n'ont esté publicz que long temps apres sa mort, lors que la memoire des choses arriuées au sortir d'Egypte, & au desert estoit escoulée, & effacée parmi ce peuple, qui à esté content & bien aise de receuoir & croire ces beaux contes, comme faisans à l'honneur de leur nation? Ou bien dira on, que quelcun long-temps depuis luy, ait forgé, & publié ces liures sous son nom? 1. Cela se dit *Gratis*, sans couleur ni apparence, ni fondement de raison. 2. Cela est contre le tesmoignage des plus anciens monumens de l'histoire, qui n'attribuent point ces liures à d'autres qu'à Moyse, & n'accusent personne de les luy auoir supposez. Diodore Sicilien escrit que Moyse à donné aux Iuifs leurs Loix, les ayant receuës du dieu nommé *Iaoh*, qui est le propre nom de Dieu

יְהוָה. 3. L'auteur de ces livres ne flatte point ceste Nation, mais la nous represente comme la plus peruerse, & de col plus roide qu'aucune autre. 4. Comment telles impostures auroient elles si vniuersellement, & si constamment gagné, & pris racines si fortes en l'Esprit de ceste nation par tant de siècles? 5. Vne bonne partie de leurs Loix & constitutions, Politiques & Ecclesiastiques ont pour fondement ces narrations, que ces gens pretendent fabuleuses, & sont basties sur icelles, comme la Pasque, la feste des Tabernacles, le Iubilé, l'année de relasche, &c.

Et puis ce Tabernacle si beau, & magnifique, si ingenieusement & artificiellement dressé, si diuin, & admirable, & si mysterieux (sur le patron & modèle duquel Salomon ce glorieux & magnifiqueroit

à depuis basti son Temple, ceste prodigieuse & admirable piece d'ouurage, à laquelle il n'y a jamais rien eu de comparable en tous les plus superbes bastimens que la vanité, puissance & richesse de tous les plus glorieux Monarques de la terre ont esleuez) avec tout son ser-vice, & l'ordre si merueilleux de ses Ceremonies, là ou on voit tous les mysteres de la Foy, & Religion Chrestienne crayonez, & comme depeints au vif, (comme il se void par le rapport qu'en font les Escri-uains sacrez dunouveau Testamēt, & à leur imitation, les Peres & Do-cteurs de l'Eglise, avec le corps de ces ombres) sera ce aussi vne inuen-tion & chimere de l'esprit de Moy-se, ou de quelque autre depuis luy? Aura il deuiné tant de siecles au-parauant tout ce que nostre Sei-gneur Iesus Christ deuoit faire &

souffrir, & enseigner pour le salut des hommes, pour en dresser en ce diuin Tabernacle, & en toutes ses appartenances & dependances, vn tableau si parfait & accompli ?

Or s'il n'y a nulle apparence de soupçonner Moÿse de fourberie & supposition en ce qu'il escrit de la deliurance des enfans d'Israël, & de leur sortie hors d'Egypte, de leur passage par la Merrouge, & de leurs aduantures par le desert, durant 40 ans, puis qu'il represente toutes ces choses de viue voix, à vne multitude de six cens mille hommes, qui l'en pouuoient dementir, si tant est qu'il eust forgé ces choses, ne sera il pas croyable en tout ce qu'il nous recite au liure de la Genese, d'Abraham, d'Isaac, de Iacob, & de ses enfans, du Deluge, de la Tour de Babel, & de Sodome, & pour remonter encores plus

haut, de la creation du monde; car qu'y a il en tout cela qui soit plus a meseroire que l'histoire des enfãs d'Israël en Egypte & au desert? Le mesme se peut dire de tout ce qui nous est raconté és liures de Iosué, des Iuges & des Rois, car tout cela n'est point plus incroyable que ceste histoire d'Egypte & du desert, & à vne liaison indissoluble avec toutes les narrations de Moyse. Et pourquoy estimerõs nous ces choses ineroyables, puis qu'elles nous sont proposees comme œuures & effects d'un Dieu eternal, infini, tout puissant, tout bon, & tout Sage, infiniment releué au dessus de toute la nature, puis que c'est luy qui à donné estre à la nature, & que par tant d'argumens precedens nous auons monsté qu'au dessus de ceste Nature il y doit auoir vne telle Diuinité, source &

origine de ceste Nature?

De plus, il ne se peut pas nier que Moÿse & les Prophetes ont promis & predit aux Juifs, la venue du Messie. Et lors qu'il est venu, les Juifs en estoient en vne merueilleuse attente, jugeans bien que le temps de sa venue marqué par les Prophetes estoit arriué, ou tout pres, à la porte. Car encore aujourd'huy, & depuis plus de quinze siecles, ils sont contrains de reconnoistre que ce temps là est passé. Et quand on les presse là dessus ils ont recours à vn miserable & impertinent eschapatoire, à sçauoir qu'à cause de leurs pechez ce temps à esté prorogé, & la venue du Messie différée; quoy qu'ils ne puissent montrer quel si grand peché ils peuuent auoir commis, qui ait causé vn si long delay, & vne si horrible desolation de leur nation. Mais les Apo-

stres & Chrestiens prouuent euidentement contr'eux que ce Messie promis est venu au temps defini & predit par leurs Prophetes, & que c'est Iesus Christ, lequel ils n'ont mesconnu & reietté, que pour ce qu'ils s'estoient faussement imaginé que le Messie deuoit estre vn grand & puissant Monarque qui les deuoit affranchir de la seruitude ou ils estoient sous les Romains, & leur donner la domination sur tous les autres peuples de la terre, imagination contraic à l'intention de l'Esprit de Dieu, qui a conduit les Prophetes.

Aussi ne se peut il nier que & Moyse & les Prophetes, & Iesus Christ, & ses Apostres, en suiuant les Prophetes, n'ayent predit la ruine de Ierusalem & du Temple, par les Romains, & ceste miserable dispersion & seruitude de la na-

tion Judaïque, ou nous la voyons depuis tant de siècles, leur reïection & exclusion des Alliances de Dieu, & la vocation des Gentils en leur place, à la connoissance & service du Dieu d'Abraham, d'Isaac, & Jacob, createur du Ciel & de la terre, avec l'abolition de toute l'Idolatrie Payenne. Ce qui se void depuis seize siècles executé comme il a esté par eux predict. Argumēt irrefragable que ces predictions ne sont point ni de hazard, ni vne production & inuention de l'esprit humain, qui ne peut pas penetrer ainsi dans l'auenir, & predire si discrettement, si certainement, & constamment, par tant de diuerses personnes, vn effect si merueilleux, tant de siècles auparauant.

On pourroit à cecy adiouster les miracles de Iesus Christ & de ses Apostres, que les Iuifs mesmes, leurs

leurs ennemis capitaux, ne denient pas, quoy qu'ineptement & faussement ils les rapportent partie à ion ne sçay quelle imaginaire vertu du nom Tetragrammaton de Dieu, m^{me} qu'ils feignent auoir esté decouuert par Iesus Christ, & de robbé par luy de leur Temple, partie à l'efficace, & illusion des Demons, par le moyen d'arts magiques dont ils auoient connoissance, qui est vne putide & ridicule exception, de gens desesperéz, qui ne scauent ou ils en sont, & aiment mieux dire toutes sortes d'impertinences que d'auouer la verité. La vertu & efficace du tout admirable de la doctrine de l'Euangile, qui par de si foibles instrumens, tels qu'ont esté les Apostres, & leurs premiers successeurs, nonobstant toute la contradiction, opposition, & persecution du monde;

de contre les sectateurs d'icelle, s'est fait recevoir au monde, & a abbatu toute l'Idolatrie & superstition Payenne; qui a produit vne si esmerueillable & exemplaire justice, probité, intégrité & sainteté de vie és premiers Chrestiens, laquelle à ravi en admiration leurs propres persecuteurs, & qui a fait résoudre les hommes à la perte volontaire de tout ce qu'il y a de doux, de plaissant, d'agréable, & de plus charmant à la chair en ceste vie, & à la souffrance de tout ce qu'il y a de plus affreux & horrible, pour l'esperance d'une autre vie apres celle cy; laquelle on pretend n'estre qu'imaginaire. Ceste vertu, di-je, & efficace si prodigieuse, de la doctrine Chrestienne és premiers professeurs d'icelle, est vne preuve, & vn argument irrefutable, de la Divinité d'icelle, &

que ce ne peut estre vne fiction & inuention du cerueau de l'homme. Et par consequent , puis que ceste doctrine ne se trouue point ailleurs originairement qu'és escriits du Vieil & Nouveau Testament , il faut de toute necessité que ces premiers Escriptuains là l'ayent receuë de Dieu, qui la leur à reuelée pour l'enseigner & annoncer aux autres hommes, afin de les amener à ceste saincteté, droiture, & integrité de vie, à ceste patience & souffrance, humilité & debonnaireté incomparable, qu'elle à produit és hommes qui l'ont receuë, & par là , à la jouïssance de la vie & felicité eternelle qu'elle promet.

Que si elle n'a pas tousiours & en tous temps, & specialement aujourd'huy , produit de si admirables effects en tous ceux qui en font profession , ce n'est pas le de-

faut de la Doctrine , mais de ceux qui la professent , qui n'y ont pas la droicte Foy & persuasion dont ils font mine. Mais neantmoins il se trouuera tousiours parmi les vrais Chrestiens plus de sainteté, justice, droiture, probité & intégrité de vie, plus d'humilité, de patience, de courage, de vertu & constance, plus de vraye pieté & charité, que non pas en aucune autre Religion qui soit au monde, & qu'il ne s'en trouuera jamais parmi ceux qui preschent & suivent l'Atheïsme que nous combattons, desquels la profession est toute au rebours, & ne tend qu'à porter les hommes à tout vice, ordure, dissolution, & injustice.

On pourroit dilater & amplifier ces preuves & argumens de la Divinité des saintes Escritures, y en adjouster plusieurs autres, & en

faire de gros volumes, & peut estre d'autres apres nous l'entreprendront. Mais cecy suffit pour nostre dessein, & est capable de fermer la bouche aux prophanes, c'est à dire, les reduire a ne pouuoir alleguer à l'encontre que des inepties & impertinences, & se monstrier tout à fait ridicules & absurds, en voulant disputer contre de si inuincibles raisons de la Diuinité des saintes Escritures.

Maintenant quāt à ceux qui se disent estre l'Eglise, & qui à ceste occasion pretendent que nous ne pouuons, ni ne deuons adjouster foy à l'Ecriture qu'à cause du tesmoignage qu'ils luy rendent d'estre diuine, s'ils en veulent estre creus, il faut de necessité qu'ils facent deux choses. Premièrement, qu'ils monstrent que toutes ces raisons & argumens sont futiles, & de nulle for-

ce, & ne sont en aucune façon capables de persuader à aucun la vérité & Diuinité des Escriptures, voire qu'il n'y a rien du tout en l'Ecriture qui soit capable de nous en faire reconnoistre la Diuinité & vérité. 2. Que quant à eux ils ont en eux des raisõs, des preuues, & argumens bien plus forts, clairs, euïdens, demonstratifs, & irrefutables, pour mōstrer qu'ils sont plus diuins & infaillibles que non pas les Escriptures, & qu'à ceste occasiõ ils doiuent estre plûtoſt creus de tout ce qu'ils diront, que non pas ces liures là de ce qui nous y est enseigné, comme estans, quant à eux incomparablement plus euïdemment & inexpugnablement infaillibles & diuins, que non pas ce corps & volume de sacrez escrits que nous auons és liures du Vieil & Nouveau Test.

Or i'estime qu'ils ne voudroient

pas entreprendre de s'arroger ces deux choses, & que s'ils en vouloient venir a vne telle demonstration, ils feroient bien empeschez, & leurs preuves se trouueroient trop courtes, & tout leur raisonnement bien foible, voire du tout nul. Car quand bien ils auroient refuté ces raisons que nous auons représentées, ou en trouueront ils de plus fortes & inuincibles, qui conuiennent à eux, & ne conuiennent point aux saintes Escritures? car de vouloir estre simplement creus sur leur parole, qu'ils sont infallibles, sans demonstrier aucune raison pourquoy nous le deuions croire ainsi, c'est estre par trop injustes, & abuser trop indignement de la patience & de la credulité des hommes.

Et de dire, comme ils font, que nous les deuons croire infallibles, parce que nostre Seigneur a dit à

S. Pierre , *J'ay prié que ta Foy ne defaille point , &c. le te donneray les clefs du Royaume des Cieux, &c.* posé mesme (ce que nous leur nions) que le sens de ces paroles fust tel qu'ils le veulent , tousiours estre reconnoistre par là que nous sommes persuadez de la Diuinité des Escritures , ou ces paroles là se trouuent , premier que nous puissions estre asseurez de l'infallibilité de ceux à qui ils pretendent que ces paroles là s'adressent. Et partant la creance que nous auons de la Diuinité des Escritures n'est pas fondée sur le tesmoignage de ceux à qui ils veulent que l'Ecriture rende , en ces paroles là, vn si clair & si solennel tesmoignage d'infallibilité. C'est donc vne bien vaine & mal fondée iactance à eux, de dire, *Que l'Ecriture n'auroit enuers nous non plus de credit , ni de creance , que les*

Fables d'Esopé, ou que l'Alcoran de Mahometh si ce n'estoit le tesmoignage qu'ils nous rendent d'elle qu'elle est Diuine, puis qu'eux mesmes tirent d'elle, & de son tesmoignage (comme ils pretendent) toute l'infallibilité de laquelle ils se vantent.

Mais cecy soit dit seulement en passant pour soustenir, & appuyer de tant plus fortement, contre les Athées, la Diuinité des saintes Escritures, laquelle ces gens là, par vne telle assertion, s'appent & renuersent de fonds en comble, & abandonnent par là, sans y penser, la Religion Chrestienne en proye aux prophanes risées des Athées, qui demanderont avec raison à ces Messieurs, qu'ils leur demonstrent donc par bonnes & fortes raisons, & argumens inexpugnables, leur pretenduë infallibilité, qui doit obliger tout le monde à croire au

tesmoignage qu'ils rendent à l'Escriture qu'elle est diuine , & que partant tout ce qui y est contenu & enseigné doit estre indubitablement creu, comme vne verité tres-constante. Et que ceux qui leur deferent tant que de bastir toute leur creance sur leur simple parole, reconnoissent par ce cy, ou cela insensiblement est pour les amener, c'est à sçauoir, tout droit à l'Atheisme.



CHAP. XV.

Refutation des Raisons des Athées.

IL nous faut maintenant examiner les raisons de ces gens là pour voir si elles sont à contrepeser à celles que nous auons allegues contr'eux. Sur quoy nous

ferons de necessité courts , car n'estans pas (Dieu mercy) nourris en l'Eschole de telles gens , & n'ayans aucune communication avec eux , & eux ne mettans point la dessus au jour leurs pensées, soit par honte, ou par crainte , & lascheté (indigne de la grandeur de ce fort esprit, dont ils se vantent par dessus le reste des hommes , qu'ils estiment en ce point plus qu'enfans) ou plustost par la conscience de leur foiblesse , ie ne peux pas deviner leurs pensées, & ces pretenduës fortes raisons sur lesquelles ils se fondent; Et suis contraint de m'arrester à trois, dont quelques vns d'eux se pensent targuer & qui peuvent venir en l'esprit de plusieurs. L'une est prise de l'Eternité du Monde , lequel ils pensent deuoir estre sans commencement, pour ce que rien ne se fait de rien , & ne

peut (à leur aduis) retourner à rien , fuiuant le dire de quelqu'un de leurs Maîtres , *Ex nihilo nihil , in nihilum nil posse reuerti*. L'autre , qu'il y a tant d'exorbitances en la Nature , comme font les monstres , tant de déreglemens en l'ordre d'icelle , tant de choses de nul vsage , & contre raison , soit en la cōstitution des corps , des plantes & animaux , ou en la disposition de la face du Monde & de la terre , comme des gros rochers en vn beau pré , ou en vn champ fertile , la pluye tombant inutilement sur la Mer , sur les arenes de la Lybie , & sur les rochers , & mille choses semblables , que cela semble venir non de quelque sage Providence , qui les ait disposées , mais du fort & du hazard , qui les a temerairement arrangées . Il y a tāt de maux , de caſtres , & malheurs qui arriuent à

ceux qui le meritent le moins, tant de biens & prosperité à ceux à qui les supplices conuiendroient beaucoup mieux, tant de meschancetez qui demeurent impunies, & qui ne deuroient pas aduenir si le monde estoit conduit par vne Prouidence. Et finalement, qu'il y a en toutes les Religions du monde tant d'opinions & pratiques si estranges & absurdes, si contraires à la droicte raison, & vraye sagesse, qu'il faut reconnoistre qu'elles ne sont point fondées en verité. De toutes lesquelles absurditez est, à leur dire, exempt l'Atheïsme.

Quant à la premiere de ces raisõs, qui est leur grand arcboutant. Si la Diuinité estoit d'une puissance, force, & vertu finie & bornée, comme est de necessité toute la vertu de la Nature, ils auroient raison de dire qu'il ne pourroit auoir rien

fait de rien , y ayant vne infinie distance entre le rien & ce qui est. Et c'est pourquoy naturellement rien ne se fait, ni ne se peut faire, de rien, & qu'en toutes les productions de la nature, il y a tousiours vne certaine matiere qui en est le sujet , & de la puissance de laquelle se tirent les diuerses formes que nous voyons se succeder les vnes aux autres. Mais Dieu estant necessairement infini, est-ce contre apparence & raison, & non plustost conuenablement à la raison , que par sa puissance & vertu, qui est infinie & sans bornes , il tire du rien quelque chose, & remplisse ce vaste, ou vuide, & d'instance infinie qu'il y a entre l'Estre & le Neant? L'effect d'une puissance finie doit estre fini, mais celuy d'une puissance infinie peut & doit estre infini de mesmes.

• Or est la production du monde, ex-

straiçt du Neant par la vertu infinie de Dieu, vn effect infini, non au regard du subiect, qui est fini, (nul corps ne pouuant estre actuellement infini) mais au regard de sa production, & du moyen d'icelle, entant qu'il est extraict du Neant, & sans aucune cause & vertu intrinseque, n'y en pouuant point auoir de telle dans le Neant, mais par vne vertu extrinseque & illimitée, telle qu'est necessairement celle de Dieu.

Car Dieu estant sans aucun commencement ni fin (autrement il ne seroit pas Dieu) il faut de toute necessité que pour subsister par soy mesme, de toute Eternité à toute Eternité, par vn espace de temps infini (ainsi que nous pouuons concevoir l'Eternité) il ait en soy vne vertu & puissance de tout infinie, & sans aucunes bornes : par la-

quelle puissance il a peu tirer, & à en effect tiré, du Neant tout ce monde, qui quoy que grand, & comme infini au regard de nous, est neantmoins petit, & moins qu'un point au regard de Dieu, qui eu esgard à l'estenduë des lieux & des espaces est aussi infini comme au regard du temps & de la durée. Non pas qu'il y ait en Dieu, à proprement parler, temps ni lieu, car au tēps, & au lieu, il y a *pars extrapartē*, & *prius & posterius*, là ou en l'Eternité de Dieu il n'y a point de *prius & posterius*, ni en son immensité il n'y a point *pars extrapartē*, ni extension de mesme celle des corps, car il n'y a point de quantité en Dieu, mais pour ce que nous sommes corporels, & raisonnons par l'aide des sens corporels, nous conceuons l'Eternité & l'immensité de Dieu, sous cela que nous appel-

lons

bons temps & lieu, comme si l'éternité estoit vn temps infini, & l'immensité vn lieu & espace infini, bien qu'en effect la raison juge qu'il ne peut y auoir de temps ni d'espace actuellement infini.

Dieu donc estant de nécessité actuellement infini, & sa puissance de mesmes infinie, & le Monde ne pouuant estre de toute eternité, comme nous auons cy deuant démontré, il faut aussi de nécessité qu'il ait esté par luy tiré du Neant, & n'y a point subject de s'estonner qu'il l'ait extraict du rien, puis que sa puissance est du tout infinie. Ainsi voila leur grand Achille à bas.

Il y a des Philosophes Chrestiens, qui n'osent pas dire que le Monde soit de toute eternité, pour ce que l'Eseriture nous apprend son commencement & sa creation bien expressement, mais tiennent neant-

T

moins qu'il eust peu estre produit par Dieu de toute eternité, s'il eust voulu, pource qu'un effect peut estre de mesme aage & aussi ancien que sa cause, comme la lumiere est aussi ancienne que le soleil ; & la trace du pied imprimée sur le sable peut estre aussi ancienne que le pied qui l'y imprimeroit. Mais les raisons dont nous auons cy dessus combattu l'eternité du Monde, combattent absolument l'existence eternelle du monde en soy, & par consequent aussi sa production *ab eterno*. Et ce que Dieu ne peut auoir produict le monde *ab eterno*, n'est pas par manque & defect de puissance, mais parce qu'un tel effect ne peut estre ni exister de toute eternité, sans commencement. Et Dieu estant sage, comme il est, ne veut pas faire ce qui ne se peut, & qui implique, comme on

parle, contradiction. Et ne sert de rien d'objecter la generation eternelle de son Fils, car le Fils de Dieu est vray Dieu comme son Pere, de mesme essence & nature, co-eterne, & infini comme luy, en qui il n'y a ni *prius* ni *posterius*, mais le monde est fini, & ne peut estre sinon fini, pource qu'il est corporel, & partant ne peut absolument estre eternel.

Que si on demande pourquoy il n'a esté créé sinon depuis cinq ou six mille ans en ça, ie respons, pource que Dieu l'a voulu ainsi, qui en a les raisons par deuers soy en sa Sapience, lesquelles ce n'est pas à nous de rechercher ni sonder cet abyssme. Et quant bien il auroit esté créé cinquante mille ans, voire cinq cens mille millions d'années auparauant, tousiours auroit il eu vn commencement, & cela

n'avanceroit en rien davantage la cause des Athées, qui le veulent estre sans commencement, & qui ne gagnent rien s'il n'est reellemēt de toute Eternité. Et ne faut point demander, D'où est venuë à Dieu cette volonté de creer le Monde. Car ce n'est point vne volonté qui luy soit née & venuë de nouveau. Il a de toute Eternité voulu & arresté de creer le Monde lors & au point de temps (pour parler ainsi) qu'il luy a semblé bon, & quand ce temps là est venu, il a executé ceste sienne volonté. Quand ie dis, *Au point & moment de temps qu'il luy a plu*, il faut entendre cela non au regard de l'eternité qui a précédé le Monde, car en l'eternité il n'y a point à proprement parler, de points ni de moments de temps, n'y ayant en elle ny devant ni apres, (*prius, ni posterius*) mais cela se doit

entendre au regard de l'existence du monde, qui doit nécessairement auoir vn commencement, ne pouuant estre de toute eternité, comme il a esté démontré.

Et ne sert de rien d'objecter, qu'il y auroit par ce moyen quelque changement en Dieu, qui auroit en ce temps là, & non plustost créé le monde. Car le monde n'est point en Dieu, mais hors de Dieu, & n'est point tiré & extraict de son essence, mais du rien, & ainsi le changement n'est point en Dieu, mais hors de Dieu, en ce que le monde qui n'estoit point auparauant à commencé d'exister en vn certain temps, lequel temps (comme i'ay dit) il faut considérer en l'existence mesme du monde, & à commencé avec luy, car en l'eternité il n'y a point de temps proprement dit. Voila quant au premier argument.

Pour le second, nous auons cy dessus monsté que tant s'en faut que ces pretendus desordres & exorbitances qui se voient tant en la nature, qu'es actions & euenemens humains, fauorisent la cause des Athées, que nous en auons au contraire tiré vn argument contr'eux, en ce qu'il faut de là reconnoistre non vn aueugle sort & fortune, mais vne sage cause superieure, qui range & adresse ces desordres & y met quelques bornes, autrement tout retourneroit en vne horrible & espouuantable confusion. Et bié que nous ne puissions pas rendre, ni apperceuoir tousiours, la raison de ces desordres, ce n'est pas à dire qu'il n'y en ait point, vn simple Soldat n'entend pas le plus souvent les raisons des ordres & commandemens de son General, lesquels s'il entreprenoit de censurer, & accuser

son General d'insuffisance, il se rendroit criminel, & montreroit son ignorance. De mesmes sont ces gens qui pretendent censurer les œuvres de Dieu, & les rapporter au sort aveugle, pource qu'ils ne peuuent pas penetrer dans les sages conseils de celuy qui les a ainsi dressez. La prosperité des mechans, & les afflictions des iustes & gens de bien, n'a pas semblé aux sages d'entre les Payens mesmes, vn argument de la conduite des affaires humaines par le seul sort & hazard, ils ont eux mesmes en cela reconnu & demonstté vne sage Prouidence, qui adresse ainsi ces choses. Et Dieu en sa Parole nous apprend encore bien plus nettement, clairement & distinctement, que non pas eux, les raisons de sa Iustice, Sageſſe & Bonté, en ceste ſienne conduite, contre lesquelles

tous les efforts du raisonnement des Prophanes se rompent comme vne vague contre vn rocher , sans qu'il soit besoin que nous nous estendions sur ce sujet, apres tout ce que & la plus saine Philosophie, & la clarté de la reuelation nous enseigne là dessus, il faut de ceste conduite conclurre plustost vne autre vie apres celle-cy, que non pas nier la Prouidence & Diuinité.

Ainsi nous passons au troisiéme Argument. Il est certain que les opinions absurdes & extrauagantes des Payens, touchant la multitude & diuersité de leurs faux Dieux, & du seruice qu'ils leur rendoyent, & les contes fabuleux qu'ils en faisoient, & sur lesquels tout le seruice de leur Religion estoit fondé, ont donné à Epicure, & a d'autres avec luy, sujet de se rire de leurs impertinences, de se moquer de

leurs vaines superstitions, & mes-
priser toute leur Religion, voire
leur a esté vne pierre d'achopemēt,
& vne occasion de passer à l'Atheis-
me, destituez de la reuelation Di-
uine, qui nous donne la droite con-
noissance que nous deuons auoir
de la Diuinité. En quoy ils ne sont
pas pourtant excusables, pouuans
par la droite raison (aussi bien que
d'autres Philosophes plus sages
qu'eux) reconnoistre vn seul Dieu,
& vn plus conuenable seruice d'i-
celuy que n'estoient pas les super-
stitions Payennes. Et nous ne nions
pas qu'es autres fausses religions,
voire mesmes es Sectes & Heresies
d'entre les Chrestiens, il n'y ait aussi
des opinions & pratiques en ma-
tiere de Religion bien extrauagan-
tes, absurdes, & sauvages, & peut
estre que ces extrauagances ou
pratiques & opinions en ces der-

niers temps de l'Eglise Chrestienne ont bien peu donner occasion à l'Atheisme de s'esclorre, prouigner & multiplier entre les Chrestiens, & seruent à l'entretenir & fomen-ter encore aujourd'huy parmi eux, ainsi qu'a tres-bien & iudicieuse-ment remarqué l'Autheur de la Relation de la Religion és parties de l'Occident, parlant de la prophaneté toute commune & ordi-naire des Italiens. Mais ie dy à ceste objection deux choses, l'une que le vray Christianisme n'a point de tel-les extrauagances, qui puissent ou doiuent rebutter ceux qui vsent bien de leur raison, l'autre que l'A-theisme est plus deraisonnable & plus detestable que toutes ces ex-trauagances qu'ils peuuent reiecter avec raison.

Il n'y a en toute la vraye & pure Religion Chrestienne, laquelle la

seule Parole de Dieu nous enseigné, rien qui puisse, on doive justement offenser vne personne de bon sens & jugement. Le seul mystere de la Trinité, & celuy de l'Incarnation, est voirement au dessus de nostre comprehension & sens charnel, qui n'en peut pas concevoir le *comment*, mais encore comme l'un & l'autre nous est simplement & nuement proposé, & comme il se peut recueillir de la reuelation que Dieu nous en a fait en sa Parole, il est tel qu'il ne choque, ni ne renuerse la pure & droite raison illuminée par ceste reuelation, quoy qu'elle n'en puisse pas sonder la profondeur. Et quelle merueille si nostre raison si courte, si foible, & si aveugle, mesmes es choses de la nature (que le plus grand des Philosophes l'à accompagnée aux yeux des chœuvres en plein jour,) ne peut s'eleuer si

haut que de comprendre, & entendre parfaitement vn si haut myſtere, qui eſt ce qu'il y a de plus ſublim en la nature Diuine, laquelle eſt d'elle meſme deſia en ſoy toute ſpirituelle, immatérielle, infinie, éternelle, inuiſible & incomprehenſible. C'eſt bien vne plus grande merueille, ſi l'opinion des Athées eſt vraye, qui ne recognoiſſent ni Dieu, ni Ange ni eſprit, qu'vne penſée ſi haute, ſi admirable & ſi ſublime, ſoit montée en l'eſprit d'vn homme mortel, rampant en la bouë de ce monde, & qui ne ſe peut, ni ne ſe doit ſelon eux, eſleuer plus haut que ſes ſens corporels, eſtant luy meſme à leur aduis tout corporel & ſenſuel. Comment eſt-ce qu'vne Sageſſe ſi eſmerueillable, qui reluit en toute la contexture des dogmes de la vraye Religion Chreſtienne, & particulièrement

en ces deux cy , & en leur admirable enchainure avec les autres, pourroit estre la production d'une ame si basse que ces gens là veulent estre l'ame de l'homme, composée de petis atômes, & corps indivisibles , ou qui n'est qu'un peu d'air subtil , qui s'esvanouit & devient à rien par la mort ?

Quant à l'Atheïsme , tant s'en faut qu'il soit exempt d'extrauagances & absurditez , qu'au contraire il en fourmille & en regorge, comme il est euident de tout ce que dessus, ou nous auons combattu ce monstre de diuerfes sortes de raisons, contre lesquelles pour le soustenir, on ne scauroit excepter qu'extrauagances, absurditez & impertinences enormes. Quelle resuerie & extrauagance est-ce de s'imaginer avec Epicure ce monde composé & basti du concours for-

tuit d'atômes, ou petits corps indivisibles, ou de se le figurer avec d'autres sans fin ni commencement, tousiours de mesme auourd'huy comme il estoit il y a cinq cens mille millions d'années, & des siecles infinis, ce qui tire apres soy toutes les absurditez & contradictions imaginables, comme il a esté cy dessus demonstté. Et quelle grotesque de permettre le gouvernement de ceste admirable piece d'ouurage, & la conduite de tout ce Monde, & des affaires de tout le genre humain, a deux Maistres aveugles & opposez, la brute & insensible fatalité, & le temeraire & hazardeux sort, & inconsiderée fortune, esquels il n'y a pas vne miette d'intelligence, ni de prudence & connoissance. Qu'elle absurdité & impertinence de reconnoistre & aduoüer plus de sens

& d'intelligence au plus stupide des hommes, & au moindre de tous les animaux, qu'en ce qui meut & conduit toute ceste grande machine, car qu'est-ce en soy le sort sinon vne chimere, vuide & creuse de toute vraye existence, & le pretendu fatal ordre de la nature, qu'est-ce, selon eux, sinon vne chose brute & *sui nescia*.

Il n'y a, à la verité, en la Religion, des Athées, point de ces extravagantes, ridicules, absurdes, impertinentes & sauvages pratiques, vs, coustumes és ceremonies que l'ignorance, la vanité, la temerité & superstition des hommes a introduit en la pluspart des fausses religions, mais ce qui est autant & trop plus sauvage & monstrueux, c'est qu'ils abolissent & esteignent, entrant qu'en eux est, du Monde toute vraye religion & pieté, & plon-

gent les hommes dans l'impieté, prophaneté & irreligion, qui engloutit & comprend en soy toutes les monstrosités imaginables. Car qu'est-ce d'un homme qui n'a aucun sens, ni cognoissance ni crainte, ni reuerence, ni amour, ni respect de la Diuinité, sinon le plus abominable monstre que l'on scauroit se figurer. Quel honneur, quel bien, quelle vertu ou civilité peut on attendre ni esperer d'un homme, qui estime toute la difference qu'il y a entre le bien & le mal, le vice & la vertu, n'estre autre que imaginaire, & dependante de la pure phantaisie des hommes, qui le veulent ainsi, & non de l'exemplaire tres-parfait, immuable & eternal qui est en la Diuinité, seul modele tres-accomplí de toute perfection & vertu, & bien, tant Moral que Physique? N'est il pas euident que
ceste

ceste opinion & maxime des Athées mene tout droit les hommes à toute sorte de vice , d'ordure , de mal & d'iniustice , à quoy le dérèglement de leurs conuoitises , & le plaisir & chatoüillement de leurs sens les voudra porter , sans aucun frein , ni remors de conscience , ni crainte de peine autre que celle qui est de la part des hommes , laquelle quiconque d'eux pensera & espérera pouuoir euitier , il se laissera aussi tost aller à tout ce que sa passion & son sens luy dictera. Car selon leurs principes , la Raison qui dicte cecy estre bien , & cela estre mal , (la consideration de la Diuinité ostée & mise à part , qui est le patron du bien) n'est plus selon eux qu'une pure & libre phantaisie , & opinion qui se peut changer , & qui n'oblige a rien qui ne veut. Et cela

ne mene t'il pas tout droit au renversement de toute la société Humaine , & à la subuersion de tous Estats , Corps & Communautés quelconques au Monde vniuersel , & par ce bouleuement à la ruine & confusion de tout le genre humain , & a mettre tout dans le plus horrible cahos qui iamais fut feint ni imaginé.

Le Dieu pitoyable & iuste , qui reside là haut és Cieux , vueille en ses grandes compassions retenir & preseruer de ce gouffre d'abomination ceux qui le craignent & reuerent , ouure & decille les yeux de ceux qui se laissent mener à yeux clos par le sens de leur chair , & la vanité de leur raison corrompue , dans cet abyfme , pour voir & reconnoistre l'horreur de ce precipice & fondrière ; Donner repentan-

ce aux vns & reconnoissance de leur erreur, & aduis & sagesse aux autres pour ne s'y pas laisser tomber, & a tous la droite connoissance, crainte, & reuerence de son saint Nom, pour estre loué, serui & glorifié de tous, comme honneur, crainte & respect luy est deu par tous eternellement. A M E N.

F I N.

— ПЕРВАЯ —

ВСТУПЛЕНИЕ

ОБЩЕЕ СООБЩЕНИЕ

ОБЩЕЕ СООБЩЕНИЕ

ОБЩЕЕ
ОБЩЕЕ

ОБЩЕЕ СООБЩЕНИЕ

ОБЩЕЕ СООБЩЕНИЕ

ОБЩЕЕ СООБЩЕНИЕ

ОБЩЕЕ СООБЩЕНИЕ



